

**NATIONAL ASSEMBLY OF
SEYCHELLES**

Tuesday 03rd October 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. E bonzour nou bann zofisyé Lasanble. Bonzour tou dimoun ki pe swiv nou. E en bonzour spesyal pou bann viziter ki dan *Gallery*, ozordi mon'n remark zot. E i en group etidyan *Seychelles Tourism Academy*. Byenveni pou zwenn nou ozordi.

Avan nou al lo nou *Order Paper*, nou a komans avek en pti moman agreab e dan linite. Mon ti a kontan lo lapar Lasanble an antye, pran lokazyon pou adres en mesaz pou nou bann ansennyan, ki ozordi aktyelman i Lazournen Ansennyan. Kantmenm zeneralman zot selebre li Vandredi ofisyelman.

E i lasemenn ansennyan pou sa bann zour ki nou ladan la. Byensir nou tou nou konnen

poudir metye ansennyan i en metye ki tre, tre enportan pou nou sosyete.

Akoz sa i en group ki annan sa responsabilite, gard nou bann zanfan pou preski 20an. Premye 20an dan zot lavi. E donn zot sa formasyon ki neser, sa konesans premyerman pou zot kapab fer en travay dan zot lentera demen.

E fer sir ki zot kapab sonny non selman zot lekor, me fanmir ki zot pou fonde pli tar. Me osi ki zot devlop personelman, pou zot kapab fer fas avek tou bann defi ki devan zot dan zot lavi. E byensir sa bann ansennyan, sa i enkli enkilke bann valer ki nou bann zanfan i bezwen, pou zot fer bann bon desizyon dan zot lavi. E ki zot a tenir koman adilt e osi pase avek zot zanfan apre.

Donk, vwala en kantite responsabilite lo bann ansennyan. E nou konnen sa i enn bann metye tre difisil. E nou partaz sa ki zot santi, dan lakonplisman zot travay.

E annefe sa difikilte nou war li ozordi, akoz en kantite akoz bann problem ki nou sosyete i annan ki i annan en lefe lo konportman nou bann zanfan dan lekol. E dan laklas Sesel, nou konnen sityasyon i

ase difisil akoz bann problemn disiplin.

So, pou fer en travay dan sa kondisyon, i demann en dedikasyon e devouman spesyal, pasyans, konesans. E osi konpasyon partaz keksoz avek zanfan. Vwala, i annan en kantite rezon akoz nou devret anmenn sa solidarite e sa sipor pou nou ansennyan.

E nou kontan ozordi rapel bann ansennyan ki pe fer sa travay ozordi, me osi bann dan lepase. E bann kot nou menm nou, nou'n anba zot gidans e ki petet nou'n benefisye avek zot konsey e zot legzanp.

Avek sa, mon ti a kontan pas laparol bann Dirizan Lasanble, pou azout lo sa mesaz. Mon a donn laparol *Leader* Lopozisyon, Onorab Sebastien Pillay.

HON SEBASTIEN PILLAY

Mersi Mr Speaker. E bonzour Mr Speaker. Bonzour tou koleg Onorab. Bonzour nou bann envite ki dan Galeri, bann etidyan e byensir avek zot bann ansennyan, pou bann dimoun ki'n vin avek zot. E bonzour tou bann dimoun ki pe swiv nou. En bonzour spesyal pou bann ansennyan ki mon konnen zot dan bann lekol otour Mahe, otour, otour Mahe, La Digue e Praslin pe fer zot travay.

Mr Speaker, en zonn tre sarz in deza dir ki "*we are not on earth to guard a museum, but to turn to a garden full of life*". Napa en metye ki - si oule - montre sa plis ki metye en ansennyan. Akoz se en ansennyan ki *nurture* sa zarden si oule, ki met langre, met fimyen, aroz li pou ki sa bann plant i grandir e vin bann eleman prodiktiv dan sa zarden.

Alors ozordi Mr Speaker, permet mwan osi lo lapar mon *Caucus*, lo lapar bann ansennyan ki dan mon *Caucus*, e lo lapar mon parti e Lasanble osi, pou eksprim en mesaz solidarite. En mesaz lapresyasyon pou travay ki bann ansennyan i fer dan nou kominote e pou nou pei.

Mr Speaker, metye en ansennyan parey ou'n dir - i pa en metye ki fasil. I en metye ki ranpli avek son difikilte. Me i en metye ki tre nob, e souvandfwa bokou bann ansennyan i dir ou poudir sa i en vokasyon.

Akoz pou travay avek zanfan, pou travay avek bann zenn pou ede pou *shape* zot lespri. Pou ede fer zot grandir e akonplir zot potansyel, i en louvraz ki tre nob e i en louvraz ki tre enportan.

Alors ozordi Mr Speaker, mon mesaz se ki koman en kominote, koman en pei e

koman en sosyete, nou devret reflekte lo lafason ki nou, nou tret bann ansennyan. E lafason ki nou montre lapresyasyon pou sa travay enportan ki zot fer. Souvandfwa Mr Speaker, mon bezwen dir e profit sa lokasyon, ou rankontre bann ansennyan ki'n *retire*.

E ler ou demann zot ki manyer *retirement* pe ale, bokou i dir ou "mon kontan" me selman ou santi dan zot parol, ki i annan en pti mankman - ki zot manke dan sa laklas - zot manke parmi bann etidyan.

E byensir pandan letan *Teachers Week*, e *Teachers Day*, i moman kot bann zanfan i montre bokou lapresyasyon pou bann ansennyan. Alors mon krwar i enportan ki nou lans en mesaz, en lapel avek tou bann etidyan, tou bann zanfan isi Sesel; pou ki zot annan respe pou zot ansennyan. Pou ki zot valoriz kontribisyon ki zot bann ansennyan pe fer.

Me pli enportan ki zot sezi tou loportinite pou zot aprann avek zot bann ansennyan. Akoz sa laprantisaz se sa ki pou gide demen dan lavi, kote zot pou arive. Mr Speaker, mwan osi oule souliny en keksoz tre enportan, ki bokou ansennyan apre ki zot kite, apre ki zot in donn pandan bokou lannen i

rankontre pa mal difikilte dan lavi.

Alors i osi enportan koman sosyete, koman en pei nou regard, ki manyer nou fer sir ki dan zot dan zot karyer, ler zot pe arete ki bann ansennyan ki'n devoue donn tou zot kapab osi war en lapresyasyon. Me osi war zot ganny en lavi ki permet zot viv an dinyite, e avek en serten respe atraver sosyete.

Mon swete Mr Speaker, ki tou ansennyan i pas en tre bon moman, en tre bon semenn *Teachers Week*. E mon mazin en panse spesyal Mr Speaker, pou mon bann ansennyan. E mon mazin mon manman avan Mr Speaker, ki ti ansennyan pandan plizyer lannen. Mon mazin plizyer manm mon fanmir ki dan laprantisaz.

Mon konnen ser Onorab Lemiel in en ansennyan. Mon konnen Onorab Uranie in en ansennyan. Mon osi mazin serten ansennyan ki'n pou mwan dan mon lavi in ede pou anmenn mwan dan sa parkour kot mon ete. E la mon mazin Mis Mary-Anne Dubel, ki ti mon premye ansennyan dan *P1*. E mon mazin osi Mis Noline Godley ki'n en ansennyan pou ede enstil en serten valer e en serten konportman, dan son bann etidyan.

So, mon swet tou bann ansennyan en bonn fet, bonn fet *Teachers Day*. E mon swete ki sa lapresyasyon ki nou tou nou pe rode, i ava en keksoz ki pa zis von zour *Teachers Week*, me i en keksoz ki kontinyen toultan. Mon remersi ou Mr Speaker.

MR SPEAKER

Mersi Onorab.

(APPLAUSE)

MR SPEAKER

Mon aprezan donn laparol Onorab Sandy Arissol.

HON SANDY ARISSOL

Mersi Mr Speaker. Bonzour Mr Speaker. Bonzour tou bann koleg Onorab. Bonzour tou bann etidyan e zot ansennyan, akonpanyater ki avek zot dan Galeri. En bonzour spesyal i al pou tou bann ansennyan Mr Speaker.

Mon ti a kontan komanse par dir Mr Speaker, pli gran ansennyan ki listwar in kapab konnen se pa lot ki Zezi Kris nou sover. Mon ti a kontan komans lo la koman en kretyen pou mwan profite pou mwan felisit tou bann ansennyan.

Annou komans isi menm dan Lasanble, mon annan Onorab Pillay koman en *Leader*

dan nou Lasanble Nasyonal. Onorab Rocky Uranie, mon annan osi Onorab Kelly Samynadin, Onorab Philip Monthly, e tou lezot ansennyan e osi Onorab John Hoareau ki la o bor mwan.

E tou bann lezot travayer ki travay a kote bann ansennyan, sa i enkli bann *non-teaching staff*, pou zot asire ki travay bann ansennyan i al en pe pli fasil. E mon profite ozordi pou mwan felisit zot, dir zot mersi bokou pou kouraz, devosyon, lankourazman e lanmour ki zot kontinyen donn nou zanfana. Pou ki nou bann zanfana i vin bann sitwayen pozitiv pou zot kontinyen prodwir pozitivite dan nou pei.

Mr Speaker, letan nou lo bann ansennyan, mon ti a kontan osi mazin tou bann ansennyan ki ankor dan lansennyman. Mwan osi bezwen mazin osi bann ansennyan ki'n pran zot retreat. Mwan osi bezwen mazin bann ansennyan ki'n kit nou, ki'n fer en kontribisyon ekselan pou pei, pou lakominote, e osi pou nou bann zanfana.

E lo sa not Mr speaker, parey ou'n dir ou menm ou bann ansennyan i kontan profit Vandredi pou zot fer zot selebrasyon. Mon ti a kontan dir ek zot, kontinyen fer zot

selebrasyon byen. Anmiz zot lekòr. E nou ti a kontan demann nou zanfan pou zot kontinyen montre respe nou bann ansennyan.

Me mon ti a kontan komans avèk mwan menm, koman Manm Parlman. E mon ti a kontan demann nou *Caucus*, pou nou enskri sa respe pou ki nou zanfan i ava aprann avèk nou koman bann ansennyan dan nou prop fason, pou ki zot osi zot a montre respe bann ansennyan, ki pe travay avèk zot deor.

Lo sa note Mr Speaker, ankor enn fwa felisitasyon nou bann ansennyan, felisitasyon e mersi bokou pou zot devosyon. Enkli bann *non-teaching staff* pou sa semenn pou travay ki zot pe fer avèk nou zanfan. Mersi bokou Mr Speaker.

(APPLAUSE)

MR SPEAKER

Mersi Onorab Arissol. Nou a pran biznes lo nou *Order Paper*. E nou komans avèk Prezantasyon Papyè. Madanm Clerk?

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble. Nou bann viziter ki dan Galeri.

E osi bann dimoun ki a lekòt. I annan zis 1 papyè ki pe ganny prezante *ce matin*, i;

S.I. 66 of 2023
Communications Act
(Commencement) Notice, 2023.

Mersi Mr Speaker.

MR SPEAKER

Mersi Madanm Clerk. Nou a pas lo *Private Notice Question*. Mon a demann madanm raporter pou apel Minis e son delegasyon.

Bonzour Minis pou Lazenes, Spor e Lafanmir, Mrs Marie-Celine Zialor. E bonzour Mr Ralph Jean-Louis *Principal Secretary* pou Lazenes e Spor. E zot tou lede byenveni dan Lasanble pou partisipasyon dan kestyon. E mon ava apel *Leader* Lopozisyon pou met on *Private Notice Question*.

HON SEBASTIEN PILLAY

Mersi Mr Speaker. E bonzour Minis avèk *PS*. Mr Speaker, an pasan Onorab Arissol in nonm bann *teachers*, in bliye nonm ou menm ou Mr Speaker ki'n en ansennyan pandan plizyer lannen. So, e Minis osi, Mr Jean-Louis osi in en ansennyan e koleg travay *as well*.

Mr speaker, mon kestyon pou Minis i lir koumsa;

Pou ki rezon bann atlet Zwe de Zil ki'n ranport meday

pa ankor ganny zot larzan malgre zot in konplet tou formalite? Mersi Mr Speaker.

MR SPEAKER

Mersi Onorab. Minis, ou repons silvouple.

MINISTER MARIE-CELINE ZIALOR

Mersi Mr Speaker. Bonzour Mr Speaker. Bonzour tou bann Manm Lasanble. E bonzour pou bann envite ki dan Lasanble. E mon ti ava zwenn Lasanble osi Mr Speaker, pou swet tou nou bann ansennyan en bonn lafet, en bonn lasemenn.

Mr Speaker, rekonpans pou bann atlet ki'n resevwar meday dan Zwe de Zil 2023 i la, in pare. En meday dan bann zwe enternasyonal, enkli Zwe de Zil in ganny konfirman selman apre ki rezilta tes dopaz i negativ.

Madagascar in enform nou ki bann rezilta i sipoze apre mwan Oktob la. NSC in deza Mr Speaker, fini enform tou bann lekip ki le moman rezilta i arive, nou pou fer peyman pou nou bann atlet. Mersi Mr Speaker.

MR SPEAKER

Mersi Minis. Wi, nou a pran kestyon siplemanter. Mon a komans avek Onorab Aglae, wi?

HON EGBERT AGLAE

Mersi Mr Speaker. Bonzour Minis ek PS, nou bann envite etidyan STA isi dan Galeri. E tou dimoun a lekout. Minis, akoz ki sa kondisyon ki ou'n dir ki fodre tes dopaz i ganny sertifye avan peyman, pa enn bann kondisyon ki ti komet avek bann atlet pou bann rezon, pou zot kapab ganny sa larzan letan zot in ganny zot meday. Dayer ki ti en komitman Legzekitiv ki ti fer avan zot *send off*? Mersi.

MR SPEAKER

Mersi. Wi Minis, si sa kondisyon i ganny komet ek bann atlet?

MINISTER MARIE-CELINE ZIALOR

Mersi Mr Speaker. Mr Speaker, mon mazine poudir tou atlet ki partisip dan en gran levennman, tou bann *meeting* ki nou'n fer konsernan anti-dopaz in annan en kantite *meeting* ki'n ganny fer lo diferan size. Anti-dopaz i enn parmi, e tou atlet i konnen rezilta en meday i ganny konfirman apre tes in fini ganny fer, rezilta ofisyel negativ.

Sa Mr Speaker, mon asir ou tou atlet i konnen enkli bann lantouraz sportif. Mersi.

MR SPEAKER

Mersi Minis Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis avek PS. Bonzour tou Manm Onorab. Bonzour tou bann zelev dan Galeri anler. Bonzour tou Manm piblik.

Mr Speaker, anvi repons Minis bomaten, eski Minis i kapab dir ek sa Lasanble; eski sa kondisyon espere apre anti-dopaz, eski ti ganny dir, *express* li avek bann atlet avan zot ale? Or bann atlet ti ganny en lekspektasyon ki zot *perform*?

Dayer ou menm ki ti dir nou pou desann avek en *cargo* meday, e zot in al travay, zot in debourye e zot in *perform*. E eski Minis i kapab... (Mr Speaker, sa msye i kapab aret *disturb*?)

MR SPEAKER

Wi, wi Onorab, ale.

HON WALLACE COSGROW

Eski Minis - mon bezwen met mon kestyon byen Mr Speaker, akoz letan nou pe demann kestyon, ou a krwar bann kestyon pe ganny zis *brush off*. I enportan pou bann atlet deor tande. Eski sa ti ganny dir ek bann atlet? Ouswa sa ti reste koman zis en zafer la deor, e

atlet ti annan lekspektasyon ki ler zot vini, zot ganny zot rekonpans parey zot in al travay dir e debourye laba *Madagascar*?

E dayer Mr Speaker, akoz ki... eski Minis i kapab dir nou akoz ki ler zot ti fer sa seremoni pou resevwar bann atlet, zot ti donn sa bann atlet en konfirmasyon konmkwa zot larzan pe vini, e ti napa sa zafer anti-dopaz ladan? So, si Minis ti kapab eksplik nou.

MR SPEAKER

Eskiz mwan, eskiz mwan. Mon krwar ou kestyon i parey avek kestyon Onorab Aglae. Ou'n demann... wi Onorab, ou'n demande si bann atlet ti konnen, Minis in reponn. Mon pa oule ki nou antre dan en largiman ki Minis in fer byen, ki Minis in fer mal. In reponn kestyon. Minis, mon pou permet ou adrese.

Selman mon pe demann bann Manm, realize poudir sa kestyon in ganny reponn. E mon pa oule bann kestyon ki pa relevan. Mersi Onorab. Minis si ou annan en repons pou donner, pou azoute?

MINISTER MARIE-CELINE ZIALOR

Mersi Mr Speaker. Mr Speaker, napa larepons ki pe ganny

brush off. Ler larepons i kler, i senp. Se sa, nou pa kapab fer zistwar kot napa Mr Speaker. Bann atlet i annan prosedir ki swiv pou tou peyman ki sorti dan kof Gouvernman. Sa pa zis pou atlet sa, pou tou dimoun.

E bann let ti ganny distribye, e sa i ekrir kler dan let avek tou lekip. E parey Mr Speaker, ou'n deza dir letan mon'n donn mon premye leksplikasyon, *meeting* in ganny fer konsernan anti-dopaz. E nou pa fek envante sa nou Mr Speaker, ler bann atlet oparavan ti ganny peye ti espere tes dopaz, i espere. Mersi.

MR SPEAKER

Mersi. Mon a pran kestyon Onorab Vidot.

HON WALLACE COSGROW

Mon annan en klarifikasyon. Mon annan en klarifikasyon.

MR SPEAKER

Vidot silvouple.

(comments off-mic)

HON WALLACE COSGROW

(Ah, ou pa ti la detrwa zour, reste ou trankil.)

MR SPEAKER

Onorab Vidot, ou kestyon.

HON AUDREY VIDOT

Bonzour Mr Speaker. Bonzour Minis avek PS, tou Manm Onorab. Bann envite dan Galeri. E tou dimoun ki a lekout. En bonzour spesyal pou bann ansennyman, ki pou selebre zot lazournen ozordi dan lasemenn.

Mon kestyon pou Minis; Minis, tou atlet i atlet. Pe enport ki i annan serten ki pe viv avek en serten dezabilite. Eski pou sa konpetisyon e bann osi avan, si in annan bann tes dopaz ki'n ganny fer avan ler bann atlet i al konpetisyon?

E Minis, eski i pou kontinyelman en lapros kot bann atlet, espesyalman ki pe viv avek en dezabilite ki al bann konpetisyon parey sa enn la ki nou pe koz lo la. Zot pou ganny zis rekonpanse avek en paviyon?

E eski zot krwar poudir nou bann atlet i merit pli byen rekonpanse, espesyalman ler zot pe fer flote paviyon Sesel? Mersi.

MR SPEAKER

Mersi Onorab. Ou'n ariv lo 3 kestyon. Minis, mon pou permet ou regarde lekel ki relevan ki ou annan en repons an relasyon avek kestyon orizinal.

MINISTER MARIE-CELINE ZIALOR

Mersi Mr Speaker. Kot i konsern premye lo tes dopaz, sa i en pratik ki partou dan lemond i fer. E tes dopaz ki mannyer i ganny fer, pa mwan ki deside, pa nou ki deside. I annan en lasosyasyon WADA, ki zot, zot annan zot bann prosedir e zot deside lekel. E bann prosedir teknik pou fer sa travay i en tout en kestyon teknik sa.

Mon dezyenm lo dezabilite, mon pa konnen Mr Speaker, sa lenformasyon ki nou pe pas avek Lasanble ozordi, ki bann atlet dezabilite i ganny zis en paviyon, pa vre sa! I pa vre!

Bann atlet CJSOI, ki ti Anti-Spor ti ganny menm rekonpans, parey tou sa bann lezot atlet ki pa ti dan sa kategori Anti-Spor.

E pou Zwe de Zil, e pou larestan konpetisyon osi, menm prosedir Mr Speaker. Zot ganny rekonpans parey tou nou bann atlet.

Akoz nou Mr Speaker, nou pa fer distenksyon ant dezabilite ouswa lezot kalite abilite. Tou nou bann atlet i ganny menm tretman, menm rekonpans! Mersi.

MR SPEAKER

Mersi. Onorab Vidot, *sorry*.

HON AUDREY VIDOT

Mr Speaker, premye kestyon Minis pa'n reponn.

MR SPEAKER

In reponn.

HON AUDREY VIDOT

Non, non. Minis pa'n reponn mwan si bann atlet in fer tes dopaz avan zot al konpetisyon? Minis pa'n reponn, in reponn lot fason.

MR SPEAKER

In reponn ou kestyon.

HON AUDREY VIDOT

Mr Speaker, i pa'n reponn. In dir zeneral.

MR SPEAKER

Onorab Loze ou kestyon.

HON JOHAN LOZE

Mersi Mr Speaker. Mr Speaker, Minis in dir avek Lasanble ki larzan pou pey bann atlet in fini antre dan kont NSC. Si Minis ti kapab zis eklersi nou, ouswa menm posibleman fer li an ekrir pli tar. Dan ki *budget line* larzan i sorti pou pey bann atlet, kote larzan in sorti?

Ouswa si parey pe ganny spekile par bann atlet, ki i annan serten lasistans ki

Gouvernman in gannye avek en pei zanmi, pou pey bann atlet. Apre zot bann atlet zot pa'n ganny sa zom larzan ki zot to devret gannye.

Minis, an terminan *text* ki mwan mon pe gannye ek bann atlet, se ki zot pa'n gannye okenn let ki'n *set out* pou zot sa kondisyon anti-dopaz. Mersi Mr Speaker.

MR SPEAKER

Mersi. Minis, ou repons?

MINISTER MARIE-CELINE ZIALOR

Mersi Mr Speaker. Mr Speaker, i paret mwan ozordi mon'n ganny vini dan Lasanble pou en bann alegasyon, en kantite konfizyon ki pe ganny kree par ekspre, par ekspre aköz sa vibrasyon pozitiv avek nou bann atlet avek *sports* konmsi ou a krwar i fatig dimoun!

(APPLAUSE)

MINISTER MARIE-CELINE ZIALOR

Mr Speaker, letan mon'n dir mon larepons, ou kapab re vwar *verbatim*. Re vwar *verbatim*, mon pa'n dir sa larzan i dan kont NSC. Larzan Bidze i anba Zwe de Zil, e negosyasyon avek Finans wi, larzan an tou pou preparasyon i pa ti ase. Nou ti

al kot Finans pou nou ganny sipor ekstra pou Zwe de Zil. Sa i larzan. E tou sa bann formalite tou keksoz i fer atraver Minis Finans.

Napa okenn donasyon, okenn aletranze ki larzan pa'n ase. Pou sa Mr Speaker, sa lenformasyon i fo. E pe fer ekspre pou fer nou bann atlet la deor, nou bann sportif konfize e ankoler.

E Mr Speaker, mon ava zis klarifye let ki'n ganny anvoye, let ti ganny anvoye kot tou bann *coach*, bann *team manager* parey tou korespondans e bann *chairmen*. Tou korespondans ki sorti kot NSC, i pas atraver menm prosedir. E i anvoye e i annan la, la en kopi let avek mwan la Mr Speaker ki'n ganny anvoye pou enform.

Si i annan okenn atlet ki mank lenformasyon; zot mank lenformasyon zot konnen kote zot pou al rode. I toultan, mon reste toultan Mr Speaker en pti pe *baffled* par ler ki bann lenformasyon koumsa annan de ler zis Lopoziyon ki gannye.

Nou osi nou annan en kantite korespondan bann atlet, si ti annan okenn difikilte, okenn problem avek mon ti ava kontan Mr Speaker, zot ti ava...

Si parey bomaten mon'n tann bokou koz lo respe. Mon'n tann koz bokou lo annou edik nou bann zenn, nou bann dimoun byen, mon ti a kontan ki sa ledikasyon nou pa zis koze, nou fer. E si i annan konsern nou anvoy kot *NSC*. Mersi Mr Speaker.

MR SPEAKER

Mersi Minis. Bann Manm mon rapel zot, mon pa kapab les bann kestyon antre dan en deba e en largiman avek bann Minis. E avek bann alegasyon ki pa sibstansyel. Mersi. Mon pran kestyon Onorab Uranie.

HON ROCKY URANIE

Mersi Mr Speaker. Bonzour Minis ek ou delegasyon. Bonzour tou koleg Onorab. E bann etidyan ki dan Galeri, osi ansennyan ki dan Galeri.

Minis tou bann atlet i annan lekspektasyon, zis parey bann atlet Digwa sirtou bann foutboler, ti en lekspektasyon ki ou ti pou'n fini fer repar laplenn pou zot komans zwe futbol an Septanm, ziska la naryen pa'n ganny fer.

Mwan mon kestyon i akoz ki zot in bezwen vitman fer en seremoni, e lev lekspektasyon sa bann atlet, apre zis pou zot *divert* lo zot desizyon? Mersi.

MR SPEAKER

Mersi. Mon pa pou permet sa kestyon. Napa naryen pou fer avek kestyon orizinal. Onorab Arissol, ou kestyon. Silvouple gard lo kestyon orizinal.

HON SANDY ARISSOL

Mersi Mr Speaker. Bonzour Minis avek *PS* ankor enn fwa. Mon ti a kontan demann Minis, anvi son repons sete lo *WADA* sa lorganizasyon ki fer tes dopaz. Mon ti a kontan demann ou si tes dopaz i obligatwar, i obligatwar e si i en keksoz enternasyonal ki pe ganny pratike? Mon premye kestyon.

Dezyenmman mon ti a kontan demann ou, eski Gouvernman pe pran sa desizyon, an vi ki dan lepase in annan atlet ki'n ganny son meday, e in bezwen ganny arase, parske rezilta ti vin apre zot pe fer sa senpleman pou zot ba anbaras bann atlet? Mersi bokou.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mr Speaker, wi. *WADO* i lorganizasyon enternasyonal. Sesel pou li i apel *RADO*. E wi, i obligatwar. E zot ti vin vwar mwan boner sa

lannen avek konsern, ki pandan bann lannen Sesel nou pa'n obzerv sa bann lobligasyon, pou nou teste nou bann atlet. E pou donn korperasyon, nou'n donn bokou korperasyon sa lannen *RADO*.

E nou'n travay avek zot pou zot kapab annan kapasite pou *NSC* ed zot, pou zot zisteman zwenn sa bann bezwen enternasyonal. Si non Sesel pa pou ganny sans nou bann atlet pou partisip dan bann konpetisyon enternasyonal.

Aprè osi, akòz nou a pe met bokou lanfaz Mr Speaker lo disiplin avek nou bann atlet, avek nou kominote sportif. Sa i en disiplin osi ki nou anvi bann pratik dan plas zis koze ki nou anvi nou bann atlet osi ki annan.

E Mr Speaker, mon pou zis fer en komantr lo seremoni. Seremoni osi i fatig dimoun Mr Speaker, paret. Nou seremoni ti pou nou rekonnet tou - pa zis atlet ki ti ganny meday. Tou atlet, tou zofisye, tou ankadrer ti mont *State House* pou premye fwa Mr Speaker pou zot..ganny..rekonnet! Mersi.

(APPLAUSE)

MR SPEAKER

Mersi. Nou'n terminen. Bon, mon a pran prezan kestyon *Leader* Lopoziyon son siplemanter. Onorab Pillay ou kestyon.

HON SEBASTIEN PILLAY

Mersi Mr Speaker. E mersi Minis pou ou bann larepons ki ou'n donn nou, oubyen pa'n donn nou. Mr Speaker, mon ti a kontan demann Minis serten presizyon, pou mwan kapab klarifye serten keksoz pou bann atlet bann federasyon e tou piblik Seselwa la deor.

Akòz ki lefe ki zot ti konnen bann rezilta bann atlet pa ankor konfirman, akòz sa tes dopaz pa ankor sorti. E ou koman Minis ou ti konn sa ou. Akòz ki ou'n les Prezidan Larepiblik, *proceed* avek en seremoni ki'n lev lenspeksyon bann atlet an gran piblik, felisit zot enn par enn pou zot meday lor.

E menm i annan ki'n ganny meday larzan ki Prezidan li menm li in dir ki i pou donn li rekonpans pou en meday lor, akòz in ganny vole. Kot in menm fer *statement* derogatrwar atraver en lot pei *Comoro* kot i annan let.

Mon annan enn sa let la ki *Comoro* in ekrire Sesel. Akòz ki ou Minis ou pa ti *advised* Prezidan, me espere. Esper

konfirmasyon sa bann rezilta apre nou ava fer sa seremoni? Sa i mon premye kestyon.

Mon dezyenm kestyon ki mon ti a kontan klarifye Mr Speaker. Akoz ki depi tou sa letan in annan plizyer kominikasyon ki bann atlet in fer atraver rezo sosyal, atraver mesaz ki zot in anvoy plizyer dimoun e i drol ki ou, ou pa'n gannyen. I paret zis ou ki pa ganny sa bann mesaz. Me tou dimoun dan ou Minister i gannyen.

Akoz ki aprezan ki ou vin devan, pou eksplike ki avan ou pey sa bann atlet ou bezwen ganny konfirmasyon zot rezilta atraver sa tes dopaz ki ou pe dir nou la?

E dernyen pwen Mr Speaker, ki mon annan la. Ou'n koz lo *WADA*, *RADO* e lofis ki zot annan, zot in vin vwar ou. Keksoz ki nou, nou pa gannyen konpran kote isi se ki, *WADA* ti dan en lofis kot ou'n donn en *clubhouse*. En *clubhouse*, ki apre ou ti dir ek Lasanble poudir pa pou vann lalkol, pa pou servi lalkol ki'n konfirman lalkol pe ganny servi.

Ankor enn fa keksoz ki ou, ou'n dir Lasanble ou koz lo respe ou dir Lasanble en keksoz e lot keksoz i ganny fer!

MR SPEAKER

Onorab, eski, eski ou pe al dan en direksyon ki lo ou kestyon orizinal? Mon pa war naryen pou fer avek *clubhouse*, avek soz dan rekonpans pou bann atlet. silvouple termin ou kestyon lo size orizinal. Mersi.

HON SEBASTIEN PILLAY

Mersi Mr Speaker. Minis in entrodwir en size tes dopaz, e lasosyasyon lokal ki fer sa bann tes. Lasosyasyon lokal ki fer sa bann tes, ti konplent avek Minister e *NSC regarding landrwa* kot zot ti ete. E ti annan bokou mekontantman ler Gouvernman ti pran sa desizyon.

Minis ozordi in vin dir ek nou, poudir la li i pe met tou lanfaz lo tes dopaz. Me ler ti fer seremoni pou fer demonstrasyon *State House*, i pa ti mete sa lanfaz. So, Lasanble Mr Speaker, atraver ou bezwen *hold li accountable* pou son aksyon. E sanmenm mon ti demann Minis pou *resign* dernyen fwa. Akoz i dir Lasanble en keksoz apre i dir en lot!

MR SPEAKER

Mersi.

HON SEBASTIEN PILLAY

Se sa ki mon pe met devan Lepep Seselwa Mr Speaker. Napa naryen an plis ki sa.

MR SPEAKER

Mersi. Minis, nou a pran ou repons silvouple. Minis.

MINISTER MARIE-CELINE ZIALOR

Mersi Mr Speaker. Mr Speaker, ozordi Lasanble i bokou pwazon pe ganny krase.

(murmurings and comments off-mic)

MR SPEAKER

Order!

(Interruption)

MR SPEAKER

Minis... bann Manm silvouple annan gard sa Lasanble annord. Kriye dan Lasanble i pa en manner en Lasanble i merit konport zot. Minis, silvouple annou adres kestyon, annou pa al dan lezot size. Mon pou termin sa kestyon avek ou repons. Terminen silvouple.

MINISTER MARIE-CELINE ZIALOR

Mersi Mr Speaker. Mr Speaker, eski mon kapab kontinyen silvouple?

MR SPEAKER

Wi, ou kapab kontinyen.

MINISTER MARIE-CELINE ZIALOR

Mersi bokou. Mr Speaker, sa bann persepsyon mon poudir persepsyon ankor. Lafason ki manner li i ganny dekrir, mwan mon'n dekrir li avek en term ki zot war li i ofansif. E letan zot demann mwan tap lanmen pou *resign*, pa ofansif ditou.

Sa bann persepsyon e lekspektasyon ki pe koz lo la par *Leader* Lopoziyon ozordi Mr Speaker, i son lekspektasyon sa.

I son lekspektasyon ki ler nou'n dir pou dir wi, vwala bann lalis bann rekonpans ki koman atlet i debarke dan avyon nou pou donn zot en tyek. Si nou ti'n fer sa la, mon ti pou ganny demande pou reponn en kestyon akoz nou pa'n swiv prosedir finansyel, nou pa'n swiv prosedir.

Ler en dimoun i ganny vin travay le 1 Zanvyé, ler pou li ganny peye le 24, le 25 Zanvyé i pa ganny peye le 2 li, i dir li vin travay. I konnen i pou ganny pey, i dir li konbyen i pou gannye Mr Speaker. E sa bann kestyon Mr Speaker, ki'n ganny demande ki pe ganny demande

la; akòz mon pa ti *advised* Prezidan pou pa fer seremoni?

Mon'n fini war Mr Speaker, *Leader* Lopozisyon ek Lopozisyon pa enterese ek mon larepons. Zot pa'n anmenn mwan la, pou zot vin demann mwan sa kestyon.

Akòz mon asire, zot in probableman bann dimoun ki'n dir zot sa, in dir ek zot ki ti annan dan sa let tou. Zot konnen larepons. Zot in anmenn mwan la ozordi ankor parey ler ti anmenn mwan dernyen fwa pou dekouraz mwan.

Pou dir mwan *resign*, pou fann en pake persepsyon dapre zot, pou zot kapab kontinyelman senm sa bann keksoz negativ.

Mr Speaker, nou pep, nou nasyon, nou bann fanmir, nou bann zanfan, nou bann atlet, in ganny ase pandan sa bann lannen dan sa pei avek sa bann keksoz negativ. Mon ti ava enplor Lopozisyon...

(APPLAUSE)

MINISTER MARIE-CELINE ZIALOR

Dimoun in tro soufer. *Leader* Lopozisyon seye, annou seye, vin zwenn nou, seye pou nou fer bann keksoz pozitiv dan nou

pei. Pou nou anmenn bann keksoz pozitiv, anplifye sa bann keksoz. E si Lopozisyon i pa dakor avek en larepons, Mr Speaker, i son swa mon respekte son swa. Mersi bokou.

MR SPEAKER

Mersi. Mon pe termin sa sesyon kestyon. Mon santi kestyon, kestyon ki'n ganny mete lo pape in ganny reponn konpletman, an antye e i kler. Alor mon pa bezwen al pli lwen ki sa.

HON WALLACE COSGROW

(Off-Mic)

MR SPEAKER

En moman, en moman. Bon mon pou annan *matter of privilege*, mon pou annan *point of order*, mon pou ... Onorab Cosgrow mon a ekout ou. Silvouple *state* ou *matter of privilege* konkretman.

HON WALLACE COSGROW

Mersi Mr Speaker, pou donn mwan sa loportinite pou fer *matter of privilege*. Mr Speaker, Minis atraver kestyon Onorab Vidot, in dir ki tou atlet i ganny trete parey. Mr Speaker, sa ki Minis in dir i pa korek e i pa vre.

Bann atlet ki ti al *Special Olympic Berlin*, pa'n ganny okenn rekonpans finansyel.

Eski Minis i kapab konfirman si zot in ganny rekonpans finansyel ouswa non. Minis donn nou sa larepons silvouple.

MR SPEAKER

Napa privez Lasanble ki enplike, dan larepons ki Minis in donnen. Mersi.

HON WALLACE COSGROW

Mr Speaker, Minis pa'n koz laverite!

(loud comments off-mic)

MR SPEAKER

Onorab, bann Onorab Lopozisyon, zot pe fer tousala zis pou met enteripsyon, *obstruction* dan deroulman Lasanble.

(comments off-mic)

MR SPEAKER

Mon pa war – mon pa war ki i annan okenn *matter of privilege*, okenn *point of order* ki merit ganny konsidere.

Silvouple, nou pou kontinyen avek kestyon, Madanm raporter mon pou demann ou apel lot zofisye ki pe atann.

HON SEBASTIEN PILLAY

(Off-Mic)

MR SPEAKER

Onorab Pillay, non. Onorab Pillay mon pe demann ou gard lord, e sa i en lord Speaker. Mersi.

(loud comments off-mic)

MR SPEAKER

Silvouple,

(loud comments off-mic)

MR SPEAKER

Onorab! Onorab! *Order!* Dir mwan... mon pe dir bann Manm mon pa oule enteripsyon i kontinyen. Manm ki kontinyen enteronpe, mon pou demann zot sorti dan lasal silvouple. Mersi.

Bon nou pou kontinyen avek kestyon, e mon dir bonzour e byenveni Mr Daniel Kallee *CEO Home Care Agency* ki pou pran premye kestyon ki lo nou *Order Paper*.

E mon fer remarke ankor ki nou annan en kantite kestyon lo *Order Paper* 12 kestyon. E nou pou limite lo lakantite kestyon siplemanter dapre letan ki nou annan. Mersi.

(loud comments off-mic)

MR SPEAKER

Onorab Aglae, Onorab Aglae, mon pe demann ou sorti dan lasal. Sorti.

MR SPEAKER

Order!

HON AUDREY VIDOT

(Off-Mic)

MR SPEAKER

Bon Onorab Vidot, Onorab Vidot mon'n donn en *warning* deza e mon pa pe donn ankore plis. *Ok*, mon pou permet Onorab Lemiel en *point of order*.

HON SYLAVANNE LEMIEL

Mersi Mr Speaker. Bonzour Minis. Bonzour Mr Kallee. Mr Speaker, si nou oule keksoz i deroul byen dan Lasanble, annou *observe Standing Order*. Manm in lev lanmen, zot in anvi eklersi serten keksoz, be donn zot en permisyon pou eklersi! Ou a *rule* zot *out of order*, problem a fini!

Nou pa kapab kontinyen
...

(Mic switched off)

MR SPEAKER

Onorab.

(loud comments and murmurings off-mic)

HON JOHAN LOZE

(Off-mic)

Diktater ...!

MR SPEAKER

Onorab Loze, ou'n akiz mwan diktater, e ou'n enteronp mwan, mon pe demann ou sorti dan lasal!

HON JOHAN LOZE

Mersi Mr Speaker, mon pa'n enteronp ou, akoz ou pa ti pe koze! Be mon a sorti.

(comments and murmurings off-mic)

MR SPEAKER

Rezon akoz mon pa donn bann *point of order*, e mon pa donn *matter of privilege* akoz bann pwen ki zot leve i irelevan. I pa fer okenn sans, i zis enterip...

(comments and murmurings off-mic)

MR SPEAKER

Bon, pou nou terminen, mon pou donn Onorab Pillay son *point of order* oubyen *matter of privilege*, e nou pe termin la. Onorab Pillay ki ou annan poudir?

HON SEBASTIEN PILLAY

Mersi Mr Speaker. *Straight forward*. Koman en Manm, mon

bezwen met presyon lo en Minis. E ler mon met presyon lo en Minis, si en Minis pa pe performen mon annan drwa poudir li pou *resign*. Me selman mon pa zanmen servi bann term pou ensilte sa Minis.

(Off-mic)
Arr!

HON SEBASTIEN PILLAY

Par kont ou les en Minis ensilte Manm Lasanble par servi en term ki *unparliamentary*. Tou mon Manm lo sa latatab in tande, tou dimoun dan Galeri in tande. E nou, nou pe alert ou pou donn en *ruling* lo la zis pou ou dir sa. Mon *Whip* i debout, i lev lanmen pou koz ek ou lo sa ki pe arive ek son bann Manm.

2 Manm lo mon kote latatab in fini ganny met deor. Onorab Aglae pe proteste pou li ganny en *point of order*, zis pou ganny en *point of order* - ou pini li aköz i bezwen rezenbe poudir li koumsa ou bezwen met li deor.

Mwan mon krwar i pa akseptab Mr Speaker. Mon krwar ki ou devret re les mon Manm antre dan *Chamber*. E ou devret kosyonn Minis, ki la anndan Minis i pa dan Legzekitiv la. I kot Lasanble Nasyonal, e nou, nou'n ganny mete la pou *hold Minister accountable*.

Me ou pa oule *rule* lo sa ki Minis in dir, i zis konmsi i *ok pou Minis dir*" pwazon" dan Lasanble.

MR SPEAKER

Bon. ou'n fer ou *point of order*. So, mersi.

HON SEBASTIEN PILLAY

Mon ti a kontan ou donn en *ruling*, e mon ti a kontan ki ou *rescind* sa lord pou met Onorab Algae deor. I pa fer sans sa ki ou pe fer! I a en Manm ki abitye fer sa kalite keksoz, e ou oblize fer sa.

MR SPEAKER

Ou war problemn? Mon pe dir ou, ou'n fer *point of order*, ou'n kontinyen ou'n fer li 2 fwa. Bon, mon'n fer *point of order* pou gard Lasanble annord san ki nou kapab, aköz ki nou bezwen prosede annord san enteripsyon.

Nou pou kontinyen avek kestyon. E nou pou al lo kestyon ki lo *Order Paper*. Nou pou komans avek kestyon 172, aköz prezans CEO Kallee. E aköz apre tou lezot kestyon i pou en lot delegasyon. So, pou permet li pran kestyon ki annan relevans avek li, e pou li kapab fer son depar apre. I la pou kestyon 172, e sa i dan non Onorab Naddy Zialor.

HON NADDY ZIALOR

Mersi Mr Speaker. Bonzour Minis. Bonzour CEO. Tou Manm Lasanble e Lepep Seselwa a lekout. Avan ki mon demann mon kestyon, avek ou permisyon Mr Speaker, mon rekonnet ki resaman in annan en gran kouvertir an se ki konsern sa size ki mon pe aborde ozordi.

Me toudmenm, mon kestyon i lir *comme suivant*; Eski Minis i kapab donn nou en kontrandi lo travay ki nouvo *Home Care Agency* pe fer pour *profiling* e klasifikasyon bann *carer*? Mersi Mr Speaker.

MR SPEAKER

Mersi Onorab. Minis ou repons.

MINISTER MARIE-CELINE ZIALOR

Mersi Mr Speaker. Mr Speaker, Lazans *Home Care* i dan staz pou finaliz tou son bann travay administrasyon, pou li vin 100 pousan operasyonnel koman en antite lo li menm.

Zot pou byento zwenn bann *carer*, pou diskit model e standar swen neser. Mon ti ava kontan fer sorti Mr Speaker ki nou pa fer *profiling* bann *carer*, me nou annan model pou kalite swen dapre

rekomandasyon Lasante. Mersi Mr Speaker.

MR SPEAKER

Onorab Zialor, ou siplemanter?

HON NADDY ZIALOR

Mersi Mr Speaker. Eski..., Minis mersi pou ou lenformasyon - dan ou rankont oubyen konsiltasyon ki ou pou pe fer, eski ou pou konsider osi parey mon war en keksoz *similar* ki'n ganny fer, pou osi edik bann resipyan an sa ki konsern lo ki standar vreman sa nouvo standar ki nou koman en pei nou pe mazin met bann *carer* lo la? Mersi Mr Speaker.

MR SPEAKER

Mersi Onorab. Minis ou repons?

MINISTER MARIE-CELINE ZIALOR

Mersi Mr Speaker, mon ti ava avek ou permisyon permet ki CEO i a reponn sa. Mersi.

MR SPEAKER

CEO ou annan laparol.

CEO HOME CARE AGENCY DANIEL KALLEE

Bonzour Mr Speaker. Bonzour tou bann Manm Onorab. E mersi pou kestyon Onorab Zialor. Nouvo Lazans in fer en

seksyon dan son striktir, pou nou kapab sansibiliz kre *awareness*, pou anmenn ledikasyon pou sanz *mindset*. E pou fer ki servis *home care* i kontinyelman ganny *improve*, e ariv dan sa standar ki *Act Home Care Agency* i'n ganny *mandate*, en?

Alors, sa kekyon ki ou'n poze, i pou ariv son letan kot sa *mindset* nou bann resipyan avek lenformasyon avek bon pratik, avek lekspektasyon ki bann *carer* anver bann resipyan. Donk, avek en travay a long term sa pou ganny arive. I pou en travay sistematik.

MR SPEAKER

Mersi *CEO*. Onorab Pillay, ou annan en siplemanter?

HON SEBASTIEN PILLAY

Wi Mr Speaker. Mr Speaker, ankor enn fwa nou war kot sa Gouvernman i fer keksoz a lanver. Minis ti vin dan Lasanble, ti donn nou *commitment* an relasyon avek formasyon *Home Care Agency*. E ti sipoze keksoz pe mars pli byen! Me nou pa war naryen ki pe mars pli byen.

Sa ki nou war, nou war plito en konplikasyon ki'n ganny kree par en Minister, zisteman aköz mon pa konnen ki desizyon kote sa desizyon in

deside pou ganny pran. E nou, nou ti vot en Lazans *Home Care Agency* ki pa pe fonksyonnen!

Mr Speaker, *that's the truth!* E bann *carer* pou dir sa deor. *Whether* nou oule aksepte oubyen non, *that is what is happening!* Ozordi bokou pli konplike pou en dimoun ganny en *carer*.

Tou sa dimoun ki la anndan i konn tre byen, tou dimoun ki la anndan i konnen. E tou dimoun i kontinyen vin konplent. E nou, nou kontinyelman vin dan Lasanble, nou ganny Minis ki pa oule komit son lekor pou en larepons; ki swa i pe fer plan, swa i ankor pe fer isi, swa i ankor pe fer laba!

E ou koman Speaker, ou kontinyen protez sa bann Minis. Ou pa oule nou *hold zot accountable!*

MR SPEAKER

Bon, Onorab, *Order...*

HON SEBASTIEN PILLAY

What is this Mr Speaker?

MR SPEAKER

Order. Order 37(1), en kekyon i pa en leskiz pou en deba avek Minis. I en kekyon. Nou'n pran ou *statement* ziske konmela, eski ou annan en kekyon oubyen non?

HON SEBASTIEN PILLAY

Mr Speaker, les mwan met devan ou. I nou rol koman Manm Lasanble pou demann Minis kestyon. I ou rol koman Speaker, pou gete si mon kestyon i annord oubyen non.

MR SPEAKER

Wi.

HON SEBASTIEN PILLAY

Be ou ki deside si Minis pou reponn mon kestyon. Ou'n met mon bann Manm deor nou a kapab demann kestyon, nou pa kapab fer naryen dan Lasanble. Be annou ferm Lasanble, e Minis i ava travay *rule by decree!*

MR SPEAKER

Onorab, ou pa pe demann en kestyon silvouple. Onorab Uranie ou annan en kestyon?

HON ROCKY URANIE

Mersi Mr Speaker. An relasyon avek nouvo *Home Care Agency*, eski zot annan lide met en *full time* zofisye *Home Care* lo La Digue? Mersi.

MR SPEAKER

Minis repons.

MINISTER MARIE-CELINE ZIALOR

Wi, mersi Mr Speaker. Mr Speaker bann louvraz bann travay malerezman Onorab Pillay in ale avan ler nou donn li larepons, nou donn li en pe leksplikasyon. Kekfwa i pa ti anvi li, i ti anvi zis ...

(comments off-mic)

MR SPEAKER

Minis ou repons.

MINISTER MARIE-CELINE ZIALOR

Wi, Mr Speaker, Tou sa bann louvraz ki nou'n fer. *CEO* Kallee i ava kapab pran pou li kapab eksplike. Me selman Mr Speaker, zis ou a permet mwan lo kote *Home Care* tou keksoz ki ou a pe revolisyonnize ou a pe fer. Enkli preski tou sa bann antite ki kot Minister Spor, Lafanmir ek Lazenes.

Akoz, mon pou kontinyen dir sak fwa mon vini, fodre pa nou bliye sa kantite negligize ki sa bann antite ti ganny negligize. E kantite letan ki nou'n viv dan en sistenm kot in annan en kantite keksoz ki'n swa ou vini aköz nou kontan ou figir, nou pa kontan ou figir, ki'n ganny fer.

E bokou labi sirtou dan sa ki nou apel sa sistenm *Home Care*. Nou bezwen fer sir ler nou aranz li la Mr Speaker, nou

pran tou bout par bout e nou aranz li byen. Nou pa degaze taye, pou nou ganny en pwen politik. Nou fer li pou nou bann Seselwa, pou nou bann dimoun ki bezwen sa swen!

Nou fer li byen toultan dan pozitiv, e mon ti a kontan avek ou permisyon ki *CEO* i eksplik en pti pe kwa ki'n ganny fer. Mersi.

MR SPEAKER

CEO?

CEO HOME CARE AGENCY DANIEL KALLEE

Mersi Mr Speaker. Mersi Minis. Onorab depi Avril, ler nou'n fer transfer seksyon *Home Care* pou vin en lazans, i ti en prosesis. Lazans pa ganny fer ler *Act* in pase. Lazans in ganny angaze dan en prosesis pou met li an plas. E tou keksoz i bezwen ganny fer an swivan regilasyon neserer e apropiye, baze lo *recruitment*, *staff*, laprouvasyon striktir par *PSB*.

So, i annan en prosesis ki nou'n angaz nou ladan. E se sa kot nou'n arive ozordi. E mon vremen satisfere, e ankouraze pou dir, ki la an se moman nou bann *staff* dan bann seksyon prensipal in fini pran pozisyon. Ki fer ki lazans i ava kapab komans *operate* endependaman avek *ASP*.

Donk, definitivman dan tou fason, dan tou fason travay, i annan letan ki ganny pran. La Digue nou dan prosesis aktyelman pou rod en biro, e *once* ki sa i ganny fer pa pou pran bokou letan; aköz nou annan bokou dan nou Minister, nou annan bokou lezot lazans ki baze La Digue. Nou pe negosye, e *once* ki sa i ganny fer zofisye pou kouver La Digue dan en fason pli permanan.

Me an menm tan dan nouvo striktir, nou pe antisipe ki menm bann zofisye ki travay lo Mahe, zot pou annan responsabilite pou kouver Praslin ek kouver La Digue osi. Dan loptik pou anmenn en pli bon servis pou reste pli pre avek bann resipyan e bann *carers* pou kapab fer sa diferans. Mersi.

MR SPEAKER

Mersi. Onorab, mon'n fer ou remarke; ou kestyon i pa ni menm lo size ki'n ganny demande. Ou al lo en lot size lo La Digue, mon'n permet ou en repons. Mon'n permet ou, siplemanter... ou annan en klarifikasyon lo sa ki'n ganny dir? *Ok*, mon les ou poz li.

HON ROCKY URANIE

Mon pe zis rod en dele letan, kan ki zot pe mazine pou

kapab met sa zofisye lo La Digue? Mersi.

MR SPEAKER

Mersi. *CEO*, ou annan en dele letan?

CEO HOME CARE AGENCY DANIEL KALLEE

Mersi Mr Speaker. Nou pe antisipe *by* lafen Oktob, nou pou'n reisi met sa dimoun, sa *staff* ki pou baze La Digue.

MR SPEAKER

Mersi *CEO*. Avek sa mon a permet *CEO*, mon krwar se tou kestyon ki pou li. I a kapab fer son depar. E madanm raporter, ou ava apel lezot zofisye ki pou bann kestyon swivan 171 ek 173.

Donk, bonzour Mrs Rosa Morin ki Direkter Zeneral pou *Elderly and Disabled*. E Mrs Jane Larue ki Direkter Zeneral pou *Research and Policy Planning*. Nou a pas lo kestyon 171, Onorab Andy Labonte.

HON ANDY LABONTE

Mersi Mr Speaker. Bonzour Minis avek ou *panel*. Bonzour tou bann dimoun ki dan Galeri. Bonzour tou koleg Onorab. En Bonzour spesyal tou bann ansennyan spesyalman bann ansennyan Lekol Larivyer Anglez.

Kestyon 169 i lir koumsa; Minis ki bann dernyen devlopman an sa ki konsern fonksyon aktyel, e fitir sant lazenes ki sitye dan distrik Larivyer Anglez?

MR SPEAKER

Non, Onorab *wrong question*. Nou pe pran 171 ek 173, akoz prezans zofisye ki konsernen avek sa size. So, kestyon ki nou pe pran la, se 171.

HON ANDY LABONTE

Ok Mr Speaker. 171 i lir koumsa; Eski Minis i kapab eksplik stratezi son Minister, pou priyoritiz travay renovasyon lo bann diferan rezidans bann dimoun aze atraver pei? Mersi.

MR SPEAKER

Mersi. Minis ou repons?

MINISTER MARIE-CELINE ZIALOR

Mersi Mr Speaker. Mr Speaker, atraver *SIA* ki Lazans Lenfrastriktir, evalyasyon travay renovasyon lo bann lakaz dimoun aze in fini fer lannen pase. E priyorite i depan lo sa evalyasyon pou swazir dan ki lord nou bouze, e byensir i osi depan lo Bidze.

Mr Speaker, la, vi ki nou'n fek selebre Lazournen bann

Dimoun Aze Dimans, mon ti ava profite pou remersye bann endividi avek bann biznes ki pe adopte nou bann *Elderly Home*. Pou donn Gouvernman sipor pou pran swen avek nou bann dimoun aze dan sa bann *home*. E nou *welcome* bann lezot sipor ki nou kapab gannyen. Mersi Mr Speaker.

MR SPEAKER

Ou siplemanter Onorab Labonte?

HON ANDY LABONTE

Mersi Minis pou ou larepons. Mon osi mon pou zwenn avek Minis pou mwan swet bonn fet bann dimoun aze, espesyalman bann ki dan *Home Elderly* pou English River.

Minis, mon kestyon siplemanter i vin atraver eski parey ou'n dir pou dir i annan lafason ki zot get bann priyorite. Eski i annan en Bidze spesifik pou tou bann diferan *Elderly Home*, ki pou ede pou fer sa bann travay spesifik or i an gro? Mersi.

MR SPEAKER

Mersi. Minis ou repons?

MINISTER MARIE-CELINE ZIALOR

Mersi Mr Speaker. Mon ti ava ek ou permisyon permet DG Morin pou reponn silvouple.

MR SPEAKER

DG Morin, ou annan laparol.

DIRECTOR GENERAL ROSA MORIN

Bonzour Mr Speaker. Bonzour tou bann Manm. E bonzour tou dimoun a lekout. Pour bann tou bann lakour, avan ti napa en Bidze avan, pou spesifye ki ti ganny adrese pou bann lakour.

So, lannen pase nou divizyon nou ti rankontre avek SIA, ki pou la premyer fwa ki mon ti demann zot pou zot fer sa evalyasyon byen detaye pou sa 5, pou sa 9 lakour rezidansyel. Parey ou konnen nou annan 7 Mahe, avek 1 Praslin ek 1 La Digue.

E la prezan ki nou'n ganny apre sa bann evalyasyon detaye, ki zot in met kou osi ki asosye avek tou bann louvraz renovasyon ki pou ganny fer pou tou sa bann lakour.

E ki la prezan nou dan en pli bon pozisyon pou nou kapab programen, e mete dan nou bann Bidze.

Pou sa lannen i annan en Bidze ki'n fini ganny *allocate* pou premye renovasyon ganny fer. E sa pe al ganny fer pou lakour Au Cap. E lezot Bidze,

larzan nou'n fini mete dan bann lezot Bidze, pou bann lannen ki pe vini. Mersi.

MR SPEAKER

Bon. Onorab Labrosse, ou annan en kestyon siplemanter?

HON RICHARD LABROSSE

Mersi Mr Speaker. Dabor avan mon komanse, mon ti a kontan dir bonzour tou dimoun. Bonzour Minis ek ou delegasyon. Bonzour tou bann envite anler. E en bonzour Spesyal pou bann ansennyan, espesyalman bann ansennyan lekol Plaisance.

Minis, letan mon'n ekout larepons Mrs Morin, in fer nou gannyan konpran ki dan lepase ti napa en Bidze pou sa bann zafer renovasyon.

Prezan kwa ki vin dan mon lespri la se ki la aktyelman ki ou'n dir i annan en laliny Bidze ki pe vini, eski zot in fer en evalyasyon zeneral lo sa bann *home* li menm?

E eski zot in vin avek en pri konbyen i pou kout Gouvernman li menm, pou fer sa bann travay? Mersi.

MR SPEAKER

Mersi. Minis? DG, ou pou pran laparol?

DIRECTOR GENERAL ROSA MORIN

Mersi. wi, parey nou'n dir avan ti napa. E sanmenm sa prezan nou'n demann SIA pou fer sa evolasyon byen detaye. E avek sa evalyasyon, tou bann evalyasyon zot in ganny mete zot *costing* avek.

E ki la prezan ki fer nou konnen egzakteman ki kantite tou travay renovasyon pou ganny koute. E la prezan ki fer nou dan en pli bon pozisyon pou nou kapab met dan Bidze. Mersi.

MR SPEAKER

Mersi. Bon, nou a pran kestyon 173, Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour Minis ek ou lekip e tou dimoun ki pe swivre travay Lasanble. Mon kestyon i lir koumsa;

Eski Minis pou Lafanmir i kapab dir Lasanble ki zistans sa Polisi pou konstri lakaz pou bann dimoun aze anba *public private partnership* in arive? Mersi.

MR SPEAKER

Mersi. Minis, ou repons?

MINISTER MARIE-CELINE ZIALOR

Mersi Mr Speaker. Mr Speaker, sa ki Onorab Hoareau pe fer referans avek i pa en Polisi, me koman en propozisyon proze.

Departman Lafanmir in fer serten diskisyon avek SIB, e osi avek Minister Labita ek Lozman. E dapre bann analiz nou pou prezan bezwen desid lo en model ki pou abordab.

Nou met lenportans lo afordabilite pou sa bann dimoun. E sa i ankor pe ganny travay lo la. Mersi Mr Speaker.

MR SPEAKER

Onorab Hoareau, ou annan siplemanter?

HON JOHN HOAREAU

Mr Speaker, mon ti a kontan petet Minis i kapab eklersi en pti pe lo sa model pli afordab ki zot sipoze met an pratik. Si i annan en model ki en pti pe par egzantp en *cross subsidy* ki zot kapab konsidere osi? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mr Speaker, nou pa ankor ariv lo en model spesifik, pa ankor. E i ankor sirtou kot Minister Labita ki pe deside, ki pe regarde, ki pe evalye. Akoz zot ki konnen, SIB

ki konn *business plan* pou zot kapab donn nou bann *advice* byen.

Me selman mon krwar sa i en propozisyon ki nou ava pran konsiderasyon. Mersi bokou. Mersi Mr Speaker.

MR SPEAKER

Mon war en lanmen in leve. Onorab Labonte?

HON ANDY LABONTE

Mersi Mr Speaker. Minis, an relasyon avek konstriksyon lakaz pou bann dimoun aze, parey nou konnen poudir *so far if I am right* mon konn zis “*Let Your Light Shine*” ki egziste prive Sesel. Eski, e la mon anvi felisit permet mwan Mr Speaker pou mwan felisit Mrs Marie-Alice ek Mr Jonathan Weatherall ki pe administre sa sant.

Si oule zot ganny bokou difikilte pou vremen *maintain*, e fer fonksyonnen sa *home*. Eski ou Minister i pe mazin travay petet dan lespri petet, pou anmenn serten lasistans adisyonnèl ki pou kapab kontinyen ankouraz sa bann dimoun ki deside pou investir dan en tel servis, ki en demann dan Sesel? Mersi.

MR SPEAKER

Mersi. Minis, repons?

MINISTER MARIE-CELINE ZIALOR

Mersi Mr Speaker. Tousala Mr Speaker i pou dan sa model ki nou a pe koz lo la. E sa i kot Minis Finans, zot ki pe fer Polisi lo partenarya prive avek Gouvernman - en Polisi kot nou tou nou ava swiv e nou ava regarde, kwa ki pou model bann lakaz bann dimoun aze prive. Kwa model ki Gouvernman i kapab, ki siport ki led, ki Gouvernman i kapab donnen. Mersi Mr Speaker.

MR SPEAKER

Mersi. Nou a... Sa ti 2 kestyon ki nou ti annan pou sa delegasyon. So, si nou'n terminen avek zot, mon pou swet zot bon depar e bonn kontinyasyon. E madanm raporter i a kapab apel zofisye pou lezot kestyon.

Bon, byenveni ankor Mr Ralph Jean-Louis PS pou Lazenés e Spor. E nou a ganny zwenn osi par Mrs Gyra Nibourette Direkter Zeneral pou *Strategic Human Resources*. Prezan nou a rekomans avek lalis kestyon. E nou retourn lo kestyon 169 Onorab Andy Labonte.

HON ANDY LABONTE

Mersi Mr Speaker, ankor enn fwa. So, mon a dir byenveni PS Jean-Louis ki'n zwenn avek Mrs Nibourette. Kestyon 169 i lir koumsa;

Minis, ki bann dernyen devlopman an sa ki konsern fonksyon aktyel e fitir sant lazènes ki sitye dan distrik La Riviere Anglaise? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mr Speaker, desizyon in fini ganny pran pou remet sa sant avek SNYC. Bann teknisyen i ava travay lo son program lenplimantasyon, i pou bezwen ant Minister Lasante e avek Minister Lafanmir, Spor e Lazenés.

O pli vit posibil. Ki zot ava fer sa, nou ava kapab annan kominikasyon lo la. Mersi Mr Speaker.

MR SPEAKER

Wi, Onorab Labonte, ou siplemanter?

HON ANDY LABONTE

Mersi Minis pou ou larepons. Sa i en lespwar ki lazènes i pe espere. Petet an adisyonnèl avek sa Minis. Ki vedit napa en

ler spesifik ki zot in fini decide kan egzakteman.

Me eski ler sa sant i ganny retournen a lazenes, sa servis ki i pe donnen pou *Methadone* i pou ganny sorti konpletman dan sa sant? Mersi.

MR SPEAKER

Minis, repons?

MINISTER MARIE-CELINE ZIALOR

Mersi Mr Speaker. Wi, definitivman pou napa en sant *Methadone* la. e sirtou i pou annan bann lezot servis ki nou war nou bann zenn i bezwen, pou zot kapab epanouir e bouz ver lavan dan sa pozitivite ki nou a pe demann zot. Mersi Mr Speaker.

MR SPEAKER

Mersi Minis. Nou pas lo prosen kestyon e sa se 170, Onorab Kelly Samynadin.

HON KELLY SAMYNADIN

Mersi Mr Speaker. Avan mon poz mon kestyon, mon ti ava kontan mon osi pou swet bann ansennyan Lekol Au Cap, mon bann zanmi ansennyan, e mon bann ansyen koleg ansennyan en bonn fet ansennyan sa semenn.

Bonzour Minis avek ou delegasyon, e kestyon i lir *comme suivant*;

Eski Minister Lafanmir pe mazin travay konzwentman avek Minister Ledikasyon ek Minister pou Zafer Sosyal, an sa ki konsern swivi pour bann zanfan ki pa pe swiv program skoler obligatwar pour diferan rezon? Mersi.

MR SPEAKER

Mersi Onorab. Minis, ou repons?

MINISTER MARIE-CELINE ZIALOR

Mersi Mr Speaker. Sa kolaborasyon ant nou bann diferan Minister Mr Speaker, i deza la an plas. E sa lannen nou'n fer bokou progre, nou'n fer bokou rankont lo plizyer nivo. E zisteman nou dan staz diskrit sa proze avek Finans e osi avek *PSB*, pou nou ganny sipor lo en model en fason pou nou enplimant li.

E lentansyon se pou ed sa bann zanfan ek zot fanmir, e an menm tan pou nou siport Minister Ledikasyon e osi sipor Departman Sosyal. Mersi Mr Speaker.

MR SPEAKER

Siplemanter Onorab?

HON KELLY SAMYNADIN

Minis, mersi pou ou larepons. Eski ou kapab donn nou - petet pa atraver sif si ou napa, me petet en poursantaz, lo lakantite zanfan ki pa pe swiv ledikasyon *mainstream* si zot annan?

E answit, eski zot pe mazin entegre plis bann Sosyete sivil ki enplike dan devlopman lafanmir, pou angaz zot plis dan sa demars, pou ed nou bann zanfan ki pa pe swiv ledikasyon *mainstream*? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Bann sif i pou avek Minister Ledikasyon, Mr Speaker. Nou napa bann sif, nou, nou'n rann sa lapel, letan Ledikasyon ek Sosyal nou'n zwenn ki'n prezant sa bann defi devan nou.

E zisteman nou premye rankont boner sa lannen, ti avek tou Sosyete Sivil ki fer program pou bann zanfan. Sirtou program apre lekòl, program dan vakans e vwala kot Minister Ledikasyon i dir be zisteman anmenn li lo en nivo nasyonal.

E nou, nou pe donn en koudmen pou nou kapab

anmenn sa, dan en model pou nou kapab met li dan Bidze pou finans li, parey i sipoze fer pou anmenn li lo sa nivo. E sa ki pou fer, sa ki pou si oule pouse ki pou *drive* i pou sosyete sivil.

E mon ti a kontan atraver ou, mersi bokou Onorab pou sa kestyon, pou ki tou larestan sosyete sivil ki santi i anvi anmenn en koudmen, zot kapab anmennen.

E nou osi annan en program avek *First Lady*, kot i fer pou bann dimoun ki'n pran retret bann *nurse*, bann *teachers* ki vini zot osi volonter pou zot donn en koudmen nou dir zot mersi bokou.

E tou sa bann ki ti anvi donn en koudmen pou ed nou bann zanfan Sesel avek zot bann fanmir, zot byenveni. Mersi Mr Speaker.

MR SPEAKER

Mersi Minis. Onorab Larue ou annan en siplemanter?

HON FLORY LARUE

Mersi Mr Speaker. Bonzour Minis ek ou delegasyon. Bonzour tou dimoun dan lasal. Bonzour tou Manm piblik. Minis, lefe ki i ilegal pou en zanfan pa dan lekòl letan zot pe fer letid obligatwar, e zot ganny retire dan sistenm skoler pou nenport ki rezon.

Lobligasyon pou soutenir sa bann zanfan i tonm lo Gouvernman. Ki sa i en keksoz ki nou'n eksperyans pandan plizyer lannen dan nou pei.

Ki plan nou Gouvernman i annan letan *on our way forward* letan nou pe bouz devan, pou nou kapab ankadre sa bann zanfan? E ki program ouswa solisyon ki nou kapab anmennen pou sey aranz sa? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Zisteman, set aköz sa defi ki sirtou Departman Sosyal e Ledikasyon in anmenn kot nou'n dir be *ok*, annou pa met sa lo Gouvernman travay sakenn travay pou li.

Tou bann antite Gouvernman ki annan en rol pou zwe ladan, annou vin ansanm.

E pou nou kapab komans regarde ki mannyer nou pou fer sa. E sirtou mon a donn legzanp pou nou bann zanfan ki ganny nenport ki rezon i ganny sispann. E nou pa pe les zot zis al dan lakour, sa program i pou enkli ki zot annan program ki zot kapab swiv pou

zot kapab ede redres sa bann konportman ki zot annan.

E sa i pa zis Gouvernman ki pou vin avek bann solisyon. vwala aköz sa ki taler Onorab Samynadin in demande, i enportan. I bann Sosyete Sivil ki zot osi zot annan bokou resours e konesans ki zot osi pe anmenn bann program, ki byensir i ganny valide par bann *expert* dan Gouvernman.

Pou zot kapab donn en koudmen ansanm, pou nou kapab zisteman adres pandan sa bann plizyer lannen ki nou pa'n kapab fer naryen anmenn li lo en nivo nasyonal. E fer li ki i vin en sistenm formel. Mersi Mr Speaker.

MR SPEAKER

Mersi Minis, pou ou repons. Nou a pas lo prosen kestyon 171, 172, 173 nou'n reponn. 174, Onorab Phillip Arissol.

HON PHILLIP ARISSOL

Mersi Mr Speaker. Bonzour Mr Speaker. Bonzour Minis ek ou delegasyon. Bonzour bann etidyan dan Galeri. Minis, mon kestyon i lir koumsa; Eski Minis i kapab eksplik Lasanble ki fason son Minister pe travay pou edik zanfan e popilasyon pou angaz plis dan aktivite sportif avek bi pou redwir

problenm obesite an zeneral?
Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mr Speaker, zisteman Gouvernman in form en Komite Nasyonal pou travay lo en konpany kont obesite. E sa Komite degre nou pe pran sa size enportan, i pe ganny *chair* par Prezidan Larepublik li menm.

Atraver sa komite, i osi annan en lekip teknik ki pe finaliz zot plan aksyon. E zis pou lenformasyon Lasanble Mr Speaker, sa konpany pou ganny lanse la ofisyelman milye Oktob. E mon ti ava profit lokazyon, pou ankouraz tou bann Manm Lasanble pou partisipe. E i osi pou kwensid avek Lazournen Mondyal pou Manze ki *World Food Day*.

E nou a pe demann tou Seselwa, tou dimoun ki pe ekout nou sa zour la, i pou le 15 Oktob pou nou mark sa dat dan nou *dairy*, pou nou vin donn en koudmen pou redwir obesite dan nou pei. Mersi Mr Speaker.

MR SPEAKER

Wi Onorab Arissol, ou siplemanter?

HON PHILLIP ARISSOL

Mersi Mr Speaker. Mon siplemanter i koumsa; eski i annan okenn plan pou develop en Polisi alokasyon finansyel ouswa partenarya avek lezot setadir parey bann federasyon pou kontiny sa programm? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Vi ki *PS* Jean-Louis i osi lo sa komite, e bann kestyon teknik kot i konn lenformasyon. Mon ti a petet ek ou permisyon demann li pou reponn sa kestyon. Mersi.

MR SPEAKER

Mersi. *PS* ou annan laparol.

PS RALPH JEAN-LOUIS

Mersi Mr Speaker. Mersi Onorab. Bonzour tou Manm prezan. E en bonzour tou dimoun ki pe ekout nou. Sa *taskforce* ki'n ganny met an plas par Prezidan pou anmenn sa konpany kont obesite, i enkli diferan Minister Lasante, Ledikasyon e nou, nou *the leading one Youth and Sports*.

E pa bliye i annan Lagrikiltir parey Minis in

mansyonnen, ki li osi nou pe mazin annan Finans tou. E pe mazin osi lo kote nitrisyon, manze ki nou servi. E nou'n deside pou lans li dan sa semenn kot zot pe selebre *World Food Day*, pou montre ki manner sa 2 keksoz i relye ek kanmarad, *ok?*

E ler nou pe koz federasyon, li osi i annan son bann program ki i fer. Me selman sa nou pe koz lo en nivo nasyonal, ki nou pe anmenn en konpany ki pa pou zis 1 zour. Me sa zour i pou lansman kot pou annan diferan aktivite lo *Freedom Square*, kot bann diferan Minister, departman pe organiz bann diferan aktivite pou lans sa konpany.

E i annan bann lezot Minister, bann departman parey mon konnen kot nou Departman *Youth and Sport* nou'n anmenn li en pti pe pli lwen. Nou'n pran 1 zour pandan lasemenn, kot nou, nou fer li en devwar pou nou al fer *at least* en pti marse.

Annefe mon pe get lo Nasyon bomaten, mon war menm bann ledikasyon ki pe fer li pandan sa semenn *Teachers Week*, ki pe anmenn plis vizibilite ek montre dimoun lenportans pou nou lager kont obesite. I pou en konpany nasyonal, parey Minis in dir.

Nou envit zot pou zwenn nou dan sa konpany. Mersi.

MR SPEAKER

Mersi. wi, Onorab Norbert Loizeau ou siplemanter?

HON NORBERT LOIZEAU

Mersi Mr Speaker. Bonzour Minis. Bonzour tou bann etidyan. Bonn fet tou bann *teachers*. Mr Speaker, vi ki mon anvi demann Minis; Minis vi ki pou annan tou sa bann keksoz ki ou dir pou organize la, obesite laplipar bann zanfan zot annan en lakour, eski pou annan en program ki pou ariv kot lakour. Akoz i annan marmay kot lekol zot manz serten manze, me ler zot ariv kot lakour ki keksoz i sanze.

Eski pou annan bann program ki Minister pou organize, ki pou fer ki nou pou ariv kot lakour, devan laport bann fanmir pou kapab ede dan sa proses ki nou, nou anvi war arive? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Definitivman Mr Speaker. E mon kontan sa kekyon ki Onorab in demande. Akoz souvandfwa petet kekfw

nou vwar dimoun i fer *sports*, me selman i pa neserman kapab kontrol son pwa. Akoz i pa zis aktivite fizik, i balanse avek ou manze avek sa ki ou bwar, to lalkol osi i zwe en fakter ki fer monte pwa.

E sa i bann refleksyon e bann ledikasyon ki premyerman mon pa krwar nou bann dimoun i okouran. So, ansanm avek Minister Ledikasyon, nou kot NSC nou'n deza fini fer kolaborasyon avek Ledikasyon pou al dan lekol.

Sirtou akoz nou annan nou preski 30poursan nou bann zanfan ki annan problemn obesite dan nou bann lekol, kot pou ganny targete pou nou kapab fer desann.

E annou pa bliye osi, kot lakour nou annan osi tou plis ki 60 poursan nou bann madanm e plis apepre 70poursan nou bann zonn, ki annan problemn obesite dan nou pei. E definitivman sa i en keksoz ki pou kot lakour.

E se pou sa akoz zot pou remarke preski tou keksoz ki nou pe fer kot Minister i atraver bann lezot antite osi tou.

E ki nou annan en kantite bann diferan klip lentere, bann klip legzersis ki nitrisyon, ki nou'n fini zwenn. Ki nou'n komans vwar e sa keston ki Onorab Arissol in demande lo

kote Bidze, wi. Wi, nou pe konsidere pou nou met Bidze ladan pou fer. Akoz i en kriz nasyonal, i en kriz nasyonal ki nou tou nou bezwen donn en koudmen.

E mon ti ava profite pou lans lapel avek nou bann paran dan lakour, tou bann dimoun, pou letan atraver bann zanfan nou bezwen ganny atraver ledikasyon, atraver bann lekol e bann larestan bann adilt atraver Gouvernman Lokal, ki dayer zot ki pe *chair* pou fer sa lansman pou nou kapab fer zisteman sa bann aktivite ki ou a pe dir.

E ankore mon pou lans lapel, nou pe demann sipor avek led tou dimoun, pou nou kapab ede pou nou fer nou pep vin pli an bonn sante. Mersi Mr Speaker.

MR SPEAKER

Mersi. Onorab Esparon?

HON REGINA ESPARON

Mersi Mr Speaker. Bonzour Minis ek ou delegasyon. Bonzour bann envite dan Galeri. E bonn fet tou bann ansennyan. Mr Speaker, mon ti a kontan demann Minis ki kalite program petet ou Minister i kapab vin avek pou kre sa sinerzi dan bann Minister li menm li, pou ki i

annan sa program regilye. Pa zis la letan nou annan *FAO* dan milye Oktob.

Me pou annan sa program regilye, kot Minister *Sport* i ankouraz sa dan bann Minister pou ki zot annan en letan dan tou Minister pou bann *staff* kapab partisip dan en program swa sportif oubyen program legzersis? Mersi.

MR SPEAKER

Mersi Onorab. Minis, ou repons.

MINISTER MARIE-CELINE ZIALOR

Mersi Mr Speaker. Mr Speaker, mon pou dir mon vremen apresye ki bann Manm *LDS* i vremen konsernen. E zot pe demann bokou keston ek sizesyon lo sa kote latob. So, mersi bokou pou sa sipor.

E wi, Onorab Esparon, Mr Speaker atraver ou nou'n deza. E i annan Seksyon Spor Pou Tou kot *NSC*. I annan lorganizasyon parey *SCCA*, parey lapolis ki'n deza vini e komans fer mezir *BMI* zot bann travayer.

E pou zot kapab travay lo program ki mannyer pou fer desann pwa. En nenport ki lorganizasyon osi ki ti a kontan swete ganny sipor *NSC* e lezot

lorganizasyon osi tel ki; Lasante pou zot fer li. E nou, wi, nou pe al komanse nou pa ankor komanse, sa i en bon sizesyon avek Minister Lanplwa.

Pou nou kapab demande ki dan, aköz sa i en kriz nasyonal pou le moman, dan lanplwa letan ki bann dimoun i ganny ankouraze pou fer legzersis dan Minister nou'n fini komanse nou. Nou depi lannen pase, nou'n fini komanse.

E mwan mon *run* enn klib legzersis kot Sekretarya, nou fer legzersis tou le semenn nou vey manze tou. Nou pa pe zis koze, nou pa pe zis koze nou pe fer aksyon osi tou.

E Prezidan in fini avek *Cabinet*, pou demande ki tou Minis osi ki partou osi dan bann antite Gouvernman ler i annan bann reyon bann *meeting* sa kalite *snack* sa kalite manze ki nou anmennen nou bezwen, nou pou annan en Polisi. Nou bezwen fer sir ki i an bonn sante.

I annan en kantite diferan aksyon, e definitivman sa bann sizesyon nou *welcome* e mersi bokou pou zot sipor. Mersi.

MR SPEAKER

Mersi Minis. bon, an se moman nou zis pre avek 10er edmi. E in ariv ler pou nou kapab pran en

poz. E nou a pran en poz la, e nou a rebran ller. Mersi.

(BREAK)

MR SPEAKER

Mersi pou nou rebran travay. Nou'n ariv lo kestasyon 175 ki dan non Onorab Desheila Bastienne. Onorab, ou kestasyon.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis ek delegasyon. Bonzour tou Manm Onorab prezan e tou dimoun a lekout.

Mr speaker, mon kestasyon i al koumsa;

Eski Minis pour *Sport* i kapab dir avek Lasanble si son Minister pe konsider travay an partenarya avek Minister Ledikasyon, pou komans entegre diferan disiplin *sport* dan sesyon ledikasyon fizik, avek bi pou ankouraz bann zenn komans devlop lentere dan *sport* ki ozordi i deza lo nivo bann zwe enternasyonal, tel ki *petanque*, *handball*, *beach soccer* e plizyer lezot ankor? Mersi.

MR SPEAKER

Mersi onorab. Minis ou repons.

MINISTER MARIE-CELINE ZIALOR

Mersi Mr Speaker. Nou'n komans sa konversasyon avek Minister Ledikasyon, pou revwar ledikasyon fizik dan lekol dan son totalite Mr Speaker. E sa travay i enn ki pou se long, me a kour term atraver bann klib *ECA*, serten bann disiplin ki pa dan program skoler i deza pe ganny entegre dan serten lekol.

I annan osi plizyer klib, lasosyasyon ek Federasyon *sport* par egzanp laboks, ki pe osi travay an partenarya avek bann lekol segonder. E la mon ti ava profite, pou ankouraz bann federasyon tel koman *handball*, *petanque* e sa ki ou'n mansyonnen Onorab atraver ou Mr Speaker pou vin devan en apros *NSC*, pou vwar ki manner ek sa kolaborasyon avek Minister Ledikasyon, nou enkli zot osi dan bann klib *ECA*. Mersi Mr Speaker.

MR SPEAKER

Onorab Bastienne, ou siplemanter?

HON DESHEILA BASTIENNE

Mersi Mr Speaker. Minis, mersi pou ou leksplikasyon. Me mon ti a kontan demann ou Minis, vi ki dan lepase ti annan bann *liaisons officer* ki ti lyez avek bann lekol lo nivo serten *sport*

respektif ki zot ti reprezante, eski sa i ankor egziste? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mr Speaker, mon pa tro konpran kestyon. Si ou permet mwan petet pou onorab eksplik mwan *liaison officer*, kot *Sports* ouswa kot ledikasyon, petet i ava en pti pe pli kler?

MR SPEAKER

Onorab, klarifye?

HON DESHEILA BASTIENNE

Kot lekol zot ti entegre dan en kalite *sport*. E zot ti ganny sa *exposure* avek bann lekol, pou zot kapab anmenn sa lentere ki zot, zot fer egzaktaman sa *sport* konmsi pou anmenn li lo nivo lekol. Mersi.

MR SPEAKER

Minis ou...

MINISTER MARIE-CELINE ZIALOR

Mr Speaker, mon mazine kekfw sa i dan, i dan Minister Ledikasyon. Kekfw Minister Ledikasyon i pli byen plase pou li kekfw donn en pti pe leksplikasyon.

Me selman nou, nou'n zwenn sa dimoun ki ansarz *ECA*, ki ansarz program letid *sports*, ansanm avek Minis Ledikasyon pou nou kapab komans revwar en pe bann mankman.

Regarde ki mannyer atraver formel letid, e osi atraver akoz en kantite sa bann disiplin mon mazine apre lekol e dan bann *weekend* ki nou kapab travay lo la.

E i annan en dimoun, en dimoun ki dan Minister Ledikasyon menm ki fer. Si zot annan bann *liaison officer* mon pa tro asire. Petet kekfw Ledikasyon i ava kapab ede. Mersi.

MR SPEAKER

Mersi. Onorab Labrosse ou siplemanter?

HON RICHARD LABROSSE

Mersi Mr Speaker. Minis, mon pou zis fini kot, mon pou zis rebran kot Onorab Bastienne in kite, en? Zis pou mwan re-etablir sa kestyon ki mon krwar i ti pe sey redemann ou.

Letan nou, nou ti lekol parey Mont Fleuri segonder mon konnen nou ti annan Miss Williana Dubois ki ti ansarz - i ti travay kot Minister *NSC* sa letan. I pa ti kot Minister Ledikasyon li, en?

Son louvraz i ti fer sir ki tou bann aktivite sportif ki ti fer kot lekol Mont Fleuri Segonder nou lekol ti ganny enformen, marmay ti ganny sans partisipe.

So, *in fact* ki i ti pe sey demann ou la, si ozordi dan NSC i ankor annan en dimoun ki pe atase ek bann lekol, pou fer sir ki letan i annan bann aktivite sportif bann lekol pa ganny kit ater. E kekfwa sa dimoun osi i kapab vin sa *liaison officer* ant NSC avek Minister Ledikasyon, pou fer sir ki tou lede i lo menm semen?

Mon dezyenm kestyon Minis, ler nou pe koz lo bann *sports* parey nou'n koz lo *handball*, *beach soccer* e la tou dernyerman nou war *petanque* in vin en aktivite en pti pe popiler Sesel apre ki sa Mr *Madagascar* laba ti ganny sa meday lor. E kekfwa mon ava kapab demann ou Minis... eski – (non, son non i pa *parliamentary language* Onorab Loizeau.)

Minis, ki mon ti kapab demann ou la; eski i Minister la i annan en prosedir ki... ou'n dir ki lasosyasyon kekfwa in revin devan, eski zot annan en prosedir la ki zot pe revwar en pe sa 3 *sport* ki'n ganny nonmen, ki kekfwa dan bann prosen zwe ki vini, Sesel i kapab

war li fer en pti pe pli byen ki in fer la. Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Petet kekfwa bann detay lo disiplin, *PS* Jean-Louis i ava reponn. Selman zeneral, an zeneral stratezi kot NSC se sa li.

I pa vin en lazans travay koman en lazans al fer tou keksoz. I anpes nou *focus* lo bann devlopman, bann lezot travay par egzanp pou nou *maintain* nou bann lenfrastruktir, lezot keksoz ki annan pou fer avek *sports* e pou annan bon zesyon.

E pou anmenn modernite, pou anmenn profesyonnalizasyon dan *sport* ki nou bezwen fer an zeneral. Sa i bann federasyon, bann lasosyasyon ki pou ganny formasyon ki pe travay avek zot, pou zot kapab fer li bann klib. E i annan bokou ki fer byen, i annan ki fer vreman byen osi ki anmenn sa *sport*.

Selman i annan en Seksyon Spor pou Tou kot Mr Francis, Remy kot NSC ki li i fer sa lyezou ki annan pou fer avek Minister Ledikasyon. E si i annan bezwen - i annan mon

konnen wi ki fer swivi kot bann lekòl - zot fer bann swivi ki annan pou fer kot bann lekòl. Mon pa konnen kekfwa petet Mr Speaker, *PS* Jean-Louis avek ou permisyon i a donn en pti pe plis detay. Mersi.

MR SPEAKER

PS, ou a pran laparol.

PS RALPH JEAN-LOUIS

Mersi Mr Speaker. Mersi Minis. Mersi Onorab pou ou kestyon. Ofet parey Minis ti pe dir, dan bann lekòl i annan bann *sport* tradisyonnel ki ganny kouver dan *PE*. Me selman i annan bann lezot *sports* ki vini dan *ECA*. E i annan bann parey *handball* e sa i depan lentere son federasyon ki fer bann *course* pou bann *PE teachers*.

Apre zot annan sa kapabilite pou zot montre *rugby*. Montre *handball*, *rugby* en lot ki *test rugby* parey zot aple li ki ti annan bann formasyon pou bann *PE teachers*. E ki zot kapab entrodwir dan lekòl.

Nou annan menm parey Lasosyasyon *hockey*, ki'n donn bann *hockey stick*. Mon konnen kot lekòl Plaisance primer ou konn sa byen.

So, i annan osi lentere lo kote sa federasyon. Akoz sa i form parti *youth development*,

ok? Se zot ki drive sa, se sa federasyon ki *drive* sa. Parfwa i vre i pa ariv parey nou ti a swete, me i annan bann federasyon ki byen etabli.

Parey Foutbol i annan son bann *age group* pou tou sa bann pou foutbol anba 13an anba 15an, ki kouver tousala. Mersi Mr Speaker.

MR SPEAKER

Mersi *PS*. Mon annan kestyon Onorab Romain.

HON GEORGES ROMAIN

Mersi Mr Speaker. Bonzour Minis ek ou delegasyon. E tou dimoun a lekout bonzour.

Minis ler mon'n ekout kestyon Onorab Bastienne, mon war ki i en kestyon vreman enteresan. Me selman par kont letan nou regarde nou konnen poudir fitir *sport* nou bann atlet sorti dan lekòl.

E nou konnen letan i annan atletik le 29 Zen, nou war en kantite marmay ki partisipe. I annan marmay i fer byen, me selman apre ou pa tann naryen ankor ki arive ek zot.

Alors, mon kestyon mon bezwen... parey *PS* fek fer sorti, bann *PE teachers* kekfwa zot ganny *training*. Mon kestyon, nou konnen i annan bon pe bann konsiltan ki vin Sesel pou

ankadre bann kekfwa atraver NSC ki donn bann *training*. Mon konnen foutbol tanzantan ou vwar. Eski zot pe mazine oubyen zot travay ek Minister Ledikasyon, eski zot pe mazin travay ek bann *PE teacher* ki zot osi zot kapab ganny sa bann *training* ek sa bann konsiltan?

Kantmenm pa zot tou, selman *at least* en group ki ava kapab ganny sa *training* en pti pe lo nivo enternasyonal ki a kapab pas sa ek nou bann zanfan? Mersi Mr Speaker.

MR SPEAKER

Mersi.

MINISTER MARIE-CELINE ZIALOR

Mersi Mr Speaker. Definitivman, *training* pou bann *PE teachers*, pa zis *PE teachers* menm nou bann zofisye kot NSC osi nou i bezwen fer formasyon. Nou plan lannen prosenn se pou annan en kantite formasyon. Nou pe met larzan dan Bidze pou nou kapab fer sa.

E nou deza annan bann korperasyon enternasyonal ki'n pare pou ede pou nou kapab ganny sa bann formasyon pou nou bann...

E nou'n vwar poudir i annan en kantite lannen in ganny neglize, napa formasyon.

Si i annan, petet kekfwa i en pti pe demode, i pa dan loptik kot *sport* in bouze. Mon ti ava kontan Mr Speaker osi tou, i annan en bout mon'n manke lo sa kestyon Onorab Labrosse - poudir lanfaz osi apre osi letan nou pe fer bann analiz, ekout bann *experts* labaz tou *sports* i annan serten labaz.

I annan serten disiplin ki li i labaz tou *sports*. Parey ou'n mansyonn atletik i enn. *Gymnastic* osi i en lot ki labaz. E nou, nou bezwen kalkile dan lekol primer sirtou, ki mannyer sa bann lantrennman i anmenn fer labaz ki donn bon teknik, ki donn bon latitid, devlopman ensidswit ek nitrasyon.

E letan prezan bann federasyon, lasosyasyon pou annan zot program *youth development*, *grass roots* tousala, e bann tes osi ki merit pe ganny fer avek bann zanfan ki enterese ek *sports*, bann zenn, pou zot kapab pli byen ganny gide dapre zot latitid kote zot pou ale.

E sa pou mezire, NSC nou'n fini ganny lekipman pou nou kapab fer. La nou bezwen *train* pou servi, *train* bann dimoun bann lantrennman. So, definitivman valab, pou en valab Mr Speaker pou nou fer. E PS Jean-Louis Mr Speaker

avek ou permisyon i annan en pti pe plis detay. Mersi.

MR SPEAKER

Wi PS.

PS RALPH JEAN-LOUIS

Mersi Mr Speaker. Mersi Minis. Onorab, pou kontinyen lo ki Minis pe dir an se moman nou annan bann dimoun *CONFESJES* ki nou osi pe diskite posibilite pou ed nou form nou bann *PE teachers*, pou donn zot plis bagaz pou zot kapab delivre.

E pou anmenn sa evolisyon dan *sports* ki nou, nou anvi war. E o paravan nou'n annan menm diskisyon avek Minister Ledikasyon kot zot anvi annan en kour *Diploma in Physical Education* kot *SITE*, ok?

So, sa bann diskisyon ki nou annan akoz nou konnen poudir nou bezwen atrap nou *sport* si nou anvi fer progre. Se nou komans a labaz *sports* se dan lekòl atraver nou bann *PE teachers* ki'n byen formen. Mersi Mr Speaker.

MR SPEAKER

Mersi. Kestyon Onorab Labonte.

HON ANDY LABONTE

Mersi Mr Speaker. Mr Speaker, mon kestyon ti pe al en pe lo formasyon bann *PE teachers*, ki PS Jean-Louis in touse. Me petet in *term of* bann - ou konnen lontan bann lekòl segonder nou ti annan bann *sort of* rezyonnal kot ti annan bann *sport* apre lekòl parey nou'n tann nonmen *ECA*.

Eski Minister Ledikasyon ek *Sport* zot pe mazin travay ansanm ki nou kapab annan sa bann rankont parey ki apre lekòl, ler i fini i annan ki nou annan bann pti konpetisyon *inter school or* lo kote rezyonal.

E la mon ti a kontan pran sa lokasyon pou mwan felisit PS Jean-Louis avek son lekip, ki pe fer travay vreman ekselan lo kote *sport* dan Sesel. Mersi.

MR SPEAKER

Mersi Onorab. Minis, ou repons?

PS RALPH JEAN-LOUIS

Mersi Mr Speaker. Mersi Onorab pou bann mo lankourazman. Mon la pou servi tou dimoun, tou pep Seselwa e tou ki bezwen led. Si nou travay ansanm dan pozitivite nou pou ariv devan, nou pou ariv lwen.

Onorab, ofet pa tro lontan pase ti annan konpetisyon *volleyball* ki ti ganny organize

konzwentman ant Minister NSC e Minister Ledikasyon. E byento ankou dan detruwa semenn pou annan *basketball*. Foutbol nou konnen i *ongoing*, i annan sa *Premier League* i annan diferan konpetisyon ki ganny fer, *ok*.

E lo kote atletik i annan *kids athletics* osi ki kouven sa bann konpetisyon pou bann zenn apart bann ki deza egziste. So, i annan bann posibilite e bann nouvo keksoz ki nou pe anmennen sirtou ki sa linisyativ NSC ki'n komanse avek *basketball*.

E byento, *sorry* nou pM komans avek *volleyball* e byento zot pou fer en konpetisyon *basketball* ki zot ti fer Sanmdi, bann *one day tournament*. Ki anmenn bokou leksitasyon, e motiv bann zenn pou partisipe. Mersi.

MR SPEAKER

Mersi PS. Kestyon Onorab Arissol. Sandy, terminen. Kestyon Onorab Michel Roucou.

HON MICHEL ROUCOU

Mersi Mr Speaker. Bonzour Minis, PS. Minis, annefe mon kestyon ti pou al en pti pe lo bann *PE teacher*. Me selman in ganny demande, me selman dan sa menm larepons ki ou'n donner, Minis en pti petet si ou

kapab ankouraz en pti pe avek devlopman bann lekol si i kapab annan bann lenfrastruktir *sport*.

Zis parey mon vremen apresye ki mon'n war Onorab Monthy dan son distrik kot lekol primer ti napa en laplenn foutbol. E la bann zanfan pe ganny en nouvo laplenn foutbol pou fer sir ki lamazorite lekol dan pei pou ankouraz bann aktivite *sport* kot lekol, pou fer sir ki i annan bann lenfrastruktir. Mersi.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker. Sa kestyon lenfrastruktir, i reste enn bann defi ki nou annan kot *sports*. E kot bann lekol, bann lekol i sorti dan Bidze MINISTER Ledikasyon pou aranz lenfrastruktir sportif.

Me selman i pa anpes nou, nou pe regarde avek bann negosyasyon, ki kapab ganny fer avek bann klib, bann federasyon, bann lasosyasyon pou zot donn en koudmen pou regarde si zot pa kapab vin adopte.

Nou'n komans bann kozri pou regarde ki mannyer nou kapab fer. Byensir Mr Speaker,

i tou depan lo Bidze e apre lo kapasite NSC pou nou kapab fer sa. Me selman i en bon propozisyon, e nou pe konsidere. Mersi Mr Speaker.

MR SPEAKER

Mersi. Onorab Esparon?

HON REGINA ESPARON

Mersi Mr Speaker. Mr Speaker, mon kestyon ti lo lenfrastriktir. Me selman mon a profite pou demann Minis, petet nou kapab konsider lenfrastriktir lo en baz rezyonal pou komanse.

E la parey nou annan *beach soccer* ki pou annan en tournwa lannen prosenn isi, konmsi dan sa loptik kwa ki nou pou kapab fer pou ki nou *empower* en pti pe lo bann marmay lekol pou partisip dan *beach soccer*? Mersi.

MR SPEAKER

Mersi. Minis. ou annan en sizesyon la, ou ti a kontan adrese?

MINISTER MARIE-CELINE ZIALOR

Wi. Mersi bokou Mr Speaker. Wi, sizesyon e zot pou vwar dan Bidze 2024 ki pe vini, i annan plan konpreansiv lo lenfrastriktir ki nou ti napa avan, akoz nou ti napa kapasite. Nou'n bezwen al rod

en kantite sipor avek Lazans Lenfrastriktir, pou nou kapab annan en plan konpreansiv pou nou kapab fer egzakteman sa sizesyon. Mersi bokou Onorab pou ou sipor e sizesyon.

MR SPEAKER

Mersi Minis. Nou a pas lo kestyon 176, Onorab Wavel Woodcock.

HON WAVEL WOODCOCK

Mersi Mr Speaker. Bonzour Minis ek ou delegasyon, tou Manm e tou dimoun a lekout. Minis prezant mwan pou mwan avan mon komans mon kestyon, an vi ki mon pe koz lo *judo* pou mwan prezant mon senser kondoleans avek lafanmir Mervin Joubert en ankadre en *coach judo* ki'n ankadre bokou nou bann zenn Praslin.

E in osi en *ex DA*, e in travay avek NSC pou environ, environ 15an. Mr Speaker, mon kestyon i konm swivan;

Eski Minis i kapab enform Lasanble, kan ki proze pour *Judo Dojo*, fasilite laboks ek karate kot *ex-STC warehouse* o bor Lekol Grand Anse Praslin primer pou konmanse? Mersi.

MR SPEAKER

Mersi. Minis ou repons.

MINISTER MARIE-CELINE ZIALOR

Mersi Mr Speaker. E mon osi de lapar nou lofis e kot *NSC*, nou prezant kondoleans avek lafanmir *judo*.

Mr Speaker, zis apre desizyon ti ganny pran boner sa lannen, pou *allocate* sa landrwa ki ti pou *STC* pou *sport*. Nou ti al fer vizit ansanm avek *SIA*. E lot faz sete pou fer *meeting* fer renyon avek kominote *sport* lo Praslin pou deside ki bann disiplin pou enkli dan sa proze. Nou pa ti zis anvi ale fer sa nou menm.

E byento Mr Speaker, sa i ava ganny fer. E Lazans Lenfrastriktir i ava ganny tou lenformasyon pou li fer sa ki nou apel en *scope*. E osi evalye son Bidze, evalye son kou pou nou ganny Bidze kot nou ava diskit avek Finans pou vwar kan ki i posib depandan lo Bidze byensir pou demar sa proze. Mersi Mr Speaker.

MR SPEAKER

Wi, siplemanter Onorab?

HON WAVEL WOODCOCK

Mersi Mr Speaker. Minis, sa proze i en langazman ki'n ganny fer a 3 repriz par Prezidan Larepublik. Annefe i ti fer sa langazman dan 1 son vizit ki i ti fer lo sa sit. Dezyenmman dan

meeting piblik Grand Anse Praslin. E trwazyenmman dan seremoni pou rekonpans bann atlet Zwe de Zil, sirtou kot i konsern sa fasilite sa *dojo*.

Annefe Praslin ozordi nou annan nou plis ki en santenn atlet Judo Grand Anse avek Baie Ste Anne e tou lede landrwa kot zot pe fer *judo*, kot vye karnegi Baie Ste Anne e kot ansyen *library*.

Tousala i bann fasilite ki'n vreman ordeta. E mon konpran en pti pe irzans sa proze, e ler sa lanons ti ganny fer in donn bokou lespwar bann atlet *judo* lo Praslin.

Mon pa konnen ki lannen zot pe mazine ki sa proze pou materyalize. Me petet mon rapel dan le pase ti annan serten diskisyon pou rod bann *funding* enternasyonal pou *fund* en de sa bann proze bann fasilite lo Praslin. Petet pou sa *dojo*, or *obviously* ki i annan bann lezot fasilite parey laboks ek karate.

Petet si Minis osi pe konsider get a leksteryer pou ganny finansman pou sa proze. Akoz sa i en proze ki nou vreman bezwen lo Praslin.

Par lefe ki *most* bann atlet bann *judoka* ki'n reprezant Sesel lo nivo enternasyonal, i sorti Praslin; e i mank zot sa bann fasilite nesesser, e sa i osi

enkli laboks ek karate osi Minis. Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mr Speaker, atraver ou mon anvi afirm langazman Gouvernman, avek Onorab Woodcock, e avek tou nou bann atlet Praslin, tou nou bann atlet Praslin pou fer zot konnen ki nou langazman i reste, nou langazman i vin pli for.

E son sizesyon pou nou al rod finansman aryer nou ava pran konsiderasyon.

Me selman dan Bidze Gouvernman, nou pa'n obliy Praslin e La Digue nou. Nou pa'n bliy zot, e ler mon pe dir *scope* akoz nou pa konnen konbyen i pou koute. I pa anpes nou fer par faz, nou kapab regarde posibilite fer par faz e regarde osi.

E pa bliye nou annan osi nou bann dimoun dan nou kominote, ouswa nou annan bann larestan antite ki pare pou siport.

La mon kontan nou pe ganny bokou sipor pou *sports*, pou nou kapab tap laport rann lapel pou nou kapab fer. Me selman akoz sa landrwa i ankor

vid, i ti en *warehouse*. Nou pou bezwen Lazans Lenfrastriktir premyerman. Les li fer sa travay, les zwenn avek kominote sportif pou konnen enn fwa pou tou.

Nou pa fer parey avan taye fer keksoz apre nou vwar in mal mete, in mal met plafon, ou ganny difikilte nek i koule. Nou bezwen regarde egzaktman ki kalite disiplin osi nou pou fer.

E i annan osi bann lasosyasyon parey lasosyasyon enternasyonal, mon konnen pou *judo* e mon konnen osi pou *handball*, kot zot in montre lentere pou ed Sesel ek lenfrastriktir.

Definitivman tousala i posib, e mon pou dir ek bann atlet Praslin gard lespwar. Nou konnen zot fer Sesel fyer en kantite fwa, gard lespwar poudir nou annan en plan solid 2024 pou nou omwen kapab komans en keksoz Praslin. Mersi Mr Speaker.

MR SPEAKER

Mersi Minis. Onorab Loizeau wi, en kestyon?

HON NORBERT LOIZEAU

Mersi Mr Speaker. Bonzour Minis ankor enn fwa. Minis parey ou konnen mwan *sport* i en pti pe pre o bor mon leker mon osi. Ler mon pe get kestyon

Onorab Woodcock, depi ler mon ti ankor dan 4enm Lasanble, Onorab Baie Ste Anne Praslin sa letan ti Mrs Mitcy Larue. I ti vin avek en Mosyon pou *dojo* avek dortwar pou bann...

Vi ki lo zil zot popiler avek *Judo*. Depi ki ou'n koz lo lezot *sport* osi. Vi ki ou pou fer *dojo* apre lezot *sport* pou le en keksoz zot osi. Mwan mon kestyon mwan, dan 4enm Lasanble mon ti fer sorti; eski ou pa panse i pou pli fezab pou nou fer en *multi-purpose gym*.

Parey *Victoria Gymnasium*, bokse pe fer pou li a kote an menm tan i servi sa gym ler i annan konpetisyon pou met *ring* kot dimoun i kapab. E karate i fer ladan, bann konpetisyon.

Kot i kapab anmas tou *sport*, pa zis enn. Akoz ler nou pou fer *dojo*, apre lot pou le enn, lot pou le enn. Konmsi nou fer en keksoz en sel kou ki kapab anmas tou sa *sport*, apre pli tar si fodre fer lezot keksoz la nou a fer. Sa mon propozisyon. Mersi.

MR SPEAKER

Mersi. Minis ou repons.

MINISTER MARIE-CELINE ZIALOR

Mersi Mr Speaker. Zisteman Mr Speaker, se sa rezon akoz nou anvi fer sa *meeting* pa zis avek

Judo avek Karate. Me avek tou bann disiplin. Menm bann kekfwa ki nou pa'n mansyonnen, bann diferan disiplin lentere ki annan Praslin avek zot e pou nou ansanm nou pa oule fer keksoz nou tousel;

Ansanm avek zot fer konsiltasyon, regarde ki kalite disiplin nou kapab mete koman en *multi-purpose* ki plizyer disiplin i kapab servi.

Me mon anvi dir Mr Speaker, ki, Praslin i en *venue* i en landrwa kot nou pe kalkil bann konpetisyon enternasyonal.

Akoz par egzantp, akoz bann *judoka* Praslin i vremen perform tre byen zot *sports* e i en *sports* popiler lo Praslin ki nou pa kapab fer par egzantp en konpetisyon enternasyonal Praslin e nou bezwen annan en fasilite ki lo sa standar ki nou ava kapab fer.

Vwala, akoz nou ape esper sa scope pou nou kapab zisteman pran konsiderasyon sizesyon Onorab Loizeau Mr Speaker. Mersi.

MR SPEAKER

Mersi. Nou pas lo prosen kestyon. Mon annan kestyon dan non Onorab Wilbert Herminie, me i pa dan lasal. Alor nou a pas lo son kestyon.

E mon a pran kestyon 180, Onorab John Hoareau.

HON JOHN HOAREAU

Mersi Mr Speaker. Mr Speaker, mon kestyon i lir koumsa;

Vi ki laplenn foutbol Beau Vallon pa pe ganny sa latansyon nesese pou ki i reste a en bon nivo pou bann foutboler servi, eski Minis pour *Sport* i kapab enform Lasanble ki plan Gouvernman pou sa laplenn? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Nou'n antre an partenarya avek Beau Vallon *Football Club*. Parey mon ti'n dir oparavan dan en larepons mon'n donner, nou pe ankouraz bokou sa bann partenarya. Partenarya pou mentenir sa laplenn.

E pli tar lafen Oktob, nou pe ekspekte konplet renovasyon lo fasilite twalet. E sak fwa mon ganny lokazyon Mr Speaker, mon lans lapel ankor avek bann klib sportif pour nou vini pou apros NSC, pou nou kapab regarde ki mannyer nou adopte bann laplenn, e kot NSC i kapab fer en bout.

Me osi rezon mon dir sa akoz Mr Speaker se i annan *ownership* letan i annan sa. E bann dimoun ki donn lanmen mentenir swen laplenn, swen en *court*, zot donn lanmen veye osi pou anpes vandalizm pou arive. So, sa i pe ganny fer Mr Speaker. Mersi bokou.

MR SPEAKER

Wi, Onorab Hoareau, siplemanter?

HON JOHN HOAREAU

Minis, mon ti a kontan petet demann ou konfirmasyon lo la, an vi ki nou'n deza demann pou met lalimyer pour bann foutboler kapab *practice* en pti pe ziska en pti pe lo tar; eski sa demann i pou kapab ganny materyalize pour sa lannen? Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Pour bann detay mon ti ava petet kontan ki Ms Nibourette i pran laparol. Mersi Mr Speaker.

MR SPEAKER

Tre byen. Ms Nibourette?

DG GYRA NIBOURETTE

Mersi Mr Speaker. Mersi Minis. Onorab, i annan sa diskisyon ki'n ganny fer avek sa klib, kot pe gete ki mannyer nou kapab asiste zot. Akoz letan zot ti vin devan, i annan serten keksoz ki zot in pare pou zot fer. E lalimyer i enn parmi ki zot ti pe rod *funding*. Me selman si zot bezwen okenn lasistans, NSC li i sipoze revwar *toilet facilities* an antye.

Aprè ti pou koup bann *overhanging* pye dibwa lo la, ki'n fini ganny fer. Aprè zot pe get lo aranz sa laplenn, tal li. Sa klib ti annan nide pou zot sey gete si zot kapab fer li en pti pe pli plat, akoz i annan bann trou.

Me selman apard sa i annan en kolaborasyon *between* sa 2 – sa Federasyon avek NSC. I pour sa lannen. *Anytime* i sipoze fini akoz parey Minis in dir, *by* lafen Oktob *toilet facilities* nou pe mazin fini. Dek ki *toilet facilities* i fini, sa laplenn pou kapab konmans ganny servi, si zot pou'n fini met zot lalimyer. Mersi.

MR SPEAKER

Mersi. Byen, nou a pas lo prosen keston 181, Onorab Georges Romain?

HON GEORGES ROMAIN

Mersi Mr Speaker. Minis mon keston lir koumsa;

Etandonnen ki Sesel pe depans bokou lo renovasyon fasilite sportif dan pei pou elev nivo *sport* e fer ki nou a kapab atir konpetisyon enternasyonal dan nou pei, eski Minis i kapab dir Lasanble si son Minister i annan okenn plan pou ouver nou fasilite sportif avek lezot pei, pou vin fer serten program lantrannman, e an retour sa a kapab ede pou anmas en reveni pou al anver mentenir nou bann fasilite sportif? Mersi Mr Speaker.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mr Speaker, mon pa krwar nou'n ariv sa staz sitan avanse ki Onorab in dekrir, pou nou konsider ranmas reveni la avek nou bann lenfrastruktir.

Nou priyorite pour lemoman se pou met nou bann lenfrastruktir dan en bon leta. Nou tou nou konnen, nou vwar dan ki leta zot ete. E nou anvi fer sa premyerman pour nou kominote sportif lokal avan.

Me selman, aprè ki nou'n akonplir sa, nou ava pran sizesyon - Mr Speaker, ki

Onorab Romain in met devan konsiderasyon. E mon ti ava dir li mersi bokou pour sa sizesyon. Mersi.

MR SPEAKER

Mersi. Onorab Romain, ou annan siplemanter?

HON GEORGES ROMAIN

Mersi Mr Speaker. Minis, mersi pour ou larepons. Minis rezon mon'n anmenn sa kestyon i ki parey ler ou regarde, mon'n fer en pti pe resers, bokou bann pei Lerop, bann tim profesyonnel zot kontan al dan bann pei letan kot klima...

Parey nou konnen *Dubai* tanzantan – *ok, Dubai* pa tonm dan Lafrik. Be selman bokou bann *Premier League* ennler, par egzanp zot al dan bann pei laba. Zot al en semenn *training*. Menm *Tanzania* bann tim *Premier League* in ale pour bann *pre-season training*. Bann *friendly game* tou zot fer.

E la nou konnen ki Sesel pe al *host World Beach Soccer* ki en gran *achievement* pour nou Sesel. E rezon mon demann sa kestyon Minis i aköz osi sa i pou ouver Sesel, ler nou pe koz *sport tourism*.

E mon konnen nou pe depanse lo nou bann lenfrastruktir, wi. I pa pou la toudswit. Me selman sa ti en

kestyon kekfwa pour dan lavenir ki – aköz menm i annan dimoun ki pe reste Lerop, spesyalman Langleter, in fer resorti kot i kapab ed Sesel pou anvoy sa bann tim profesyonnel Sesel.

E alors mon pe mazine si ou Minis, i kapab pran sa an konsiderasyon kekfwa parey in dir, dan le fitir. Mersi Mr Speaker.

MR SPEAKER

Wi, Minis ou ti a kontan reazir lo sizesyon Onorab Romain?

MINISTER MARIE-CELINE ZIALOR

Wi, mersi Mr Speaker. Annefe nou osi nou'n gannyen kantite demann. E mon konnen poudir *PS Roucou*, sirtou atraver son lofis, mon ti ava permet kekfwa Mr Speaker ki i donn en pe legzanp. Mersi.

MR SPEAKER

Mersi. *PS* pou koze?

PS RALPH JEAN-LOUIS

Mersi Mr Speaker. Mersi Onorab pour ou kestyon. Ofet ler nou ti vizit Sidafrik an Avril, ti annan en Klib *Rugby Sharks* ki ti vreman, vreman enterese pour vin fer zot *pre-season* la an Oktob. Me malerezman nou

napa laplenn pou donn zot pou *train*. So-

Dan lepase mwan mon mazine ti annan – mon rapel ti annan menm *National Team La France* pour *Swimming* ki ti vin Sesel pou vin fer *training camp*. E nou kapab replik sa nou.

Me selman nou bezwen fer sir nou bann fasilite i annord. Nou bann fasilite i *up to that standard* pour sa bann atlet profesyonnel ki zot kapab servi.

E parey ou'n dir tre korekteman, sa i *sports tourism*. Sa i anmenn reveni pour pei. E sa i en *area* ki nou vreman enterese avek Onorab. Mersi Mr Speaker.

MR SPEAKER

Mersi. Onorab Roucou?

HON MICHEL ROUCOU

Mersi Mr Speaker. Mr Speaker, si Minis i kapab dir nou, an vi ki nou pe fer bokou renovasyon lo nou bann fasilite *sport*; eski zot annan en plan ki nou pa war nou *in the end* dan le fitir, nou pe retourn an aryer pou nou al fer bann gran renovasyon lo sa bann fasilite *sport* dan pei?

E osi an term lo kote *maintenance* lo bann fasilite *sport*, si nou kapab petet fer sir pou ki bann ki nou deza annan, espesyalman dan nou distrik. Si ou pas laplenn Mont Fleuri,

ler bann zerb i ganny koupe, i ganny koup zis dan milye.

Be avek bann fil ou war poudir pli ale bann vezetasyon pe vin pli gran; ki bann dimoun ki pe fer sa bann louvraz *maintenance*, zot donn nou en servis lo nivo ki sa i kapab ed nou bann tim *sport* ki deservi sa bann fasilite. Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mr Speaker, mon ti ava kontan garanti Onorab poudir nou'n met bokou lanfaz sa bann detrwa mwan pou nou regarde – kekfwa apre Ms Nibourette i ava donn detay, pou nou zisteman...

Parey mon'n mansyonn lo kapasite avan. Kapasite lo kot zesyon *sport* ensidswit. Nou *capacity* osi pou nou zer nou bann lenfrastriktir osi, nou annan defi. En kantite. E mon krwar mon'n deza vin dan sa Lasanble detrwa fwa, pou mwan eksprimen ki kantite defi i annan lo sa, pou nou kapab zisteman met sa an aplikasyon.

E i osi tou – dimoun i krwar petet kekfwa i en topik ki pa ase profesyonnel. I profesyonnel li. Mwan mon'n al

vizit *Côte d'Or* Moris, e sa *Manager* laba nou'n koze lo zot plan ki mannyer pou mentenir bann lenfrastriktir parey ki nou, nou pou annan.

E nou a pe rod sipor avek led nou osi, aköz annandler nou pa konnen ki nou pa konnen, e nou fer bann fot. Nou bezwen pe fer sa pou nou kapab konnen. Nou pe met larzan dan Bidze ladan pou nou kapab zisteman annan...

I annan - par ler kekfwa petet dimoun pa'n konpran. I annan 2 diferan travay ki ou fer avek lenfrastriktir. I annan kot ou bezwen renovasyon kot in ariv son ler. Parey *tartan track*, i sipoze son *lifespan* i 15an. Be in ariv preski 30an, ou pe ekspekte i koumsa.

Tou *maintenance* ki ou pou fer pa pou marse sa. Ou bezwen fer renovasyon. Pou nou konnen osi tou bann lenfrastriktir ki nou'n fer atraver lazans ki pou dir nou konbyen lannen.

Nou bezwen gard en rikord konbyen lannen sa lenfrastriktir pou tenir - prenan kont tou, klima Sesel e limidite ek tou sa. E apre prezan pou kapab fer li petet al en pti pe pli lontan, ki bann *maintenance*?

Sa la, i bann enzenyer. I bann louvraz en pti pe teknik ki nou kot *NSC*, nou napa sa

kapasite prezan pou nou kapab al fer. Me selman lo kote ou sizesyon pou mentenir la lo sa bann lenfrastriktir distrik ki nou annan, mon ava...

Mon konnen aköz en pe travay in ganny fer, lo ki mannyer nou pou fer pou nou aranz sa, espesyalman pou lev lo standar ki apropiye.

Petet kekfwa Ms Nibourette i ava kapab donn en pti pe lenformasyon, Mr Speaker. Mersi.

MR SPEAKER

Mersi. Wi, Ms Nibourette?

DG GYRA NIBOURETTE

Mersi Mr Speaker. Mersi Minis. Onorab *with regards to* bann *maintenance* dan distrik, mon krwar bokou zot, zot pou'n war poudir sa kolaborasyon ant distrik avek *NSC*, pe mars en pti pe bokou mye sa lannen, kot i annan sa diskisyon.

Me selman pou reasir zot, *NSC* in fini son prosedir pou *recruit* en *Senior Project Officer*, ki li i pou pas dan tou distrik kot *NSC* i annan bann lenfrastriktir. Regard sa bann lenfrastriktir dan ki leta zot ladan. *Come up* avek en plan. Fer en *costing* ki i prezan nou pou kapab faz li.

Me selman nou le zot korperasyon pou ganny en

konpran poudir, Bidze par ler i pa permet nou pou fer en kantite ki nou anvi. E se sa ki nou tap laport bokou fwa bann biznes, bann diferan dimoun *out there*, pou ed nou avek enn de bann renovasyon.

Me selman sa dimoun i sipoze antre tre byento, kot i pou kapab fer sa legzersis pou nou annan en plan konpreansiv. Pou nou kapab konnen kote ki pli mazer, kote ki nou bezwen konmanse, kote ki pli priyorite. Mersi.

MR SPEAKER

Mersi Ms Nibourette. Ou annan kestyon, Onorab Clifford Andre?

HON CLIFFORD ANDRE

Mersi Mr Speaker. Bonzour Minis avek ou delegasyon. Minis, mon ti a kontan, anvi ki repons ki'n ganny reponn in koz lo *sports tourism* osi e lenfrastriktir;

Mon ti a kontan demann ou ki ou Minister pe fer, pou ankouraz bann spor ki pou anmenn *sports tourism*, me ki pa bezwen lenfrastriktir.

Par egzanp; *skydiving*, *paragliding*. Konmsi bann *sport* ki koumsa, so ki nou kapab posibleman ganny en reveni avek sa bann kalite *sport*, pou ed nou pou nou met nou

lenfrastriktir alaoter. Ki i a kapab deservi sa kestyon ki Onorab Romain in demande. Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Nou ti annan en *meeting* avek Departman Tourizm sa lannen, e nou'n koz lo la. E nou bezwen regard osi letan nou pe koz lenfrastriktir, nou koz lenfrastriktir an term batiman. I annan lezot lenfrastriktir.

Par egzanp i annan bann lezot keksoz ki pran plas – ki pran plas, ki bezwen ganny devlope pour nou kapab fer sa. Par egzanp, si i annan serten regilasyon ki nou napa, ki nou bezwen al devlope, pou nou les serten bann aktivite ganny fer.

Sirtou dan bann ka kot nou pa'n fer li oparavan. Nou bezwen regarde osi tou – si nou ki pe *host*, eski nou annan sa mo kapasite?

Mon pou kontinyelman koz lo la aköz nou pou bezwen regarde osi tou ki nou bezwen annan kapasite. Ler par egzanp mon'n gete rapor, analiz, *post-mortem FINA* Konpetisyon. Menm ki nou'n fer detrwa fwa sa *FINA Open Water*, i annan en

kantite defi - kantite defi. I annan bann lenfrastriktir i pa depan lo zis...

Par egzanp, lo kote *safety*. Ler nou pe koz lo *water sports*, nou ti ganny en pti *scare* avek *FINA Open Water*. Nou bezwen regarde bann lezot fasilite ki pa zis kot Minister Lazenés *Sports* ek Lafanmir, me selman bann lezot landrwa.

Par egzanp; si ou annan en gran kantite delegasyon ki pou vini, ou bezwen annan akomodasyon. Sa ti en gro defi pour nou ganny akomodasyon.

Dezyenmman ou bezwen pe regard si ou kapasite lopital – si an ka i annan fer krwar mon pa konnen, *outbreak* lafyev ki ou bezwen kapab – ou bezwen kapab *cater*.

So i pa depan lo zis lenfrastriktir *building*. I tou sa bann keksoz ki *PS* ansanm avek son koleg *PS* kot Tourizm in diskite. E zot sipoze vin avek en plan 2024 lo kwa ki nou kapab konmans avek.

Parey ou pe dir, sirtou bann kot nou pa bezwen batiman li menm. Me regarde kwa ki kapab ganny fer, ki kapab ganny devlope pour nou kapab fer en pe. E anmezir nou ale, nou kapab *bid* lo la. Mersi Mr Speaker.

MR SPEAKER

Mersi Minis. Nou a pas lo prosen kestyon 182, Onorab Georges Romain?

HON GEORGES ROMAIN

Mersi Mr Speaker. Minis mon kestyon i lir koumsa;

Swivan sa *forum* an Mars kot Lotel *Savoy* pou revwar lafason ki sport lo nivo kominote i kapab ganny relanse, pou ed lazenés e ankouraz aktivite fizik parmi popilasyon;

Eski Minis i kapab dir Lasanble, ki son Minister pe fer pou bouz sa azanda lo nivo kominoter pou ki nou a vwar sa lide ganny materyalize? Mersi Mr Speaker.

MR SPEAKER

Mersi Onorab. Minis, repons silvouple?

MINISTER MARIE-CELINE ZIALOR

Mersi Mr Speaker. Mr Speaker, apre sa *forum*, *NSC* in zwenn avek Gouvernman Lokal e lezot partener, e diferan proze in ganny propoze. Gouvernman Lokal lo son kote, zot in entrodwir ouswa reentrodwir *scheme* pour bann animater lo nivo distrik. E sa osi i pou enkli bann aktivite sportif ki lo nivo distrik.

NSC li i depan lo bann klib lasosyasyon ek federasyon sportif pour zot anmenn sa bann program lo nivo kominoter parey lo nivo lekol, e lezot proze.

Nou okouran ki kapasite i reste en defi. E nou'n fini diskrit Sesyon Formasyon pour – sirtou pour zot kapab mobiliz resours. Konn mobiliz resours. E sa i pou al konmanse la mwan Oktob. Mersi Mr Speaker.

MR SPEAKER

Ou siplemanter Onorab Romain?

HON GEORGES ROMAIN

Mersi Mr Speaker. Minis, mersi pour ou larepons. Mon pou annan zis en kestyon. Ler ou'n mansyonn *Local Government*, byensir nou travay – nou konman bann *MNA* nou travay tre pres ek nou *DA*. E byensir nou'n koz bokou lo bann fer *sport* pou ed nou bann zenn sorti dan bann move aktivite.

Parey mon kestyon, mon ti anvii fer resorti sanmenm sa. Me ou'n dir sa pou konmanse tre byento. E aköz parey nou'n ganny dir tanzantan fodre fer nou fer bann *mass sport*.

Nou lo kote bann Manm Lasanble ansanm avek *DA*, kekfwa ler nou napa ase sa

kapabilite pou nou lans sa. Aköz nou kapab fer group enn de dimoun ansanm, me selman nou bezwen osi bann parey ou dir, bann *sponsors*.

Alors kekfwa mon kestyon mon ti ava zis anvii demann ou; ki sa program ki ti ganny fer, kekfwa nou konman bann Manm osi tou nou ti ava konpran en pti pe – en pti pe vremen ki ti ganny resorti ladan pou nou osi pa ganny kit deryer en pti pe.

Aköz kekfwa ennler kekfwa *Local Government* kekfwa i annan pour li. Be nou osi kekfwa tan ki nou osi nou pe reprezant en distrik, ki nou osi nou ava konnen ki pe vremen pase lo sa bout. Mersi Mr Speaker.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. *Forum* nou'n fer – nou ti fer enn lannen oparavan. Nou'n fer. Tou le lannen nou fer bann *Forum Sportif*. Parey nou fer *Forum Lazesnes*, parey nou fer pour Lafanmir.

Nou fer pou nou kapab sirtou ankouraz, aköz apre *COVID* ti'n annan – *sports* ti'n en pti pe, bann dimoun ti'n en

pti pe parpiye pou anmenn bann dimoun ansanm pou nou mobilize.

Se sa nou manda Gouvernman. Manda NSC. Mobilize, fasilite pour ki nou bann dimoun i rebran bann aktivite sportif konman en aktivite pozitiv pou zot fer. Pa neserman – e sa ti pour kominoter. Pa neserman lo kote konpetitiv. Sa i annan son lot komite. Me sa se pour lo kote kominoter.

Me selman, wi. Wi, me selman nou okouran osi poudir NSC li kot nou, parey nou dir; lo kote resours, pa zis larzan – dimoun, pou nou kapab pas dan tou distrik pou al fer *mass sports*. Sa i pa posibil.

E nou pe ganny demande tou par *IMF* la pou degrosi Gouvernman. Nou pa kapab al kont – en kote lanmen pa kapab al kont sa lot kote lebra ki pe fer. Nou bezwen respekte nou bann prensip finansyel ki soutenab pour pei.

Prenan kont me selman mwan mon krwar napa keksoz ki enposibil. Mwan mon krwar senserman poudir pou nou kapab – ki mannyer nou mobiliz resours, nou kapab fer li diferaman.

Mon konnen poudir par ler nou anvi – nou annan en kantite bon lentere. Nou pa tro

konnen ki mannyer nou pou fer. E labitid, nou pe ekspekte Gouvernman – nou depan Gouvernman ki i fer.

Me sa kantite louvraz ki nou'n vin zwenn. Sa kantite travay dan *sport*. Sa ki nou vwar la, la ki pe fatig en pe dimoun, *mmm*. Sa bann keksoz pozitiv, i pran bokou zefor. En kantite lannen, en kantite resours osi pour nou mwen konmans annan sa pti pozitivite. Sa pti bouze ki i konmanse.

E nou a pe rode nou osi kot nou pa konnen ki mannyer nou fer sa. E nou a pe fer formasyon. Parey mon pe dir, pa zis pour bann klib, pa zis pour Federasyon - Pou osi bann travayer NSC, pou nou vwar ki mannyer otreman ou mobiliz ou bann resours.

E nou bezwen al aprann fer sa, akoz *landscape* in sanze, tou keksoz in sanze lo kote resours. Mazinen *sports* dan en lot pei i en gro Lendistri. I en gro Lendistri. Nou, nou bezwen regarde kwa ki adapte isi Sesel, e ki mannyer.

E mon konnen poudir NSC in konmans fer kozri avek Finans lo sa zafer, ki mannyer pou ganny en pe *rebate*, pou bann biznes kapab siporte.

E i annan selman lezot fason kot nou kapab mobiliz

ressours, par egzanp bann Federasyon Lasosyasyon zot annan zot ekivalan ouswa ki apel zot *mother*, zot *father* lasosyasyon aletranze.

Si ou kont i annord. Si ou annan abilite pou ekrir *projet*, apre pou ou osi tou odit. E ou bezwen rann kont sa bann larzan pou ou fer sa. Ou annan sans, gran sans pour ou kapab ganny akse avek bann resours lo nivo kominoter, lo nivo konpetitif. Lo tou nivo.

E la akoz Sesel aletranze nou annan tre bon repitasyon. Nou a pe ganny bokou, bokou vizibilite. La i letan la. Sanmenm sa ki nou pe konmanse. Nou pa pe esper lannen prosenn pou konmans fer ki mannyer ou mobiliz resours.

Kot *PS*, kot son departman, nou'n sanz en pti gin son manda kot li i al rode, e i fer sa bann kolaborasyon lokal osi byen ki rezyonal, enternasyonal. In koz lo *CONFES*, kot nou pa ti pe akse ditou. Nou pa ti pe akse ditou akoz sa baryer lalang Franse. Ou bezwen ekrir an Franse pou ou gannyen.

Be mwan mon'n ale mon ti al *Congo* sa lannen. Nou'n fer e zot in vini la, e zot pe fer donasyon. Zot fer donasyon tou avek atraver nou pour bann *PE*

teachers dan lekol pour *sports* lekipman. E *of course* pour biznes, akoz i pour *Jeunesse e Sports* dan *Francophonie*.

I annan sa, me selman nou, nou bezwen kapab konnen ki mannyer nou ganny akse ek bann resours. Gouvernman i kapab rod sa bann lenformasyon. Mersi bokou sizesyon pou kominike. Kominikasyon, pas lenformasyon kot nou ankor pe devlop fason fer li. E apre pou nou kapab osi annan.

I annan bann Lasosyasyon Lorganizasyon i fer vreman byen akoz zot annan kapabilite pou zot ekrir bann bon *projet*. Parey kot *SOCGA* i annan larzan pe asize laba, akoz zot bezwen kapab ekrir *projet*. E osi tou rann kont, donn en rapor lo progre ki ou'n fer.

Sa i pa ti tro en labitid dan lepase letan nou pe anmenn sa nou realize. So nou pe dir ek dimoun, wi pa zis vin kot Gouvernman. Nou ava ede, nou ava *facilitate*. Lot kote lanmen nou pe dir, nou pou atrap lanmen nou. Nou pou atrap zot lanmen.

Nou pou swiv zot dan sa parkour, pou donn nou lekor kapasite. Pou donn nou bann dimoun osi kapasite pou nou kapab. E mon tre kontan, mon

pozitiv ki i annan en kantite, kantite menm bann posibilite ki nou ava kapab fer sa. Mersi bokou Mr Speaker.

MR SPEAKER

Mersi wi, kestyon Onorab William?

HON WAVEN WILLIAM

Mersi Mr Speaker. Mon ti a kontan demann Minis premyerman; par lefe ki mon'n ekout ou dir ki zot ankouraz bann Federasyon al fer bann *outreach activity* dan bann distrik.

Me eski zot ganny prezante en plandaksyon par Federasyon ki ladan i enkli en konponan depans pou fer aktivite dan distrik, ouswa lo en baz rezyonnal. Menm si i pa kapab fer li dan sak distrik, me lo en baz rezyonal?

E pour en Parlman se sa bann keksoz ki nou anvi vwar. Akoz *if it's not pretend then only encouraged*, i pa lo en plan. Nou pa vreman konnen si vreman i pou ganny enplimante. Mersi.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker. Mon ava reponn apre Mr Speaker,

kekfw a Onorab i a gete si mon'n reponn sa kestyon, kekfw mon pa tro konpran en pe. Plan Federasyon wi, akoz pou zot ganny...

Dan lefase ti napa sa, lo son kote *accountability*. Sanmenm sa kot nou napa kapasite nou a pe annan sa bann defi lo pou anmenn en plan. E la nou pe fer sir ki ler i konsern larzan piblik kot nou a pe – bann diferan Federasyon Lasosyasyon.

Me selman, sa lasistans mon pou dir, lasistans finansyel li i *minimum* ki Gouvernman i kapab. Nou ti a swete dan Bidze, anmezir ki nou lekonomi i devlope nou a regarde ki manner tou le lannen i devlope.

Me selman, avek nou bann defi lenfrastruktir e lezot defi ki nou annan, nou bezwen pe balans Bidze osi tou pou vwar ki manner sa i posibil.

Me selman wi, dan zot plan ki zot – nou ankouraze. Nou pa met mandatwar fodre ou annan en plan dan distrik. Me selman i annan zot bann plan ki zot in prezante pour zot kapab ganny finansman.

Sa bann propozisyon, ouswa bann fason parey mon pe dir, mobiliz resours i en konmansman. I fek konmanse sa. I ase nouvo ansanm avek

Gouvernman Lokal e avek bann lezot biznes pour nou kapab vwar.

Me selman mon pou repet ankor sak fwa mon ganny lokazyon Mr Speaker, i pa neserman ki sa i toultan bezwen sorti kot Gouvernman. I annan posibilite ki sa i kapab sorti lezot landrwa.

Nou, nou la pour nou pouse pou ankouraze ki *sports* aktivite, lezot tou, i desann lo nivo kominoter. Wi, nou ankouraze fer bann fasilasyon. Bidze pa toultan permet ki nou *allocate* en Bidze spesifik pour sa.

Par kont kot Gouvernman Lokal i annan Bidze. La ki bann *schemes*, bann klib bann *sports* – bann lezot klib lentere ki enterese pour sa dimoun anim en konpetisyon ouswa en klib sportif i kapab ganny fer.

Sa fodre i en travay kolaborasyon avek bann diferan antite dan Gouvernman, osi dan prive.

Me si mon'n byen konpran keston Mr Speaker pou nou met li konman en regilasyon pou nou donn *allocate* Bidze pour bann Lasosyasyon Federasyon, sa non. Nou pa pe fer li. Mersi.

MR SPEAKER

Mersi. Mon annan keston Onorab Loizeau.

HON NORBERT LOIZEAU

Mersi Mr Speaker. Mr Speaker, mon anvi demann Minis. Minis, vi ki ou'n koz - mon keston i en pti pe relye o bor avek keston Onorab William. Vi ki ou'n dir *NSC – NSC* osi i *involved* ladan kot i pe koz ek bann Federasyon, osi bann klib, pou kontribye osi pou anmenn sa lo nivo kominoter.

E nou dan distrik Bel Air nou lekip foutbol ti pran li – pe deza fer sa, parey ou konnen. Nou annan en pti laplenn *Astroturf* ki zot in pran li konman zot pti baba – Lekip Foutbol Bel Air. Zot ti'n ganny bann *turf* e zot in fer sa proze dan distrik.

E la menm nou pe osi mazin pou al kot Lekol Bel Eau, kot zot osi zot anvi met *turf* deryer. E mon pe koz avek *coach* pour zot kapab konmans sa proze ed Lekol Bel Eau. E mon keston aprezan - E mon osi anvi remersi bann *sponsors Savy & Sons* ki'n toultan akote nou pou fer sa bann proze.

Mon keston i; vi ki nou pe koz lo *NSC*, pe koz ek bann klib. Lo kote bann lakademi, ki zot lo kote *NSC*, ou Minister pe fer? Akoz nou konnen *sport* kominote i konmans anba.

Lezot pei i konmans par lakademi, i monte, i monte ziska ler ou ganny bann atlet profesyonnel.

Ki zot pe fer pou ankouraz annan plis lakademi dan bann distrik? Ou pe konpran mwan Minis? Plis lakademi.

E ki zot pe fer pou ed sa bann lakademi kapab progrese an term – ou'n koz en pe lo finansman, me pa zis finansman. An term - nou konnen finansman parfwa i en pti pe problem. Me an term bann profesyonnel dan sa bann *sport* pou kapab ede lo kote *coaching*.

Akoz parfwa bann lakademi zot tonbe aköz lo kote pou ed sa bann zenn, lo kote formasyon pou zot kapab ariv sa nivo ki nou pe mazine. Mersi.

MR SPEAKER

Mersi Onorab. Minis, ou repons?

MINISTER MARIE-CELINE ZIALOR

Mersi Mr Speaker. I annan plizyer striktir ki la pou ede. Par egzanp nou annan en *Sports Trust Fund*, ki kot departman kefwa apre *PS* i ava koz lo la, ki nou ankouraz - nou ankouraz bann lakademi, bann klib pou zot fer laplikasyon.

Mon pou repet ankor kefwa Mr Speaker, nou defi nou se ki kapabilite. Nou bezwen met nou – pous nou lanmen kot vreman problem i ete pou nou kapab.

Akoz annandler ou fer en aksyon, i annan lefe lo lezot. Sa i mon mazine i bann lezot lefe pozitiv ki i pou annan.

Dek konman nou pou'n kapab, nou pou'n nobou ed - lakle se bann federasyon, bann lasosyasyon, mon pou kontinyen dir; se sa lakle ansanm sa partenarya kot bann defi ki zot annan – bann defi ki zot annan pou zot kapab konnen ki mannyer zot fer sa.

Ki mannyer pou akse e ki mannyer pou zot ekrir sa bann proze. E pou zot konnen osi kote sa bann striktir, kote i annan led ek sipor pou zot kapab ale.

Si nou pou – nou pa pou kapab retourn an aryer, pou ki Gouvernman i al pran tou sa klib sportif, tou lakademi i met anba son lezel. Sa ti en fason kontrole sa. Nou pa oule retourn dan sa bann negativite.

Nou anvi bouze avek pozitivite parey nou'n dakor. Pou nou kapab dir ek bann dimoun kapab pran sportif, i pa en zafer ki Gouvernman i annan *ownership*. Ki zis en

zafer ki Gouvernman i gard pou li, krwar pou li.

I pour tou Seselwa. I pour tou dimoun. E nou pe ankouraz tou bann dimoun pou zot kapab vin swiv bann kour formasyon pour nou kapab.

Nou, nou pou ouver bann laport. Nou etabli bann striktir. Si demen nou kapab met ankor plis *Trust Fund*, nou travay lo la nou.

Si demen nou kapab atraver lorganizasyon enternasyonal, anmennen. Parey nou'n fer la *for basketball for good*. La byento PS pe diskite lezot osi tou ankor ki nou kapab fer. Nou fer sa bann diskisyon.

CONFESJES in fini arive, in fini vini la. E lezot osi. E nou annan osi tou nou bann Konsil pa bliye. I annan enn ki pe vini la pou vin zisteman regarde ki bann lekkipman ki bezwen dan *sports*.

Nou'n fini demande, nou'n ganny en lalis tou pou anvoy kot zot pou zot kapab – parey zot ti fer sa lannen, pou zot kontribye pou zot *sponsor*. E enkli osi parey ou a pe dir, pou zot donn en profesyonnel pou ede.

Me selman pa bliye kot *Local Government* i annan *Animator Scheme*. I bezwen en profesyonnel ki kapab ganny

peye anba la pou zot kapab vini, pou zot kapab akse.

Mon konnen i annan en pe petet kekfwal lenfliyans pour Gouvernman pran, ale fer. I en pti pe – nou bezwen pe reziste en pti gin sa pou nou pa al ladan, me plito fasilite li.

E parey mon pe dir donn bokou, bokou sipor menm pou nou vwar. E la mon kontan mon pe vwar en kantite bann klib. Bann atlet, bann endividi pe konmans vini pe dir; be ki mannyer mon fer sa? Mon le sipor, ki mannyer mon fer? E zot vin devan.

E si bann atlet nenport ki group i vin kot nenport ki Manm dan Lasanble, nenport ki dimoun, mon lans lapel avek zot. Avans devan kot nou. Nou, nou ava regarde ki mannyer nou kapab fer pou akse.

Nou pa pou kapab en kantite lenstans pou donn zot en tyek. Me selman pou kapab vwar, be ki mannyer nou kapab konekte zot avek striktir bann lorganizasyon ki kapab donn led, kapab donn sipor.

E nou'n deza fer. Nou'n deza fer plizyer repriz nou fer, pour bann diferan disiplin ouswa bann diferan klib. Ouswa parey la Mr Speaker, Onorab pe koz lo lakademi - lo bann lakademi.

Me selman ankor mon pou repete; lakle ler lasosyasyon federasyon i for i annan kapasite i fer sa, i annan en kantite – e bann lakademi enternasyonal ki pare zot, par egzanp pou dir; be *ok* mon ava kapab. Mon ava kontan.

Me selman i anvi ou ekrir en *projet*. I anvi ou swiv serten bann regilasyon ki rann kont e ki bon gouvènanans. Kot nou, nou febles se la, kot nou bezwen met lanfaz.

Nou, nou pe pran resours Gouvènanman, met lo la pou nou pa kontrol dimoun par donn li en pwason. Apre ki ou deside lekel ki i manze, lekel ki i pa manze.

Nou, nou anvi montre zot lapès. Nou a donn en lanmson, en bato. Montre zot lapès. Nou pe fer sa avek *sports*.

Parey in pran nou en pe letan pou nou kapab anmenn sa lespri pozitiv *sports* relanse Sesel. Nou garanti, nou konvenki poudir sa fason osi tou i pou anmenn sa bann fason pozitiv e ki pou osi tou soutenab.

Akoz donn en pwason i pa soutenab li. Montre lapès, sa i soutenabilite. Nou bezwen mazin sa osi tou lonterm. Nou pa mazin zis bann plan kourt term.

So, Mr Speaker, larepons i en pti *long*, selman mon'n anvi eksplik en pti pe ki stratezi ki nou pe fer. Me selman mersi bokou pour bann sizesyon. Parey mon dir, mon vreman apresye lentere ki annan lo bann size sportif. Mersi.

MR SPEAKER

Mersi Minis. Avek sa nou'n ariv a lafen nou sesyon kestyon pour ozordi. Alor mon a remersye Minis ek son delegasyon pour zot partisipasyon. E mon a swet zot bonn kontinyasyon, bon kouraz dan sa domenn tre enportan pour devlopman nou zenn e nou pei.

E mersi osi bann Manm pour zot kestyon. Lasanble i ava pran poz la e nou a rebran travay 2er apre midi. Mersi.

(BREAK)

MR SPEAKER

Bonn apre midi tou Manm Lasanble. E bonn apre midi nou zofisye e tou piblik. Nou kontinyen. Avan nou rebran travay, mon ti a kontan met en keksoz lo rikord pou met rikord drwat, e sa se i konsern lekspresyon ki Minis in servi bomaten, ki mon'n al verifeye lo *verbatim* ki mannyer in servi sa lekspresyon.

E apre ki mon'n verifiye sa, mon'n kominik avek Minis ki mon krwar sa lekspresyon pa ti apropiye pou servi an relasyon avek sa ki Manm in dir dan Lasanble. Minis in aksepte sa e in dir mwan i *retract*.

Donk mon prezant mon leksplikasyon pour sa e mon leskiz. E mon fer li ekspre pour ki nou pa kontinyen servi sa bann term koumsa dan kote Manm oubyen dan kote Minis. Mersi bokou.

Nou a kontinyen avek nou travay Lasanble e nou pe pran *Second Reading* – Nou pe pran Mosyon? Mersi mon'n verifiye avek Madanm Clerk ki bann Manm i okouran ki nou pe pran Mosyon ozordi.

Alor i nesese ki nou prezant Mosyon pour nou sanz lord lo biznes anba *Order 25*. Lekel Manm ki pou anmenn sa...?

Onorab Arissol?

HON SANDY ARISSOL

Mr Speaker bonn apre midi. Bonn apre midi tou Manm. Mr Speaker, anba *Order 97 (1)*, mon ava *move* pou nou ganny ou permisyon; *ok* nou, nou ava sispann *Order 25* nou *Standing Orders* ki koz an relasyon avek *Order of Business*, pour ki nou ava pran Mosyon olye pran *Bills*

parey nou abitye, ozordi silvouple. Mersi.

MR SPEAKER

Mersi. Sa Mosyon a ganny segonde silvouple. Onorab Esparon?

HON REGINA ESPARON

Mersi Mr Speaker. Bonn apre midi. Mosyon in ganny segonde.

MR SPEAKER

Mersi. Manm a *vote* lo Mosyon silvouple. Manm ki an faver, lev lanmen? Manm ki kont? Tre byen. Lo Mosyon pou *suspend Standing Order 25*, nou pran Mosyon avan nou pran *Bills*, 17 Manm in *vote* pour 0 kont e 5 in *abstain*. Donk Mosyon in aprouve par Lasanble, e nou kapab prosede avek Mosyon ki dan non Onorab Sandy Arissol. E Onorab, ou a prezant ou Mosyon silvouple.

HON SANDY ARISSOL

Mr Speaker, mersi bokou e bonn apre midi ankor enn fwa. Mosyon lo *Order Paper* Mr Speaker i lir koumsa;

The National Assembly resolves to approve a supplementary estimate of SR 275,506,848.63 for the year 2023 laid before the Assembly in accordance with Article 154(6) of the Constitution.

MR SPEAKER

Mersi. Mon a ganny segonnman lo sa Mosyon? Onorab Esparon?

HON REGINA ESPARON

Mersi Mr Speaker. Mosyon in ganny segonde pour nou aprouv *supplementary estimate of R275 milyon 506 mil 848.63* pour lannen 2023. Mersi.

MR SPEAKER

Mersi. Mosyon in ganny segonde. Nou a prosede avek deba lo Mosyon. E mon apel Onorab Arissol ki *manager* sa Mosyon pou konmanse.

HON SEBASTIEN PILLAY

(Off-Mic)

MR SPEAKER

Onorab Pillay, ki i konsern kwa? En *point of Order* oubyen kwa?

HON SEBASTIEN PILLAY

Mersi Mr Speaker, i konsern ou *ruling* ki ou'n donner. Mon ti le demann ou vi ki ou'n donn sa *ruling* e ou'n regard *verbatim*, e sa ti en sours protestasyon lo nou kote latab. E ou ti'n deza pran desizyon pandan sa sesyon kestryon pou *eject 2* mon Manm lo mon kote latab.

Mon pe zis klarifye avek ou si ou desizyon pou *eject* sa 2 Manm i pour *the whole of today's sitting*? Oubyen lefe ki baze lo sa *ruling*, ou pou *allow either of* mon 2 Manm pou retourn dan Lasanble pou kontiny travay? Akoz sa ti en sours ki Onorab Aglae ti pe demann ou en *point of order* lo la avan ki i sorti.

MR SPEAKER

Wi, mon pou *rule* lo la Onorab. Mon *ruling* pou an term sa bann Manm, i napa naryen pou fer avek sa ki mon'n deklare lo Mosyon. Me selman mon pare pou termin zot sispansyon la, pou zot kapab partisip dan Mosyon ki devan nou, akoz mon krwar sa i en Mosyon enportan. Alor ou bann Manm i kapab antre.

Onorab Arissol ou a kontinyen avek prezantasyon ou Mosyon silvouple.

HON SANDY ARISSOL

Mersi Mr Speaker. Mr Speaker, sa Mosyon i ganny anmennen parey nou tou nou konnen, anba Lartik 154 nou Konstitisyon. E enn bann fonksyon enportan Lasanble se pou donn larzan avek Gouvernman, pou li kapab desarz son fonksyon e pour li kontinyen.

Sa nou fer li mazorite letan atraver Bidze ki nou vote sak lannen, ki bann dimoun i swiv lo medya. Sa prosedir i fer sir ki i annan en *check* lo Gouvernman, kot Gouvernman pa kapab zis depans larzan.

I bezwen fer li lo en baz en Bidze, kot Lasanble i otoriz Gouvernman pour sa depans e serten sonm pour sak son Minister, son departman ouswa son Lazans.

Me en Bidze pa zanmen *fixed* parey nou tou nou konnen. Bidze i dinamik, akoz i annan serten depans ki i pa'n prevwar ki Gouvernman i bezwen fer.

Alor Konstitisyon i donn Lasanble, i donn nou konman en Lasanble sa pouwar pou *supply* plis larzan avek Gouvernman pour sa bann depans ki pa'n revi.

Sa i ganny fer atraver sa ki nou apel en *supplementary appropriation* ki ganny fer an 2 faz.

Premye se en Mosyon, parey sa enn ki zisteman ki devan nou la ki lo *Order Paper*. E si Mosyon i ganny aprouve, en *Supplementary Appropriation Bill* i bezwen ganny anmennen devan Lasanble Mr Speaker, lannen apre ki sa Mosyon li in pase.

Alor, si sa Mosyon i ganny aprouve ozordi, lannen prosen en *Bill* i ava ganny anmennen, pou nou regulariz sa depans ki la.

I annan 2 pratik ki nou Lasanble nou'n adopte an sa ki konsern Bidze Siplemanter. Premyerman, se pou anmenn sa Bidze avan ki Gouvernman i depans larzan anplis ki sa Bidze ki nou ti donn li - zot lannen avan.

Kantmenm Lartik 154(6) nou Konstitisyon i permet Gouvernman depans larzan, epi vin devan nou pou otoriz sa depans – nou pratik se demann Gouvernman vin demann nou permisyon avan ki zot fer sa bann depans.

Dezyenmman, se pou anmenn bann zofisye Minister Finans devan nou pou nou kapab kestyonn zot, rod klarifikasyon, rod serten leklersisman an relasyon avek lo *Supplementary Budget* pandan sa proses Mosyon.

Me sa fwa sa pa bezwen akoz ler *Mid-Year Review* ti vini apepre 2 semenn pase dan Lasanble Nasyonal, nou tou konman bann Manm Lasanble nou ti ganny sans kestyonn bann zofisye Minister Finans ki ti la, ki ti ganny akonpanyen par Vis Prezidan, an relasyon

avek plizyer size ki nou, nou ti santi nou ti kapab demande.

Alor ozordi, se ki nou pe fer, se pa pou demann kestyon. Me pou nou kapab adres sa Mosyon ki devan nou, pour bann Manm ganny sans koze, eksprim zot an relasyon avek sa ki i annan devan nou atraver sa Mosyon.

Mr Speaker, mon a pas en pti revli lo bann gran liny sa Bidze Siplemanter. Pa bliye bann dokiman i siport sa demann siplemanter, in ganny sirkile avek bann Manm, ki mon pa ava neserman pas dan tou, be mon ava ganny en posibilite pou les bann Manm koz en pe lo la.

Parey nou tou nou ti gannyen, i annan serten dokiman ki Madanm Clerk in sirkil avek nou ki nou'n gannyen. Ki nou'n ganny sans nou tou pas lo la pou nou kapab deliber en pe lo la apre midi.

Enform Lasanble – mon ti ava kontan enform Lasanble ki malgre ki nou pe demann en *supplementary appropriation* R275milyon, sa se depans ki pa'n ganny aprouve dan Bidze 2023, ki Lasanble li in aprouve li lannen dernyen.

Annefe, Gouvernman pe fer en *savings* plis ki sa apropriasyon ki la Mr Speaker.

Me aköz en Bidze pa'n les Gouvernman servi son *savings* pou depans anplis, i *still* bezwen vin devan nou pou aprouv sa depans siplemanter.

La Mr Speaker, parey mon'n eksplike, taler bann Manm a ganny sans pas lo la e zot a ganny sans donn zot revli an relasyon avek bann dokiman ki'n ganny sirkile.

Mon ti a kontan dezyenman dir pou dir avek Lasanble, ki pa tou sa 275milyon ki pa ankor ganny depanse. Ladan Gouvernman in depans 45 milyon 593 mil.3225.50 Mr Speaker. E larestan li i pou depanse si nou aprouv sa Mosyon.

E nou a note poudir Mr Payet in koz en pe an relasyon avek sa siplemanter. In donn nou enn de bann detay. E nou osi met plizyer sif devan nou konman en Lasanble, pou nou kapab zisteman analize, e balanse atraver sa Mosyon ki nou pe fer ozordi.

Pou nou pran en desizyon lo la apre ki tou bann Manm in ganny sans delibere, e pou zot donn zot pwennvi an relasyon avek sa Mosyon ki mon'n anmennen.

Mon ava aret la Mr Speaker, pour la. Mon a donn sans bann Manm kapab deliber en pti pe lo la pou nou ganny en

pe revyi an relasyon avek sa ki zot santi avek Mosyon ki mon'n anmennen. Mon ava aret la pour lemoman Mr Speaker. Mersi.

MR SPEAKER

Mersi Onorab Arissol. Onorab Esparon, segonder Mosyon, eski ou anvi pran laparol an se moman?

HON REGINA ESPARON

Non, Mr Speaker, mon rezerv mon drwa koze pour pli tar.

MR SPEAKER

Ou a pran laparol a en lot moman ki ou pare. Onorab John Hoareau, mon a donn ou laparol.

HON JOHN HOAREAU

Mersi Mr Speaker. Bonn apre midi tou dimoun ki a lekout. Bonn apre midi tou koleg osi. Mr Speaker, Mosyon ki devan nou pe demann nou Lasanble pou aprouv en Mosyon pour en sonm 275 milyon 506 mil 848.63 sou konman en Bidze Siplemanter.

Mr Speaker, mon krwar ki i vreman enportan pour nou pep Seselwa konpran tre byen ki pe arive dan sa legzersis ki nou pe fer ozordi.

Atraver leksplikasyon *Budget Mid-Year Review* ki VP

in fer devan nou Lasanble, in fer resorti 3 keksoz vreman enportan ki nou kapab konstate in arive dan sa *Mid-Year Review*.

Enn se ki in annan bokou *recruitment* ki pa'n ganny fer. Alor serten kantite larzan ki ti'n ganny bidzete pour *recruitment* travayer e trezyenm mwan saler pa pou ganny depanse.

Dezyenm, se serten departman Gouvernman ki nepli an egzistans parey arzan ANB. E bokou zot zofisyè in ganny re abzorbe dan Lafors Lapolis. Sa larzan ki ti'n ganny bidzete pour ANB, alor i bezwen ganny transfer avek Lafors Lapolis pour zot kapab pey saler sa bann dimoun.

Trwazyenm keksoz, se serten Proze CAPEX in ganny serten retar pou enplimante. Sa larzan alor in ganny koupe pou li ganny remet dan Bidze lannen prosen.

An tou en pti pe plis ki 621 milyon in ganny koupe dan Bidze 2023. E sa Bidze Siplemanter pe demann nou pou aprouv en pti pe plis ki 275 milyon pou redistribye kot i neser dan bann departman Gouvernman pou asir zot fonksyonman.

Sa i vedir ki pei pe fer en sirplis bidzeter ki en pe plis ki 345 milyon a lafen lannen.

Mr Speaker, ler nou get bann endikater ekonomik nou pei, nou vwar ki Sesel anba Gouvernman *LDS*, pe fer vreman byen. *Fitch rating* enternasyonal ki ziz lekonomi en pei, in redonn Sesel en rating *BB- (minus)*. Ki sa i vedir? I vedir ki Sesel i lo bon semen.

I en lendikasyon ki bann Lalwa e lenfrastruktir pou soutenir biznes, i an plas. I vedir ki gouvrenans pe mentenir en lanvironnman biznes e politik ki stab. Me ki sa i vedir pour nou pep?

I vedir ki bann etranze i annan konfyans dan nou pei, pou zot vin met zot larzan. Sa ki nou apel *Foreign Direct Investment*. Par egzanp nou'n vwar konstruksyon Lotel Anse à la Mouche, Lotel Fregat byento e plizyer lezot lenvestisman.

Pour nou pep, i vedir devlopman. I vedir plis travay dan Sekter Tourizm pour bann etidyan *STA* ki *graduate*. I vedir plis louvraz pour bann kontrakter dan konstruksyon, enkli bann zenes ki fini *SIT*. I vedir plis touris e biznes ki annan pou fer ek touris parey bann artizan, e dimoun ki vann bann ekskirsyon dan mon distrik.

Se sa ki Prezidan Ramkalawan pe rode pour nou

pep. Tandi ki Lopozisyon pe pey *voodoo* pou met zot o pouvwar.

(laughter)

MR SPEAKER

Sorry...

HON JOHN HOAREAU

Mr Speaker...

MR SPEAKER

Onorab! Onorab!

HON JOHN HOAREAU

Mon a *retract* sa pti bout.

(laughter)

MR SPEAKER

Onorab, wi *retract*. E mon pe dir – mon pe dir tou Manm silvouple, i annan serten size ki *divisive*. I annan serten size ki kontrovers. E Manm i bezwen annan responsabilite pou zot evit sa bann size. E Onorab, mon demann ou pou *retract* e kontinyen ou *speech*.

HON JOHN HOAREAU

Wi Mr Speaker, mon'n *retract* sa pti bout. Mr Speaker, *IMF* in deklare ki Sesel i lo bon semen e pe mentenir lwayote anver son program.

Mr Speaker, si Sesel pa ti lo bon semen parey Dirizan Lopozisyon in dir nou, eski

bann dimoun ti pou ed Sesel anba sa Progranm 3an, avek en pre 46milyon *US\$ Dollars* konman en Fon pour Rezilyans e Soutenabilite?

Eski *IMF* ti pou pret Sesel ankor 56milyon *US\$ Dollars* anba *Extended Fund Facility* pour Rezilyans e Sanzman Klima?

Mon bann frer, annou pa fer sa fot pou ekout bann fo profet. I annan en kantite ki pe lanse, la koman bann dokter ki konn tou. Seselwa i en pep ki entelizan, e mon krwar ki Seselwa pa anvi retourn an aryer parey bann 'kanmaron' ki nou'n ganny dir dan sa Lasanble.

Mr Speaker, an di-z-an sa mon bezwen realize ki pa tou ki parfe. Koman en pei ki depan lo touris e lendistri leksportasyon ton, nou war tou pri vilnerab ler Lerop ki enn nou sours touris e osi marse enportan kot tou nou bann ton i ganny vann, i fer fas avek bann problemm krwasans ekonomik.

Ler pri petrol i monte, nou bezwen ekspekte ki serten komodite ou servis i osi monte. Nou bezwen alor touzour mazin demen e pa depans tou nou sou.

I vre ki saler debaz i bezwen ogmante, akoz bokou fanmir pe vwar li difisil pou fer

2 bout zwenn. I vre ki *senior citizens* i bezwen en pti pe plis, me fodre ki zot annan en pe pasyans.

Gouvernman *LDS* pe al ganny zis 3an depi ler i o pouvwar byento. Travay in konmanse, me travay pa ankor terminen. Nou'n konmans lo bon direksyon. Nou'n pran la governans dan en moman ki pei ti lo son zenou.

Nou'n nobou donn en logmantasyon 10poursan pour travayer. Refer Lopital La Digue, fini Lekol Belonie, fer plizyer proze lakaz pour malere. E remet *STC* lo en bon larout e stabiliz pri marsandiz e baz.

Alor nou bezwen plis letan pour nou fini sa travay. Dan mon distrik, nou pe fer proze miray lo lans pou tenir nou zoli lans Beau Vallon kont lerozyon. Nou pe fer plizyer Proze Re sirfas Semen e met *bus shelters* e *bins* a dispozisyon nou dimoun.

Byento Proze sit Bazar Labrin pou konmanse. Mon fyer poudir ki avek sa *loan* \$15milyon ki sorti anba Fon *Saudi*, nou pou parmi sa 6 distrik ki pou annan en proze lakaz.

Proze Redevlopman Paskal Vilaz i touzour pre avek mon leker. E mon pou remersi Minis pou pran kont sa e pou

donn nou en proze lakaz byento. Se sa lespri pozitivite ki nou lo sa kote latab nou pe koz lo la. E nou konvenki ki Seselwa pou mars avek nou.

Mr Speaker, Beau Vallon pou reste touzour pozitiv pour plis devlopman. Avek sa Mr Speaker, mon a remersi ou pour sa sans pour mwan koz en pti pe lo sa Bidze Siplemanter. Mersi.

MR SPEAKER

Mersi Onorab. Mon annan Onorab Naddy Zialor?

HON NADDY ZIALOR

Mersi Mr Speaker. Bonn apre midi Mr Speaker. Bonn apre midi tou mon bann koleg. Bonn apre midi Lepep Seselwa. Mon pe aport mon sipor pour sa Mosyon ki devan nou Lasanble apre midi, senpleman pour 2 rezon;

Enn mon annan gratitid. Gratitid anver tou nou frer ek ser Lepep Seselwa, ki pe leve tou le bomaten e pe ganny sa kouraz ek lagras, pour zot kontinyen travay pou fer ki nou pei i ankor pe respire. Nou pei i ankor pe bouze.

Nou bann dimoun ankor pe resevwar diferan servis. Avyon i ankor pe anvole. Nou lopital i ankor pe fonksyonnen. Departman Sosyal, bann

dimoun ki bezwen led i ankor pe resevwar.

Wi, nou bann ser ek frer Seselwa i ankor pe desann tou le bomaten e pe kontinyen deservi zot pei konman bann *public servant*, konman bann *businessmen*, konmans sa zenn.

Wi sa zenn ki pe kontinyelman donn nou pei sa lespri pozitiv, sa lenerzi pozitiv. E wi, nou pei i ankor pe sirviv Mr Speaker.

Pour mwan i pa zis en Bidze ki nou pe donn larzan. Nou en Bidze kot sakenn nou – e fodre parfwa nou rekonnet. Sakenn nou pe fer son bout pozitiv pour ki ozordi, parey mon'n dir, sa pasyan ki'n admit Lopital Victoria i ankor pe ganny swen.

Sa zanfan, sa etidyan i ankor pe ganny li en *allowance*. Sa *carer* ki nou'n koz lo la bomaten i ankor pe ganny li en *allowance*. Sa dimoun aze i ankor pe ganny li son pansyon. E sa, nou dir avek Lepep Seselwa, mersi.

En pei i pa zis ou leve bomaten e ou reve ou fer en *wish list*, e ou dir kwa ki ou anvi. Me sakenn – sakenn i annan en rol. Sakenn i annan son bout pou zwe.

E mwan letan mon vwar en Bidze Siplemanter avek

leksplikasyon byen detaye, ki bann teknisyen ansanm avek Vis-Prezidan sa zour in vin devan nou, i permet mon krwar sakenn nou pou apresye sa travay formidab ki nou konman en Gouvernman nou pe fer pour nou pei.

E sa ki vwar i vwar. Nou'n vwar diferan proze ki'n ganny materyalize. Ki swa ki'n ganny fer renovasyon ki ti pe ganny neglize pour plizyer letan, pour plizyer lannen.

Proze semen ozordi - zisteman 2 semenn pase en drayver SPTC i dir mwan; mon byen kontan letan mon pe pas lo Semen La Misère oubyen lo Semen Montanny Poze. En zoli sirfas koltar in ganny mete. Nou pe vwar bann trotwar ki pe ganny aranze. Ki pe ganny met lo standar.

Bann diferan proze lo nivo nasyonal ki pou tous sakenn nou konman en nasyon - Proze Libreri Nasyonal. Bann por ki'n ouver Mr Speaker. Tousala i travay sakenn nou, sa pep ki leve, avek en lenerzi pozitiv pou fer sir ki son pei i bouze Mr Speaker.

Mon sipor i osi vin dan en serten sans, kot letan nou'n asize nou'n ekoute - e Onorab ki'n koze avan mwan, Onorab Hoareau in fer en bon analiz lo bann koupir ki'n ganny fer lo

bann azisteman ki'n ganny fer. Pou fer sir ki keksoz i kontinyen bouze.

E ozordi nou annan nou en Gouvernman ki vin devan son pep, ki dir pour ki rezon tel keksoz pe ganny koupe. Pour ki rezon ki sa enn ki la i pou ganny plis, lot pou ganny mwens.

Me enn bann pwen ki mwan mon ti a kontan fer resorti – e la mon pe koz avek tou bann Minister, tou bann lakonpanyen paraetatik ki – *well* konman en Manm Parlman mon vwar sa in repete a plizyer repriz, sa zafer *recruitment*.

Mon krwar i enportan ki nou bann dimoun ki pe travay, nou toultan travay avek en vizyon. Vizyon pou fer pli byen. Vizyon pou aranze. E i normal. I normal serten keksoz i ganny fer, i kase, i refer pou fer li vin pli meyer.

Me, letan mwan mon'n asize mon'n ekout bann prezantasyon, mon realize ki nou osi bezwen annan en vizyon kler lo kote nou anvi nou bann departman.

E la mon pa pe koz lo pour – petet, tre souvan nou *target* en Minis, en *P.S.* Mwan mon dir tou dimoun ki *clock in* bomaten dan en lorganizasyon travay, i ou responsabilite pou ou fer en keksoz arive avek ou leker. Fer

li vin ou pasyon. Fer ou travay vin ou lanmour.

Alors, mon swe se ki, mon tann bann proze ki pou diferan rezon ki'n ganny donnen ki mon krwar - *well*, i valab, ki i pe ganny anvoye pour lannen prosenn.

Mon mesaz ki petet mon ti a kontan pase atraver sa Mosyon, se ki nou konmans planifye keksoz boner. Nou konmans planifye li la, en fason ki lannen prosenn sa bann pozisyon ki'n ganny anvoye la, nou fer sir ki Zanvye...

Par egzanp dan *recruitment*, si i annan en departman ki bezwen 4 travayer, nou fer sir by Zanvye lannen prosenn sa pozisyon i ganny ranpli.

E an menm tan mon ti a kontan osi pas en mesaz. Fodre ki nou osi pe donn lankourazman ler i annan en *vacant position* - nou bann dimoun ki'n deza la pour plizyer lannen, pou ankouraz li i osi pou fer bann letap nesaser. Ki swa atraver *training*, bann *courses*, pou ki ler i annan en *vacancy*.

Si lenstans – parske letan nou ti pe get sa latab prezantasyon, nou ti vwar ki bokou *recruitment* pa'n reisi ganny fer pour rezon petet

market demand ki pe zwenn bann *requirement*.

So annou osi rod fason entern dan bann Minister, pou nou ankouraz sa zenn ki li in deza la, ki mannyer i pou *empower* son lekor atraver bann *training*, bann *course*. Pour ki ler i annan sa bann *vacancies* i osi i monte.

E la i ava pli fasil petet si sa pozisyon *junior* oubyen pli ba ki ti pe rod en dimoun an deor, i ranpli Mr Speaker.

Enn bann keksoz ki bomaten nou'n tann koz lo la ankor, se bann program. *Well*, nou'n koz lo Minister Lafanmir. E osi i annan bann program lo nivo kominoter ki la mon apresye, ki sirtou Minister *Local Government* in donn bokou sipor. E mon swete ki lannen prosenn nou *boost up* sa departman pou ki vreman nou kominote i reste ansanm.

Kontinyen travay pour nou pei. Kontinyen ankouraz bann diferan group dan bann distrik pou zot zwenn ansanm. Fer bann aktivite. Fer bann program pou *empower* nou lekor. Tousala i annan en kou ki vin avek. Nou bann *community leaders* nou konn sa tre byen.

Alor Mr Speaker, mon aport mon sipor e mon priye ki Bondye i kontinyen donn son

benediksiyon lo nou pei. E pou ki nou kontinyen travay dan en lespri pozitiv, dan en lespri ranpli avek lenerzi pour nou kontinyen fer Sesel bouz de lavan Mr Speaker. Avek sa 2 mo, mon ava dir ou mersi.

(APPLAUSE)

MR SPEAKER

Mersi Onorab. Mon pe war en pe retisans lo lapar bann Manm pou zot lev zot lanmen. Sa ki le entervenir. Mon konnen sa stratezi, sa taktik les en kote koze, les lezot koze pou ou kapab reponn e rebran. Me selman i pa *suit* mwan tro byen.

E mon ti a kontan demann bann Manm ki pou entervenir pou lev zot lanmen. E mon toutafe dakor pou balans diferan kote lasal ki bann deba i swiv annord, koumsa nou annan bann pwennvi.

E mon osi dakor si Lopozisyon i anvi gard laparol zis avan loter Mosyon i ganny son *reply*. Petet *Leader* Lopozisyon i kapab fer sa, pou li prezant son kote avan nou termin avek *Reply*. Sa mon dakor.

Me mon ti a kontan ki bann Manm ki anvi entervenir i lev lanmen silvouple, pour mwan konnen kot nou pe ale. *Ok?* Mon annan Onorab

Cosgrow, Onorab Monthy. I annan lezot Manm? En pti moman.

Tre byen. Donk, lo mon – Onorab Loze? Bon, lo mon lalis mon annan Onorab Monthy, Onorab Esparon, Onorab Lemiel, Onorab Herminie, Vidot, Onorab William e Onorab Loze. Tre byen. Onorab Woodcock? Bon, mon a donn laparol Onorab Monthy.

HON PHILIP MONTHY

Mersi Mr Speaker. Mosyon ki la devan nou ozordi i tou senpleman pe demann Lasanble permisyon pou akord Gouvernman permisyon pou depans en sonm en pti pe pli ki R275.5milyon dan form en Bidze Siplemanter.

I enportan Mr Speaker, pour nou pep la deor, konpran si menm nou pe koz lo en Bidze Siplemanter avek en total ki mon fek mansyonnen, sa sonm i pa en larzan anplis ki Gouvernman pe vin demann Lasanble aprouvasyon pou enzekte dan Bidze 2023.

Sa larzan in deza la dan Bidze sa lannen, ki ti ganny aprouve par sa menm Lasanble Nasyonal ver lafen lannen 2022. Me ki pe ganny fer, se ki sa sonm ki'n mansyonnen pe zis senpleman ganny redistribye sorti anba serten

Minister, ki pour plizyer rezon ki parfwa i an deor kontrol sa Minister respektif, pou al kot en lot.

E sa pe ede pou fer monte lezot Minister kot sa larzan pe ganny redistribye. E donk ki i fer ki larzan i la dan pei e pe al ganny depanse avek byensir laprouvasyon Lasanble, atraver sa prosesis ki nou pe fer la ozordi.

Sa *savings* Mr Speaker, ki serten Minister ou departman Gouvernman in fer, pe al ganny depanse pou donn sa sipor finansyel plizyer departman Gouvernman, pou zot pli byen kapab delivre lo zot manda, e donk pli byen kapab deservi pep Seselwa.

Mr Speaker, ler mon pe get bann rezon prensipal ki lakoz *savings* ki bann Minister in fer an rezon larzan ki pa'n depanse, i annan 2 rezon prensipal ki mwan mon'n vwar ler mon'n konsilte bann dokiman.

Premye se '*delay in recruitment*' e dezyenm se trezyenm mwan saler. Mon a konmans avek '*delay in recruitment.*' Ler ou pe get serten rezon ki'n ganny prezante akoz ki sa departman oubyen Minister pa'n kapab *recruit* serten travayer, annan i zistifye.

Tel parey ler mon pe get kot *Department of Information and Communication Technologies*. Kot rezon ki zot in donnen i; '*delay in recruitment and replacement a new post due to difficulty in obtaining qualified candidates or labour market*'.

Sa pour mwan i en rezon ki mon kapab konpran e admet ki i kapab arive. Sirtou kot serten domenn kot in annan en mank dan lakantite zenn ki'n ganny oriyante dan sa bann domenn spesifik dan lepase.

Oubyen bann tel domenn ki vreman tre konvwate e kot prive i vin *poach* sa bann tel profesyonnel.

E byensir nou konnen ki dan lamazorite de ka bann lakonpanyen prive i ofer en pli bon *package* ki sa ki Gouvernman pe ofer, e donk zot ale oubyen zot prefere reste dan sekter prive. Ki i fer ki sa bann Departman Gouvernman, parfwa zot vwar zot en pe difisil dan difikilte pou ganny sa bann travayer teknik avek sa kapabilite.

E pou evite ki sa bann tel sityasyon i kontinyelman repet son lekor Mr Speaker, e ki mon konnen ki sa Gouvernman aktyel in deza konmans adrese, se pou asire ki i annan en serten sekter priyoriter, kot nou

konnen i annan en mank profesyonnel kalifye.

Bann zenn pe ganny ankouraze pou fer zot karyer dan sa bann domenn respektif. Anplis, Gouvernman pe asire ki tou zenn ki al etidye, ki avan i ale i deza annan sa garanti ki letan zot retournen, zot pou ganny en lanplwa dan zot domenn ki zot in etidye.

Me an menm tan Mr Speaker, i annan serten rezon ki mwan mon pa war i akseptab. Kekfwa mon mal, me ler ou vwar serten departman ki larzan pe ganny pran aköz i pa'n kapab *recruit* en *driver* - mon santi ki pou bezwen annan plis efikasite dan bann tel lenstans.

En lot rezon pour *savings* ki'n resorti, se ki trezyenm mwan saler in mwens ki sa ki ti ganny bidzete. Sa Mr Speaker, i pa vdir ki travayer pa'n ganny peye zot trezyenm mwan e prezan Gouvernman pe vin rebran sa larzan ki ti sipoze pour zot.

Sa i tou senpleman, aköz Gouvernman ti'n fer provizyon pou pey tou Seselwa 100poursan zot trezyenm mwan saler. Si tou travayer ti'n perform a zot *maximum*, zot tou baze lo zot *performance appraisal*, zot ti pou'n ganny zot *full* trezyenm mwan.

Kontrerman avek sa ki nou'n tande plizyer fwa sorti lo lot kote latab, ki Gouvernman pa oule pey travayer zot *full* trezyenm mwan. Larzan ti la, me peyman trezyenm mwan in ganny fer dapre performans.

Sa largiman inefikasite dan Gouvernman mon konnen pou monte taler probableman, Mr Speaker. Me ler mwan mon pe get mon bann proze dan distrik ki nou ti'n planifye pour sa lannen, mon pa war okenn proze ki'n ganny tire aköz larzan in ganny pran.

Sa lannen distrik Cascade nou'n soumet en lalis anviron en pe plis ki en dizenn pti proze distrik. E tousala swa in fini konplete; parey bann *bin site* ki nou'n fer; nou'n *upgrade footpath* dan diferan landrwa, diferan sou distrik. *Raoudy Estate*, Talbot.

Annan ki deza pe ganny antreprann sa bann pti proze. Tel parey laplenn anler pwen Cascade ki marmay – depi ler mwan mon annan laz konnesans mon'n grandi anler dan leo Cascade, sa landrwa in parey i ete.

E ki byento pe ganny transformen avek en proze laplenn ki nou pe fer. E nou pe *upgrade* sa landrwa kot bis i vire. So i pou annan en nouvo

vizaz la anler byento, e donk larzan pe byen ganny depanse.

Proze Drenaz anler Petit Paris Anba Tanmaren i dan en faz *tender*, zisteman pou soulaz bann zabitan ki ler i annan gro lapli, sa sityasyon *flooding* i afekte zot en gran kantite. Vizit in fini fer. Kontrakter in vini. E byento sa ki i ganny *tender* i a konmans sa proze.

Bann semen segonder dan distrik ki ti'n dan bann leta enpitwayab pandan plizyer lannen, in ganny en nouvo sirfas koltar par *SLTA*. E plizyer zabitan in swa *call* ouswa anvoy mwan mesaz pou eksprim zot lapresyasyon.

E en proze kapital ki ti'n ganny bidzete e ki pou osi ganny realize, se konstriksiyon - pa zis en nouvo sant kominoter, me en nouvo batiman pou abrit nouvo Biro Ladministrasyon Distrik ki'n brile plis ki 10an pase avek son sant kominoter.

Sa proze baze lo bann dernyen rankont ki mon'n fer avek teknisyen, i sipoze demare pli tar lafen Novanm. E alors ver lafen lannen 2024, zabitan Cascade a war sa nouvo batiman ki pour plizyer lannen zot in espere.

An terminan Mr Speaker, mon pou lans en lapel pour tou bann lazans pou travay dan lentere sa pep, e fer ki larzan ki

ganny bidzete i ganny depanse o *maximum* pou benefisyè sa dimoun dan distrik, kot i vwar sa amelyorasyon dan son lavi toulezour.

Avek sa detrwa mo Mr Speaker, mon pou aport mon sipor pour sa Mosyon. Mersi.

(APPLAUSE)

MR SPEAKER

Mersi. Mersi Onorab Monthy. Mon a donn laparol Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi tou dimoun ki pe ekout nou. Mr Speaker, mon pou konmans mon lentervansyon apre midi lo sa Mosyon pour Bidze Siplemanter avek en pti analiz – en pti analiz lo lekonomi ozordi Sesel an zeneral.

Akoz mon krwar i enportan pou nou sitye nou deba, nou diskisyon lo sa *Supplementary Budget, Supplementary Appropriation* baze lo konteks lekonomi ozordi Mr Speaker.

Mr Speaker, nou tann lo televizyon, lo radyo e dan tou landrwa kot Gouvernman i fer son propagann, ki ozordi lekonomi Sesel i enn ki bon. E

dayer nou'n tann en Manm Onorab ki'n koze avan ki lekonomi Sesel i bon. Lekonomi Sesel pe performen, e tou keksoz i dan bon semen.

Me malerezman Mr Speaker, pa tou sa portre ki ganny penn zoli ki neserman i laverite. Nou konnen ozordi ki poudir Gouvernman pe ganny difikilte pou li kapab *meet* son *revenue target*. E sa i pa en lenvansyon ki mwan mon'n fer. Sa bann zafer i la dan dokiman ki Minister Finans ti donn nou.

Annefe i annan en trou apepre R800milyon dan Bidze reveni ki Gouvernman dizour ozordi, sa Gouvernman ki swadizan pe travay, pe travay dir pe travay byen, pe fer tou byen; R800milyon trou dan Bidze ki zot pa ankor konnen ki mannyer pou bous sa trou.

Mr Speaker, sa trou R800milyon i vin atraver preski dir 2 keksoz. Limero enn – limero enn – e sa i pa'n konmans ozordi. In konmans zour Minis Finans ti vin dan Lasanble, ti fer en sanzman Polisi *Tax*. E sa sanzman Polisi *Tax* sete tir 5poursan lo bann gro biznes kontribiter *business tax* ozordi, ki sorti 30poursan ti desann 25poursan.

E ozordi rezilta ki nou pe war dan dokiman ki devan nou, zot annan en *shortfall* dan

business tax apepre R300milyon. So, *basically* R300milyon ki ozordi Gouvernman pa pe kapab anmase, akoz en Polisi direk ki Minister Finans in vin anmenn devan nou Lasanble, ki'n ganny aprouve par lot kote latab.

E ki fer ki ozordi pei i war li difisil pou anmas - pou finans son Bidze dayer, e pou anmas lakantite reveni ki ti'n ganny prozekte.

E Mr Speaker, sa R300milyon *shortfall* dan *business tax* i ozordi si oule en benefis pour serten gro, gro lakonpanyen ozordi deor ki pe fer byen, pe kontinyen fer byen. E lafen lannen zot pou rikord ekstra profi bann lakonpanyen.

Me sa dan li menm Mr Speaker, ki ti devret reprezante? Ti devret pe reprezant ozordi en sityasyon kot biznes i kree plis biznes. E donn loportinite plis *cash flow*. Plis larzan pou li kree plis loportinite, plis biznes. Me nou pa pe neserman war sa dan lekonomi Mr Speaker.

Akoz ozordi en kantite Seselwa ki pe sey ale, sey rod en travay, sey debourye; pti biznes ki pe sey rod bann pti kontra avek bann gro, gro biznes, ozordi pe war zot dan difikilte. E pe war zot difisil pou zot kapab

reste *afloat* parey nou dir, e bokou pe fermen. Sa i limero enn Mr Speaker.

Limero 2 rezon ki ou war ozordi nou annan sa gro trou R800milyon dan nou *revenue target*, i se ki; malgre nou annan touris ki pe antre Sesel, malgre ki nou dir nou'n depas *target*; nou'n depas lakantite ki ti antre menm letan 2022, nou *still* anba lakantite petet ki nou devret ti pe gannyen dan bann letan normal. *Pre-COVID* savedir Mr Speaker.

E ozordi menm sa, nou war lakantite larzan ki touris pe depanse; *earnings on tourism* pa neserman lo sa nivo parey nou ti pe ekspekte. So, Mr Speaker, nou annan an zeneral – nou pa neserman...

Menm si tou bann target pe montre ki lekonomi Sesel pe fer byen, nou pa pe neserman – letan ou annan detay ou al get ladan, nou pa neserman pe fer osi byen petet ki nou ti devret kapab pe fer.

E ozordi bokou Seselwa i pou dir ou ki poudir Gouvernman lo en kote lo televizyon, lo radyo pe dir tou keksoz i *ok*. Me li sa Seselwa dan lakour, i pa pe santi lefe sa swadizan bon lekonomi an term son Bidze lakour, an term son depans, an term pri marsandiz dan laboutik, an term larzan ki

dan son pos parey ti ganny promet. So, i pa sa portre roz an roz parey pe ganny *portray* par Gouvernman ozordi.

Mr Speaker, sa zafer ki la ki mon'n eksplike i pa'n ariv par zar sa. Sa zafer i prensipalman relye avek performans Gouvernman ozordi. Performans dan sans bann direksyon Polisi ki sa Gouvernman ozordi pe al avek.

E mon konnen bokou pa kontan, me selman in ganny dir laba lot kote taler. In ganny repete dan bann konvansyon partou, zot pe koz lo bann zafer, parey nou dir, kanmaron. Wi, nou dir aköz bokou bann Polisi ozordi – bokou bann Polisi ozordi – mon ekout nouvel - bokou bann Polisi ozordi Mr Speaker ki pe ganny entrodwi, i pa bann Polisi ki baze lo bann bon baz kot in ganny fer konsiltasyon, kot in ganny fer bon resers lo la.

E nou war ki bokou sa bann Polisi ki vin Lalwa apre ki ganny retire, ki ganny re aranze ki ganny refer, i mank serten stabilite Polisi dan sa pei ozordi Mr Speaker.

Ki fer ki bann biznes pa pe kapab *operate* dan en lanvironnman serten, pou zot kapab maksimiz profi zot biznes, *or* maksimiz larzan pou kapab dayer apre fer antre dan

kont Gouvernman pou kapab fer bouze nou lekonomi.

Bokou bann biznes ozordi pe viv, parey nou dir an Angle, lo *uncertainty* lo bann Polisi ki pa fonde. E ki tanzantan i bezwen ganny re tire, re isi, re laba. E bann Polisi ki ozordi napa – i pa dan faver pep Seselwa.

So, si nou war sa portre ki mon pe penn ozordi i an rezilta 2 keksoz; en lekonomi ki pa neserman pe perform parey nou ti ava anvi. E en Gouvernman ki pa neserman ki i osi pa pe *perform* parey Lepep Seselwa ti a kontan war an term son bann Polisi ki i pe met devan. E an term son fason ki li Gouvernman i *operate*.

Prezan Mr Speaker, sa i de-koul dan en lot zafer. E la nou pe koz lo dokiman ki'n ganny donner avek nou pour *Supplementary Budget*. E dan sa dokiman ki nou'n gannyen, mon anvi analiz 2 keksoz ladan.

E *of course* byensir i annan 2 keksoz pou vreman gete. I annan sa kote larzan ki Gouvernman pe demande. E i annan sa kote larzan ki Gouvernman in fer *savings*.

So mon pou pran Mr Speaker, premye bout an sa ki konsern sa bout *savings* ki Gouvernman in dir in swadizan fer. E la mon pou zwenn petet

bokou lezot dimoun ki'n asize, ki'n analiz sa dokiman.

I annan 2 rezon prensipal ladan ki Gouvernman in donn nou an sa ki konsern bann *savings* ki'n ganny fer. E rezon limero enn ki mazorite *savings* in ganny fer se '*delay in recruitment*.'

Now tou le lannen bann Minister Gouvernman i vin devan Lasanble la ler zot pe vin rod zot Bidze. Zot vin avek zot plan, avek zot dokiman Bidze kot zot in fer tou zot bann plan pour lannen ki pe vini. E nou Lasanble nou apropiy en Bidze avek zot baze lo sa bann plan.

E dan tou sa bann plan Mr Speaker, i annan bann lenstans kot i annan bann *recruitment*. Me malerezman Mr Speaker, ozordi *or* ler nou ti pe analiz sa bann dokiman Bidze, nou'n war ki dan Gouvernman i annan en problem serye an sa ki konsern *recruitment*.

Kantite dimoun deor ozordi pe rod travay, me Gouvernman avek sa ki'n anmenn devan nou in koup en kantite larzan. En kantite milyon de milyon Roupie kot i konsern *recruitment* aköz bann Minister pa pe *recruit*.

I annan serten lenstans kot Minister in dir pou dir napa sa lekspertiz lokal, petet pou kapab *recruit* dan sa bann

pozisyon. Be mwan mon dir annou rod en fason ki mannyer nou *fill in* sa bann pozisyon.

I annan lenstans kot nou bezwen, si nou bezwen rod en etranze pou fer serten travay dan en serten pozisyon a en serten moman kot nou *train* nou Seselwa, e apre nou kapab ganny ranplase.

So, pour mwan sa i pa en leskiz. Mon krwar nou devret pe fer en zefor ekstra. Bann Minister i devret pe fer en zefor ekstra pou *plan ahead*. Bidze i ganny fer pour en peryod 3an. Son planifikasyon i pou en peryod 3an. E

bann Minister i bezwen kapab plan *ahead* pou kapab *fill in* bann pozisyon ki zot bezwen. E zot bezwen kapab met zot bann *requirement* devan Gouvernman, pou kapab *fill in* sa bann pozisyon.

Me sa ki pli enkyetan Mr Speaker, ozordi i annan bann lezot rezon pou pa *recruit* ki pour mwan i pa akseptab. E ki bann Minister e ki Gouvernman i bezwen aranze dan sa kote. Sa Mr Speaker, i bann *recruitment* ki zis swa zot pa'n *recruit*, swa zot pa'n fer zefor pou *recruit*.

E ozordi larzan i ganny koupe. E i annan dimoun ozordi deor ki ankor pe rod louvraz e ki pa pe ganny louvraz pou zot

kapab organize pou zot okip zot fanmir.

Dezyenm keksoz Mr Speaker ki annan pou fer avek sa kantite koupir dan Bidze, i annan pou fer avek trezyenm mwan saler. *Now*, byento petet pou annan en Lalwa lo trezyenm mwan saler ki pou vin devan Lasanble.

E nou'n ganny dir, nou'n tande dan bann nouvel partou dan bann kominikasyon Gouvernman, ki zot in revwar lafason ki trezyenm mwan saler i ganny peye. In annan serten amannman dan lafason ki sa Polisi pou ganny aplike.

Me lefe i reste Mr Speaker ki, pour lannen 2022 i annan en kantite travayer Seselwa dan Gouvernman ki'n travay, me ki pa'n neseserman ganny zot peyman trezyenm mwan saler, parey petet zot ti devret pe gannyen.

I annan ki a dir mwan pe dir sa bann dimoun petet zot pa'n travay ase dir. Zot pa'n travay ase *committed* pour zot kapab ganny zot *full* trezyenm mwan saler. Me mwan mon pou dir non, Mr Speaker. Mon pa krwar dan tou lenstans. Akoz mon pa krwar dan tou lenstans?

Mon Mr Speaker, malgre Gouvernman ti Bidze trezyenm mwan saler antye, mon

pwennvi se ki sa Polisi trezyenm mwan saler – ankor nou tourn lo Polisi e lafason ki Gouvernman i anmenn Polisi, e Gouvernman i aplik Polisi.

Mr Speaker, mwan mon krwar ki poudir sa Polisi trezyenm mwan saler in enn ki'n ganny fer vitman, vitman. E enn ki'n ganny fer kot bann lorganizasyon pa ti neserman ankor pare pou fer sa sistenm *appraisal* ki Gouvernman ti pe propoze.

E nou ti dir dan nou bann deliberasyon an sa ki konsern trezyenm mwan saler. Malerezman nou pa'n ganny ekoute lo sa kote latab e ozordi nou war rezilta.

Petet si sa bann zafer ti'n ganny *set* depi byen boner konmansman lannen tou dimoun ti konnen kote poto *goal* i ete. Kote nou pou tap boul. Tou dimoun petet ti ava met zot pare pou zot al travay *within* sa kad pou zot kapab fer sir ki zot benefisyé 100poursan zot trezyenm mwan saler.

I annan bokou landrwa Mr Speaker kot dimoun i dir ou; son *assessment* i pa'n neserman baze lo en baz *fair* e zis. E alors zot santi petet ki zot in ganny – zot in perdi loportinite pou ganny plis zot trezyenm mwan saler. Ouswa 100poursan zot trezyenm

mwan saler, aköz sa eleman *assessment* ki ti ganny entrodwi dernyen-r-er.

So, pour mwan Mr Speaker, i tourn ankor lo sa zafer Polisi. E mon pledwari avek Gouvernman ozordi se ki ler nou annan bann Polisi koumsa ki enpakte lo pep Seselwa, nou bezwen fer sir ki sa bann Polisi i vin boner. I donn Seselwa ase letan, travayer ase letan pou li kapab organize.

Pou li kadre li byen e pou li kapab si ou le benefisyé avek bann Polisi ki Gouvernman i met an plas, ki swa dan landrwa travay ouswa dan pei an zeneral.

Prezan Mr Speaker, mon pou vin lo lot kote sa *Supplementary Budget* i an sa ki konsern bann larzan ki Gouvernman pe demande. I annan apepre 200 – Mosyon i dir apepre R275 milyon 506 mil 848. Sa i larzan adisyonnèl ki ozordi ki Gouvernman pe demande, pou kapab finans serten bann proze ki Gouvernman i annan diran la ziska lafen lannen.

Now, mazorite sa bann proze Mr Speaker, i montre – mazorite sa bann proze, ou sa demann pour sa larzan, i montre inefikasite *planning*

Gouvernman. Mon pou dir sa, akoz Mr Speaker?

Nou ti annan nou en prose bidzeter. E ler mon get sa bann laliny kot Gouvernman pe demann larzan, mon pa war okenn *areas* kot i annan petet keksoz ki'n vin la pour la *or* ki *emergency*. Mazorite sa bann keksoz i bann keksoz ki *à mon avis* ti devret pe ganny *planned* letan ti pe fer Bidze an 2022 – Bidze 2023 an 2022.

I annan bann laliny Mr Speaker, dan sa *request* pour *supplementary* ki pour mwan Mr Speaker, i pa – i annan kestyon. Konmsi mon annan kestyon lo la Mr Speaker, *hmm?*

Annou get par egzanp – e nou ti ganny gran deba lo la dan Lasanble Nasyonal. Annou get par egzanp sa larzan ki'n antre, ki swadizan in antre dan Bidze pour *West Coast Project*. *West Coast Development Project* ki ozordi in ariv ziska dan sid. R100ekek milyon.

Minis ti vini ti dir nou proze i apepre R295 milyon. Dan laliny lo sa dokiman ki'n donn nou i zis R100ekek milyon.

E Mr Speaker, i annan en kantite kestyon. Minis ti vini ti dir nou poudir sa larzan pa'n antre dan pei. Me sa larzan i reste avek sa donater. E donater i peye *as and when* ki

proze i konplete *or* bann *invoice* i ganny anvoye.

I annan en kantite kestyon ki vin avek sa ki Minis in dir nou e sa ki nou pe war dan bann dokiman. Lekel ki pe fer bann *project supervision?* Lekel sa *project manager* isi? Kan mannyer *invoice* i ganny anvoye? Kote i ale? Eski Minister Finans ki aprouve? Lekel ki...

I annan bokou dout dan sa ki Minis li menm in dir nou e sa ki Minister Finans in vin prezant devan nou la. I annan osi Mr Speaker, par egzanp i annan 20 milyon pour *Land Transport Agency*. Sa pou *cater* pour bann nouvo *asphalting road*.

Mr Speaker ozordi i ti en prensip ou en Polisi *SLTA*, pour zot ler zot fer bann re sirfasman semen, ki sa louvraz i ganny fer par *SLTA* zot menm. Akoz zot, zot annan sa lekspertiz, sa kapabilite pou fer sir ki semen letan zot mete i dan en bon kondisyon, i ganny fer byen.

Me ozordi Mr Speaker, nou pe war en kantite bann kontrakter prive ki pe antre dan re sirfasman semen. Me i pa kler Mr Speaker. E la nou pe war *additional* larzan pe ganny demande, pour ankor kontiny sa bann travay.

Me i pa kler ki mannyer bann *tenders* pe ganny donnen. Ki mannyer bann diferan lakonpanyen pe ganny diferan kontra pou fer bann *road improvement works*.

So, Mr Speaker, menm si nou tou nou dakor ki poudir semen i bezwen ganny aranze, me sa 2 proze Mr Speaker i annan bokou dout ozordi – senm bokou dout parmi lapopilasyon.

E mwan mon annan dout lo lafason ki sa bann proze pe ganny enplimante e lafason ki larzan piblik ozordi pe ganny *disbursed*. Ki swa larzan piblik ouswa ki swa larzan donasyon.

Mr Speaker, nou osi annan en pwen ki mon anvi touse ozordi apre midi an sa ki konsern *Anti-Corruption Commission*. *Anti-Corruption Commission* i osi pe ganny en Bidze adisyonnèl R9 milyon 820 mil avek detrwa sou.

Now, sa leksplikasyon ki nou'n gannyen dan sa dokiman i dir nou bann *funding* adisyonnèl pou kapab pey bann *international investigators*. Si mon pa tronpe Mr Speaker, nou ti donn ACCS en Bidze apepre R60 milyon. Si mon pa tronpe en Bidze apepre R60 milyon. Zot ava koriz mwan si mon mal.

E ozordi ziska aprezan, nou pa konnen ki kantite larzan

ACCS pe gannyen *over and above* son Bidze pou dil avek posibleman en *case ou 2 case*. La mon pe war i dir; “*this is due to postponement of trial dates*”.

E mon krwar nou bezwen letan in ariv ler Bidze, asize koz ek ACCS, akoz i vin devan nou i demann nou en kantite Bidze, apre ou war li dan siplemanter. Lannen pase dan siplemanter mon pa konnen konbyen milyon nou'n donn li. Nou bezwen asize kont en kou, fer en *tally*.

Be ACCS, be konbyen larzan ozordi ou'n gannyen? Ki rezilta, sa kantite larzan ki pep Seselwa pe donn ou, ozordi ki ou'n anmennen? Eski sa kantite larzan i vo sa kantite louvraz ki zot pe fer? Or eski nou pe zis pey *international investigators* san okenn gran rezilta?

ACCS i bezwen vin dir nou, akoz R9.8milyon la nou pe donn ACCS ankor pou kapab kontinyen pey *investigators* zis akoz bann dat *trial* in ganny bouze. Eski *investigators* kwa, zot pa pe fer zot louvraz byen? Zot pa pe ganny rezilta, ki nou prezan pep Seselwa nou bezwen kontinyen peye? So, tousala i bann kestyon Mr Speaker, ki nou bezwen demande.

An gro Mr Speaker, menm si nou ganny dir ki poudir sa

larzan i pa nouvo larzan, me i larzan ki pe ganny resikle dan Bidze, me lefe i reste ki sa i *still* larzan, i *still* larzan pep Seselwa. I *still* larzan ki *taxpayers money* i investir dan nou pei. E nou bezwen kapab rann kont sa bann larzan.

Ozordi dan sa bann diferan keksoz ki nou war Gouvernman pe vin demande. Diferan larzan, kantite larzan ki Gouvernman pe vin demande, i annan kantite landrwa ki annan dout ankor. Petet mon pa pou al lo la akoz i annan bokou. Bokou landrwa kot i annan bokou inefikasite.

E ozordi Gouvernman i bezwen kapab reaziste son lekor. Reaziste son bann Polisi. Redwir linefikasite dan Gouvernman. Redwir aret fer dimoun tourn an ron. Met larzan Mr Speaker kot larzan i devret ale. Kot pep Seselwa i ava santi en diferans, en amelyorasyon dan son lavi – dan son sityasyon lavi.

E aret met larzan dan en ta keksoz, kot ozordi serten kategori ki benefisye, apre zot menm zot ganny *tax break*. Zot menm zot ganny rediksyon lo zot *tax*. Zot vin pli ris. Me mazorite Seselwa ozordi deor, i pe war li pe vin pli pov.

So avek sa Mr Speaker, mon pou aret la. I annan en

kantite keksoz dan sa *Supplementary Budget* ki dir nou poudir sa Gouvernman ozordi pa pe neserman *perform* alaoter ki i ti dir avek pep Seselwa i pou fer.

So, mwan mon war en kantite – *there's a lot of room pour improvement* avek sa Gouvernman. Mersi bokou.

(APPLAUSE)

MR SPEAKER

Mersi Onorab. Mon a pas laparol Onorab Esparon.

HON REGINA ESPARON

Mersi Mr Speaker. Bonn apre midi tou dimoun a lekout. Mr Speaker, mwan mon satisfè mannyer mon Gouvernman pe travay, e mwan mon pare pou donn li ankor 5an!

(APPLAUSE)

HON REGINA ESPARON

An gro, en Bidze Siplemanter in donn Gouvernman son loportinite pou redinamiz son Bidze e revwar depans ki ganny fer par bann Minister diran lannen.

E sa i permet Gouvernman annan sa bon disiplin fiscal. Sa *checks and balances* parey nou dir, lo ki mannyer bann Minister pe zer

zot Bidze. E en *Mid-Year Review* pa zis adisyonn larzan dan bann Minister, me i osi koup bann sonm ki pa'n ganny depanse.

Parey nou'n vwar kot bann sonm ki ti'n ganny mete pour *recruitment* ki pa'n ganny depanse parske bann pos ki ti'n ganny prevwar dan sa bann Minister kot ti annan retar pour *recruitment*, in ganny retire. Kot i a retourn dan kof Gouvernman e i a ganny redistribye.

Mon swe se ki bann Minister i vin pli responsab e pli proaktiv, parske i fer 2 lannen konsekitif ki nou war larzan pour *recruitment* i retournen.

Mr Speaker, oparavan ler en sonm ti ganny prevwar pou depanse pa ti ganny servi, en Minister ti kapab annan sa loportinite pou li *vire* sa larzan dan en lot landrwa. Be sa pa ti en bon pratik.

Be enn ki ti anmenn avek li bokou koripsyon e bokou disiplin fiskal, kot parfwa bann zistifikasyon pa ti neserman korek. Sa ki'n pase in pase. E pour Gouvernman vin pli pridan, i pran sa ki pa'n depanse e i redistribye, parey nou pe war dan sa legzersis *supplementary*.

Mr Speaker, pour nou dan distrik Glacis, mon soulaze ki

atraver sa alokasyon Bidze ki mon ti lev mon lanmen pou aprouve lannen pase, zabitan Glacis in kontinyen ganny lasante pour naryen. Bann *staff* dan klinik in kontinyen ganny zot saler. Zot zanfan in kontinyen ganny akse ek ledikasyon. E bann ansennyan in kontinyen ganny zot saler.

Proze dan distrik in demare. Nou'n vwar konstriksyon Bazar North East Point ki'n konplete. Proze Lakaz *ex-Ferrari* pe konmanse. Nou'n vwar kot *clearing* landrwa in fini ganny fer e byento premye pyer pou ganny depoze.

Bokou plis lalimyer in ganny enstale dan distrik Glacis. *Gear store* pe al konmanse byento. E *meeting* peser ki'n fer Sanmdi, in met sa kler devan bann peser poudir tre byento la lafen Novanm sa bann *gear store* la pou konmanse.

Malgre ki pa tou nou bann proze ki nou ti soumet ek Gouvernman Lokal ki'n materyalize, ki i ti ava mon swe, nou ankor pe ganny problem *wayleave* pou nou demar serten proze dan distrik.

Nou'n osi annan bokou proze semen ki nou anvi demare, me ki pa ankor *secure funding* li menm li. Nou pe soumet nou proze pour lannen

prosenn la tre byento avek Gouvernman Lokal, pou ki lannen prosenn byen boner bann proze ava demare.

Nou swe Mr Speaker, dan distrik Glacis, nou annan sa ki nou apel Semen Hoareau. Nou ankor pe espere. I sipoze *tender* la *any time* la.

Nou ankor pe espere pour sa semen demare pour benefis sa manman ki annan son pti garson ki avek dezabilite. Ki war li tre lour pou kapab desann avek li lo semen pou li kapab al fer son tretman. Sa i enn nou swe.

Nou annan semen kot Cyril Bertrand ek kot bann Estral. Sa osi nou annan problemm avek *wayleave* ki nou pe espere. Nou ti a swete ki i ti ava demare lannen prosen.

Nou annan semen kot lafanmir Azemia ek Bamboche. Laba osi nou pe ganny problemm *wayleave* e nou ti a swete ki nou kapab demar sa semen tre byento pour benefis sa bann dimoun.

Nou annan semen kot bann lafanmir Fontaine. Laba osi nou dan problemm avek *wayleave* pou nou kapab demar sa semen.

North East Point li menm li pe ganny en nouvo fasad ek bann nouvo devlopman. Nou pe ankouraz plis Proze PPP (*Public*

Private Partnership). E la byento nou pou annan *bus stop* ki pou demare Sorento.

E sa *bus stop* Sorento kot laboutik Mr Uranie laba i pou en Proze PPP dan distrik Glacis. E nou ti a swete ki nou ganny plis dimoun ki volonter pou vin demen, pou nou kapab demar bann pti, pti proze dan distrik Glacis.

E mon dir - *crash barrier* osi nou'n gannyen en pe partou e mon dir felisitasyon SLTA pour sa bon korporasyon ki nou gannyen dan distrik. E mon osi felisit mon DA, DA - Christelle William pour sa bon korporasyon travay ki nou annan ansanm.

Konsiltasyon i kontinyen pour Proze Lakaz 24-24-24. Gouvernman in aste en morso later prive pou kapab ganny semen pou ariv lo sa morso teren ki nou apel *ex-SACOS*. Parske malgre ki Gouvernman avan ti aste sa later, i enn ki ti anklave e akse semen pou ariv lo sa morso later ti vreman enposib.

E mon swe se ki an 2024, sa Proze 24-24-24 ava bouze pour benefis zabitan Glacis ki pa ankor ganny en proze lakaz pour plis ki 10an. Avek sa detrwa mo Mr Speaker, mon pou donn mon sipor pour sa Mosyon pou aprouv sa sonm

R275 milyon 506 mil 848.63 sou pour 2023. Mersi.

(APPLAUSE)

MR SPEAKER

Mersi Onorab. Mon a donn laparol Onorab Herminie.

HON WILBERT HERMINIE

Mersi Mr Speaker. Bonn apre midi Mr Speaker e bonn apre midi tou bann dimoun ki a lekout. Mr Speaker, devan nou, nou annan en deba lo Bidze Siplemanter. En konsepsyon ki nou lo kote *US* nou vreman pre avek. Nou'n abitye avek sa bann Bidze.

Me selman en keksoz ki mon war i drol, i se ki pandan 6enm Lasanble, tou kou nou'n ganny dir par *LDS* sa bann letan, ki zot, zot pou fer pli byen ki zot pa pou servi sa mekanizm *Supplementary Budget*, aköz zot pou fer sir ki depans Gouvènmàn i sou pour sou.

E ki *Supplementary Budget* i en *tool* ki *allow* Gouvènmàn pou depans larzan ki i napa. Me selman la ozordi nou war ki zot vin avek sa 3an konsekitiv. I montre ki zot pe aprann keksoz.

Mr Speaker, i enportan pour Lepep Seselwa konnen ki aranz semen, fer renovasyon lo bann *building* i en keksoz ki

normal ki tou Gouvènmàn ki pou la pou fer – bann oparavan e bann ki pe vini. Aköz sa i sorti dan larzan *tax* ki nou, sak nou i peye.

So sa i pa en gran zefor ki zot pe fer. E zis pe kontinyen en travay, en fason fer ki ti deza la. I enportan pour Lepep Seselwa konnen sa e konpran li tre byen ki zot pa pe fer okenn kado person. Se en travay ki'n ganny elekte pou zot fer, e zot bezwen fer li pli byen parey zot ti dir zot pou fer.

Mr Speaker, rezon sa *Supplementary Budget* i senp, se ki i annan bokou konsesyon ki'n ganny fer lo bann gro biznes lo kote *tax*. E prezan sa in kree en trou R800 milyon ki bezwen ganny rekouver.

Sa ki nou war zot pe fer, nou pe viv bokou lo bann *grants* avek *Treasury Bills* ki Gouvènmàn pe pran pou sey bous sa bann trou ki'n ganny kree par sa bann konsesyon ki'n ganny fer san konsilte lamazorite pep Seselwa.

Mr Speaker, kwa ki nou pe war ankor zot pe fer? Pou zot kapab kouver sa R800 milyon ki zot in kree dan Bidze, zot in bezwen ale al trangle bann malere par met plis *tax* lo ledo bann touris, pou zot kapab sey kouver sa trou ki nou war dan Bidze. Ki pe fer li difisil pour

Lepep Seselwa kapab fer 2 bout zwenn.

Lo papye, nou war tou keksoz i bon, tou keksoz i parfe. Me selman an realite pour nou bann frer ek ser Seselwa ki antre dan laboutik, ki al fer bann marsaye pou zot kapab fer 2 bout zwenn.

Zot war zot menm ki keksoz pli ale i vin pli difisil e pli difisil pou zot kapab met keksoz lo lata pou *provide* pour zot vant e vant zot fanmir. Nou pa pe fer gran ekstravagans. Zis pou *provide* manze avek bann *basic needs* in vin difisil e pli difisil.

Mr Speaker, be ki nou war ki Gouvernman i fer? I kontinyen fer bann *creative accounting* pou fer krwar ki nou pe *save* larzan. Kan an realite, napa okenn larzan ki pe ganny *saved*.

Zot koz nou *savings* dan *recruitment*. Solman, tou lazournen nou ganny bann dokiman ki bokou pozisyon pa ankor ganny *filled*. E Seselwa aktyelman pe rod plas travay pou zot travay, e zot pa pe gannyen.

Me ki Gouvernman pe fer li? I pe fer *savings* lo *recruitment*. Sa i montre ou klerman Mr Speaker ki sa Gouvernman *LDS* napa en leker pour Lepep Seselwa. Akoz nou,

nou deor pe rod louveraz. Selman Gouvernman li ki pe fer? *Savings* lo *recruitment*!

Mon pou toutafe dakor avek Onorab Monthy ki sa i montre en linefikasite ki mannyer sa Gouvernman pe *operate*. Lo papye zot dir ou *savings*. An realite de mil e de mil dimoun pe rod louveraz. Sa ki mannyer i apele sa Mr Speaker?

Mr Speaker, en lot keksoz ki mon anvi tous lo la se ki nou ti war *Electoral Commission* vin la dan Lasanble e dir nou ki zot pe rod travayer e ki zot menm zot bann Komisyoner i bezwen fer bann louveraz *clerical* pou ed zot *staff*, zot Departman Administrativ akoz napa ase *staff*.

Be ki nou war dan bann dokiman ki'n *supply* avek nou pour nou kapab debat lo la? Nou war ki Gouvernman pa'n ekoute ki *Electoral Commission* pe fer, pe demande.

Zot in koup ankor lo *recruitment*. E i montre ki menm si sa bann dimoun in vin la dan Lasanble, lot kote in donn sipor, me Gouvernman li – sa Gouvernman *LDS*, pa le tande. *Freeze* ankor dan *recruitment* pour *Electoral Commission*.

Mr Speaker, en lot pwen ankor ki kontroversyal, ki

kantmenm nou'n sey rod klarifikasyon, nou pa'n kapab gannnen. Sa i lo bann proze kapital. Sirtou sa Proze *West Coast Project*. Sa i en keksoz ki en mister dan li menm.

Premye fwa mon'n war ki en proze sa groser – sa groser devlopman lenvestisman ki i ganny mete anba bout Polisi anba Minister Transpor.

Dimoun ti ava konpran ki en proze sa groser ti pou ganny mete anba *Land Transport SLTA* kot zot, zot dil avek enplimantasyon. Sa en keksoz ki i normal, i norm depi ler later, e later pe ganny *operate* koumsa.

Be la ozordi mon pa konnen ki mannyer ouswa kwa ki pe ganny kasyet ki nou war sa groser sonm in ganny mete anba Departman Transpor.

Li ki li i dil avek Polisi. I dil avek Polisi, pa enplimantasyon. Me selman sa gro sonm 100milyon ekek in ganny mete la, in ganny parke la, mon pa konnen aköz.

Minis dan son lentervansyon ti dir nou ki sa proze i R285 milyon. Me la dan Bidze nou war R100milyon ki'n ganny mete, e sa lot 195 nou pa konnen kot in ale. Nou'n sey demann kopi kontra, nou pa ankor gannnen.

Nou'n sey demande; eski sa proze in ganny *tender*? Zot in dir nou koumsa sa proze in *tender* an servis *selective bidding*, ki pour mwan pour en proze sa kantite milyon rounpi pou servi sa kalite pratik koumsa, i vremen, vremen, vremen pa byen.

Akoz nou annan nou bann Lalwa *Tender* ki'n ganny met an plas ki *National Tender Board* i *supervise*. Pour ki en proze sa *magnitude*, bokou lezot kontrakter zot ti kapab partisip ladan - ti a kapab partisip ladan.

I ti ava en *open tender* ki tou dimoun ti a konnen lekel ki'n gannnen. Kontra ti a ganny sinyen. Konbyen larzan in ganny donnen e kantite letan sa proze pou ganny fer.

La i annan en nespes gro fernwar lo la. Nou pa pe war ki pe arive. Nou ganny zis dir ki larzan pou pey direk avek kontrakter. *Invoice* nou pa konnen lekel ki pou *raise*. E i zis montre nou ki nou pou napa okenn *oversight* lo la.

Lasanble pou napa okenn *oversight* lo sa kalite demagozi ki pe arive, menm si nou'n demann kestyon nou ganny koupe.

So, i annan en nespes konfizyon ki pe arive la anndan lo sa kote sa proze ki

malerezman, malerezman i pou ganny pase akoz mazorite *LDS*.

Me solman nou bezwen met lo rikord ki i annan en ta keksoz ki *unclear*, ki pe ganny kasyet ki nou pa pe war. E sanmenm sa ki nou dir nou mefye zot.

Nou bezwen mefye ler nou dir i dir koumsa i annan 295milyon e nou war zis 100milyon dan Bidze. Kestyon pou reste kote sa lot 195 in ale. Me sa, Lepep Seselwa i a ziz pour li menm.

Mr Speaker, en lot pwen ki ankor ki mon anvi ganny tous lo la se ki, bokou fwa Gouvernman i dir nou koumsa i pou fer en keksoz epi i fer le kontrè. La nou'n tande dan deba ki zot ti'n Bidze larzan total pour trezyenm mwan saler. Sa pa mwan ki'n dir. Bann Manm lot kote latab in dir zot in Bidze larzan total pour trezyenm mwan saler.

Me selman ki nou'n war? *Mid-term* - dan milye lannen nou'n war ki Lalwa in vin kot Lasanble e trezyenm mwan saler in ganny peye lo en lot fason. 50poursan garanti, 50poursan lo performans.

Sa i en keksoz ki pa akseptab. Pa akseptab akoz ler *game* in konmanse, Lalwa ti en manner. Ler dan milye *game*, nou war ki i annan en sanzman

dan Lalwa. E sanmenm sa ki i annan *savings* dan trezyenm mwan saler, akoz sa bann dimoun pa'n ganny peye.

Si ou ti'n prevwar sa larzan, zot ti avan'n fini pey sa bann dimoun e ti pou napa *savings*. Tou sa bann dimoun ti avan'n ganny zot larzan ki zot ti devret merite. I montre ankor ki sa Gouvernman i dir nou en keksoz epi zot fer en lot keksoz.

Zot vini zot dir ou koumsa; zot ti'n mete larzan dan Bidze. Be selman sa larzan pa ale ek ou, so ou a ganny zis en bout epi nou a fer *savings* lo la. Sa ki zot pe fer avek Lepep Seselwa. E i pa normal pou zot kontinyen bat latet Seselwa avek sa bann taktik, epi dir nou koumsa i annan *savings* lo trezyenm mwan saler.

Of course pou annan, ou pa'n pey sa bann dimoun. I vin konman *savings*. E prezan sa bann *savings* nou pa konnen kwa ki zot pe al fer avek. I pa kler. Zis met '*savings due to thirteenth month pay*'.

So pour mwan Mr Speaker, mon war li en pe – i annan tro bokou konfizyon pou mon kapab aksepté avek sa – *go along* avek sa *Supplementary Budget*. Akoz i annan tro bokou keksoz ki pe ganny kasyet e keksoz ki pe ganny bouze ki pa kler.

E sanmenm sa ki nou lo kote nou latab tou kou nou mefye zot nou, akoz keksoz i ganny kasyet lo bann keksoz ki pa kler. Zot pran keksoz zot met anba departman ki sipoze al anba – met anba Minister ki sipoze al anba departman. Zot dir nou sa i normal, sa en pratik normal.

Zot dir nou i annan *savings* lo *thirteenth month salary*, zot in *budget* tou. Selman epi zot pey zis en bout, zot dir ou *savings*. Zot dir ou koumsa Seselwa pe rod travay, me selman i annan *freeze* – *savings* dan *recruitment*.

So i montre ou ki sa Gouvernman i fer totalman le kontrè ki i dir i pou fer. So avek sa Mr Speaker, mon pa pe war mon kapab sipòrt sa *Supplementary Budget* dan fason ki i ete la pour lemoman. Mersi.

(APPLAUSE)

MR SPEAKER

Mersi. Mersi Onorab. Mon a donn laparol Onorab Michel Roucou.

HON MICHEL ROUCOU

Mersi Mr Speaker. Bonn apre midi a tous. Mr Speaker, mon osi oule swet bann *teachers* kot lekòl Mont Fleuri Segonder e

Primer pou pas en bon *Teachers Day*.

Mr Speaker, sa Bidze Siplemanter ki'n ganny anmenn kot nou Lasanble la ozordi, mon war li poudir se ki i en kontinyasyon. I en kontinyasyon dan bann travay ki nou Gouvernman pe fer.

Me selman par kont, mon kapab ganny en konpran akòz ki i annan serten Onorab zot dan konfizyon! Zot pou toultan reste dan konfizyon Mr Speaker. Akòz? Nou pa kapab fer sa pep krwar deor poudir isi Sesel nou plant diri. Nou pa plante diri.

Definitivman nou pou bezwen ekspekte poudir ler pri pou monte dan bann pei kot nou, nou enport sa bann marsandiz, i pou enpakte lo nou pei. E nou konman en pti nasyon Mr Speaker, nou Gouvernman pa kapab vini fer krwar avek Lepep Seselwa poudir disel i vann...

(Interruption)

HON MICHEL ROUCOU

Mon pa pou nonmen pangar i vin en probleman. Akòz Mr Speaker, Seselwa ozordi in elekte en Gouvernman ki pou dir li fran ki direksyon i pe ale. Kot nou dan difikilte, nou

bezwen fer konnen sa pep poudir nou dan problem!

E si ozordi i arive poudir vremen ki delwil deor pou monte, nou bezwen vini poudir ek pep Seselwa; wi, delwil pou monte; ekspekte poudir i pou annan en lenpak lo Sesel.

Nou pa kapab kontinyelman vini fer krwar poudir Gouvernman li menm li i *superman*, ki i pou kapab sov tou keksoz. Non, nou pa kapab fer. Be sanmenm sa ki i annan ki pou toultan ki pou reste dan konfizyon. Ki i pa pou dakor ler nou dir ek Seselwa laverite.

Mr Speaker, ozordi ler ou pe get Sesel nou, nou Gouvernman nou pe sey ankouraz bann travayer pou zot pran responsabilite. Ekspreseman ki ozordi i annan sa poursantaz ki ganny mete lo trezyenm mwan saler. 50poursan ou ganny li otomatikman. Be en lot 50poursan ou bezwen - ordinerman...

Granmersi i pa'n met 100poursan ki ou bezwen delivre pou montre. Zis en legzanp mon a donn ou Mr Speaker; mon ti pe koze avek en CEO. Dan pe koze i dir ek mwan koumsa poudir se ki i pe sey ankouraz serten son bann *staff* pou antre travay boner.

In kriy zot. In koz avek son *staff* pou dir li. Konmsi i pe sey son mye i ganny en konpran li konmsi ki demen avek plizyer *warning*, i pou bezwen pran en aksyon. Be i annan *staff* ki vremen zot *still* pa le ekoute. Zot le anvoy latet ler i dir zot vini, ou bezwen vin a ler travay. Ou bezwen travay, donner.

Wi, nou annan problem lo kote serten servis dan bann departman Gouvernman, ki i annan serten *staff* ki pa delivre parey i merite. Be selman atraver sa trezyenm mwan saler, i pou montre sa *staff*.

Akoz en *staff* ki li i vini, toulezour i delivre. Onorab Arissol in deza koz lo la plizyer fwa. Ki mannyer mwan mon vini mon pou travay, mon pou donner? Ler ou, ou vin an retar, mwan menm mon mon'n fer ou travay. Selman lafen lannen, ou menm ou, ou pou ganny menm poursantaz avek mwan.

Me i pa ankourazan Mr Speaker! I pou dekouraz sa enn ki pe donner dan travay. E kontrer nou bezwen dir avek bann ki pa pe donn sa standar servis, pou zot vini zwenn ek bann ki annan sa lankourazman. Sa i tipikman sa ki i pe ganny dir la deor. Se bann *staff* ki la ki zot pe travay - vini delivre.

E par kont, nou osi dir avek bann ki *appraise* bann *staff*, poudir fer sir poudir ler zot fer *appraisal*, pou fer sir poudir bann ki pe donner, ki zot pe ganny zot bann pwen pou zot ganny zot trezyenm mwan saler lo zot poursantaz ki zot in delivre. Ki i pa fer li vin en keksoz personnel ki pou dekouraz okenn manm *staff*.

Sa en pti pe mesaz ki nou, nou devret ankouraz avek mazorite travayer la deor. E ler nou pe koz lo kote *recruitment* Mr Speaker, zis si mon pa tronpe dan nouvel yer swar, Minis Billy Rangasamy pe ankouraz bann zenn pou zwenn son Minister - pou vin travay. Akoz i war sa mankman.

Be selman, par kont nou anvi dir avek mon Gouvernman ek bann dimoun ki dan bann departman, pou anmenn plis lankourazman. Ler nou pe mazin donn promosyon. annou get en pti pe nou bann *staff* ki la anndan dan bann departman. Annou gete pou ankouraz zot.

Konmela kot *Guy Morel Institute* Mr Speaker, i annan diferan *course* ki ou kapab al *attend*, ki ou departman li menm li pe ankouraz ou pou ale, zour i war sa potansyel dan ou. Ki sa osi i a kapab elev en pti pe standar lo nivo servis, e

donn lankourazman bann ki vin apre.

Ki nou pa war poudir mon departman ki mon pe travay ladan pour sitan bokou letan, ki mwan mon'n la mon'n prouv mon lekor, ki zour i annan en pozisyon li, i pa ofer mwan. Selman i al rod en dimoun an deor.

E dan bann departman nou bezwen ankouraz bann travayer. Bann ki la, bann ki pe donner, bann ki montre poudir zot annan sa lanvi, si fodre, annou investir dan zot pou anvoy zot bann *course* Mr Speaker. Sa mon mazine i ava ede ek en pti pe ek sa zafer *recruitment* dan bann landrwa travay, *once* ki ou investir ladan.

Mr Speaker, be ler ou pe get bann devlopman dan distrik, mwan mon pou dir mon vremen apresye ek devlopman ki mon war pe arive dan mon distrik. Mon'n war nouvo Lekol Ners ki fek ganny inogire pa bokou letan, Mr Speaker.

La byento nou pou war nouvo Lopital Sesel ki pou ganny konstrir konmansman lannen prosen. Ler ou pase dan Semen Mont Fleuri avek problem ki bokou dimoun in eksprim zot konsern an term lo kote trafik, nou'n war poudir

lagrandisman semen in konmanse.

Be selman i pa ariv ozordi pour demen. I pou pran letan. Nou pou bezwen kas dizef pou fer lonmnet Mr Speaker.

E osi ler ou monte, Mr Speaker, Corgat Estate ozordi ou war 16 *unit* ki pe ganny *build*. Yer mon'n ganny en pti moman letan mon'n sot laba ek bann zofisye lenfrastriktir pou mwan al vizite ki zistans travay in arive. Be selman i malere Mr Speaker, ler bann travayer i la pe donneren ki byento 16 fanmir a kapab ganny zot lakaz.

Nou war poudir i annan ki pase aswar i *threaten* bann travayer ki la lo teren. I met kouto anba zot likou. Zot vole, zot fer vandaliz. Be sa pa pou ede poudir ki proze i ganny delivre lo son *deadline*, ki la aprezan a kapab bouz lo sa 24 *unit* ki pou al *build by* lannen prosen Mr Speaker.

E nou, nou bezwen – petet mon a profit la pou nou dir ek bann zabitan zot menm zot ki reste la dan sa kominote; pou nou pa toler bann aksyon koumsa, akoz i pou met zot menm zot retar.

E osi mon pou profite pou mwan dir zot, bann ki pa pe fer zot kontribisyon; fer li, ki demen ler bann nouvo lakaz in fini fer, zot a kapab ganny

asiste zot osi. I pa lo diskresyon *MNA* sa, pour *MNA* vin gete lekel ki pou donneren. Non!

Onorab Vidot lot fwa mon'n ekout li byen apre ki i ti annan alokasyon dan son distrik, i ti eksplike byen ki mannyer i ti fer. I annan en komite kot *Housing* ki i bezwen anmenn zot bann kriter lo la pou ganny diskite.

E zot, zot bezwen pe fer zot kontribisyon ki ler bann nouvo lakaz i fer, tou dimoun i ganny asiste.

E osi Mr Speaker, Lotorite Distrik in vini in apros Minister *MLUH* pou gete si - dan sa napa later la - pou gete si nou pa kapab servi kot *ex-Mont Royale* pou nou kapab *build* nouvo lakaz, pou asiste bann zabitan.

E nou osi parey bann larestan Manm in koz lo la Mr Speaker, nou vreman apresye anba *Local Government* ek Departman Lenfrastriktir an term bann pti proze ki nou war in arive dan distrik. I annan bokou proze bann *parking facilities*, semen li menm li.

Lalimyer ki'n ganny mete dan plizyer landrwa pou fer sir i annan laklerte, spesyalman pour nou bann paran ki leve granmaten pou al travay. E bann lezot proze ki pou vini lannen prosen in fini ganny diskite, ki pou plis lo nivo

semen i osi. Ki pou benefis anba pti proze distrik.

E nou konman bann *Leaders* Mr Speaker, nou bezwen kontinyen ankouraz nou bann dimoun dan nou distrik pou leve pou al travay, pou zot kontribye. Ki sa larzan i ganny anmase pou kapab fer plis devlopman dan distrik.

Mr Speaker, mwan mon pou donn mon sipor sa Bidze Siplemanter la, ki'n ganny anmennen kot Lasanble. E mon kapab dir ki se ki mon war poudir mon Gouvernman malgre ki nou'n pas dan 2an – 2an ki nou'n dan *COVID* Mr Speaker.

E ozordi nou war ki lekonomi pe rekipere dousman, dousman. Nou'n war *Condor* ki'n retourn ankor ek bann larestan *airline* osi ki pou tournen. Ki bann touris ler i vini, pou anmenn larzan dan nou lekonomi, pou ed bann biznes.

E ozordi, nou devret pe ankouraz bann biznes ki zot war zot dan en difikilte. I annan diferan bann le nesese ki'n ganny mete la atraver pou kapab sey ed zot. E menm bann biznes, annou rod fason pour nou kapab revwar nou biznes.

Annou pran li konman en *challenge* ki mannyer nou kapab ede, Mr Speaker, akoz

Gouvernman pa pou kapab ed tou dimoun. I pa pou kapab sov tou dimoun.

E demen i arive, Gouvernman li menm li i war li dan en sityasyon. Si ou pe depan antyerman lo Gouvernman. Be ou osi tou ou pou war ou tonbe ansanm avek li.

E ozordi mon vremen apresye ki mon war poudir *IDC* pe fer bann lesey. Si mon pa tronpe mon'n war zot pe sey plant zonnyon Mr Speaker, ki sa i a ede demen si i annan le nesese ki nou aret enporte.

E nou Sesel nou a kapab prodwi nou prop zonnyon lo nou bann zil, ki sa i ava ede - Kot nou'n war prodwi kanmaron in re demare, ki sa i ava ed nou lekonomi.

E pour mwan terminen Mr Speaker, mon pou donn mon sipor e mon pou ankouraz nou bann frer ki dan bann departman Gouvernman pou zot travay. Travay pour sa saler ki zot pe gannye. Travay pour zot ede ki zot ed zot departman, zot lakonpanyen pou bouz pli devan. Mersi Mr Speaker.

MR SPEAKER

Mersi Onorab. Nou a pran poz la e nou a rebran deba 4er. Mersi.

(BREAK)

MR SPEAKER

Byen, nou a rebran deba. Laparol prezan pour Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun a lekout. Mr Speaker nou vwar ki Gouvernman tou le lannen – sa i depi nou Gouvernman oparavan, kot ti vini dan Lasanble e ti demann Lasanble pou aprouv Bidze Siplemanter.

E nou tou nou konnen Bidze Siplemanter i ganny demande swa pou kapab fini serten proze ki annan pou fini fer, ki'n konmanse – ki annan pou fini fer. E lezot travay enportan osi ki en Gouvernman i annan, pour li kapab fini fer pandan en lannen.

E Bidze Siplemanter lapliparditan i vin dan milye lannen kot Gouvernman in kapab war in fer serten *savings* pandan sa premye 6 mwan.

E kot i vini pou li vin demann Lasanble pour li kapab kontinyen servi serten larzan kekwfa ki ti anba lezot *vote*, ki pa'n ganny servi. E pour li kapab anvoy dan serten lezot kekwsoz, oubyen re distribye li dan lezot Minister. Sa ki byen nou fer resorti ozordi; mon

annan mon koleg Onorab Esparon taler in nonmen ki Gouvernman oparavan, nou ti zis depanse petet nou pa'n vin devan Lasanble pou nou fer parey pe ganny fer la.

Me sa i pa leka. Akoz Mr Speaker, mon krwar nou tou nou konnen ki depi 2012 sa *PMF Act* ti ganny pase - *PMF Act* ti ganny pase e i kler ladan ki i dir ki; okenn depans ki Gouvernman i annan pou li fer, i bezwen vin rod aprouvasyon Lasanble Nasyonal.

E Konstitisyon osi i dir nou sa. Konstitisyon i *stop* sa zafer *virement*. Alors petet sa *statement* ki'n ganny fer in en pti pe *misleading*, ki petet i bezwen ganny korize.

Mr Speaker, en kantite keksoz in ganny dir par mon bann koleg dan kote Gouvernman e osi mon bann koleg isi lo kote latab. Gouvernman i pou toultan *praise* son bann *MNA*. I pou toultan *praise* son lekor poudir ki i pe fer byen. Sa i normal sa, akoz zot ki dan Gouvernman.

Nou osi letan nou ti dan Gouvernman nou ti *praise* nou lekor, nou ti dir nou pe fer byen. E nou ti pe fer byen. Me par kont, sa ki nou pe realize ozordi – mon koleg Onorab John Hoareau in fer en *statement* ki'n

dir; "Sesel anba Gouvernman LDS pe vremen fer byen!"

Me sa ki mwan ti a kontan atraver sa deba lo sa Mosyon ozordi, demann ek pep Seselwa la deor; eski sa ki zot pe vwar? Eski vre Gouvernman LDS pe vremen fer byen? Eski vre ozordi tou dimoun i santi li i pe ganny en *fair share* dan sa ki sa Gouvernman pe delivre, dan sa ki sa Gouvernman pe fer ozordi?

I annan i kapab dir ou wi. Me en bon mazorite mon krwar i pou dir ou non. Mon pas devan laport dimoun. Nou fer *door to door*. Mon'n al dan diferan distrik pou koz ek dimoun. E sa leokri ki annan la deor ki dimoun pe dir ou ki i pe santi.

Kot nou'n ganny dir; i al kot *welfare* ozordi. Nou pe felisit *welfare*. *Welfare* i asiste, i ede. Serten dimoun wi i ganny ede. Me mazorite pa gannyen ede. *Ok?* I annan dimoun ozordi – *carer* pe ganny demande pou pey...

En vye dimoun i le en *carer*. I pe ganny demande pou Gouvernman ed li ek en *carer*. Son kont i ganny fouy ladan. Kont son zanfan i ganny get ladan e i dir; pey ou *carer* ou menm.

En dimoun i pe travay. I al devan i ale i al rod en lasistans. I dir pour sa mwan i

pa pe kapab fer 2 bout zwenn. Ler son rezilta i vini, i dir li poudir; non nou pa pou kapab ed ou.

Me i pa pe demann sa bann lasistans sa bann keksoz koumsa pour tou dilon. Me petet a en serten letan in war li in annan en bezwen, e in vin devan sa Gouvernman ki pe fer sitan byen. In demande pou ed li e i pan gannyen sa led.

So alors, mon osi mon santi ki i annan en kantite *room for improvement* pour LDS fer. An sa ki konsern depi son gouvernans sa pei. E an menm tan an sa ki konsern get dan *welfare* pep Seselwa. Get dan *welfare* travayer. Wi nou'n donn 10poursan.

E ki pe arive ozordi? Sa 10poursan in fini ganny anvale sa, akoz nou war pri lavi in monte. Fini pet plafon. I pou kontinyelman monte. E toultan travayer la deor pou kontinyelman pe dir pou dir sa larzan i pa ase.

E nou pou bezwen – Gouvernman li menm i pou bezwen kontinyen rod fason vwar ki mannyer i pou bezwen kapab met larzan dan pos Seselwa, parey zot kontan dir. Zot ti dir pou dir zot pou donner. E zot kontan koz lo zot *manifesto*. Zot ti dir zot pou donner larzan pep Seselwa.

Letan nou get osi lo sityasyon bann dimoun aze. In annan en propozisyon ki'n dir ki petet sa pansyon, Sekirite Sosyal osi ki dimoun aze pe gannyen, nou vwar poudir i pa ase. Menm si i annan ki'n ganny sa pti R500. I annan ki'n ganny R250 lo sa - ler letan i azout zot pansyon ek sekirite sosyal. *Still* i pa ase.

Ozordi pansyoner pe plennyen zot osi. E kwa ki fer li pli fermal se ki ou vwar en ners in travay, en *teacher* in travay. Ozordi in nepli kapab, i lo lili. Parey mon'n dir, i bezwen en dimoun pou okip li. E son kont in ganny get ladan. Petet in anmas son pti larzan pour li aste son serkey. Pou li fer en lot pti keksoz. En keksoz i kase dan lakaz pour li ranplase.

I ganny dir; ou annan sa larzan. Servi ou larzan pour ou kapab pey ou *carer*. Ou zanfani osi menm si i annan son *loan*. *Whatever burden* ki ou zanfani osi i annan, i ganny dir met larzan ansanm, pey en dimoun pou kapab okip ou.

Sa bann keksoz koumsa mon krwar, Gouvernman i devret annan en leker pou get plis. Get en pti pe plis dan ka bann dimoun ki vreman dan bezwen. Get dan ka en pti pe plis bann dimoun ki vreman vilnerab la ater, pou nou gete ki

manner nou kapab lev zot en pti pe pli byen.

Letan nou get lo kote bann Minister Mr Speaker, mazorite Minister la larzan in ganny koupe dan zot Bidze. I dir ou zot pa'n kapab fer *recruitment*. Mwan mon krwar in plis ki ler pour bann Minister – la nou pe koz tou Minister, pou zot kapab asize pou zot vwar sa legzersis *MBE* ki zot pe fer.

Vwar byen lakantite dimoun ki zot vreman bezwen dan zot lorganizasyon. E sey konmans fer sa bann *recruitment* en pti pe boner.

Parfwa i annan bann senp travay. Mon pa konnen ki kantite kalifikasyon zot pe rode ek sa bann dimoun. E parfwa i fer ki sanmenm sa zanmen zot gannyen sa bann kantite dimoun *or* kalite dimoun ki zot bezwen.

Or parfwa ou pe mazinen; eski nou pe tro swazir dimoun ki sanmenm sa letan i ganny letan pase, ki sa larzan i bezwen tournen? Sa osi i bezwen annan en bon evalyasyon.

Nou bezwen regard byen ki manner sa bann diferan Minister zot pe travay lo zot bann *MBE* pour zot kapab *meet* zot *target*. Me non pa tou le lannen larzan i ganny retournen kot i ganny dir i

ganny koupe akoz Zen in pase, e zot pa'n kapab fer *recruitment*.

Ler ou pe koz travayer osi dan bann Minister Mr Speaker – mwan mon en dimoun mon'n koz ek bokou travayer. Mon krwar mazorite *MNA* osi bokou travayer i koz ek nou. E sa ki mwan mon'n ganny dir; i annan serten Minister - non pa tou.

Serten Minister i annan dimoun i dir ou poudir sa lafatig ki zot annan zot santi zot ganny *drain* en kantite akoz sa problem larzan ki'n koupe e tournen dan fon Gouvernman. Akoz pa'n kapab *recruit* menm. I dir ou zot fatige, zot *drain*. Zot pe fer travay 3 dimoun, 4 dimoun.

Akoz tou le lannen - i annan i fer 3an, i dir ou tou le lannen pe *recruit* selman ou pa war dimoun. Dimoun i annan i vin *interview*, pa ganny pran. Sa dimoun i *still* reste li tousel e kontinyen fer travay detrwa dimoun.

So bann Minister, annou lev en pti pe. Annou fer sir ki nou get byen dan *welfare* nou bann travayer, wi. Akoz en travayer fatige. En travayer ki latet i fatige, i ariv se li fatige. Sanmenm apre ou pou vwar ki i pa donn bokou – i pa donn bann bon rannman.

E la kot i ganny kritik petet parfwa, kot i annan

landrwa ki ou tann dir *or* dimoun pe dir – Prezidan menm in deza dir; zot pe trenn lipye. Me petet nou bezwen get byen. Landrwa travay i bezwen get byen en pti pe dan *welfare* zot travayer. *Additional training*, wi i enn ki nou pou koz lo la ki nou'n dir donn dimoun.

Me *still* selman i kapab osi dan larzan ki'n tournen la, petet i annan *staff* pa ankor kapab gannyen *training*. E ou war sa bann larzan osi i ganny retourn dan Bidze, e travayer i kontinyen travay e zot pa pe ganny *trained*.

Ler mon regard lo kote mon distrik Mr Speaker, ou vwar bokou larzan ki'n tournen ozordi i dir ou bann *grants*. Bann proze ki ti pou tonm anba *grants*. I fer 3an konsekitiv.

Semen Grand Rivière, Larzan i dir in mete; 5milyon, 6milyon – la sa lannen 5milyon. Tou le lannen ou vwar ki Lenn pa'n donn *grant* pou kapab fer sa serten proze. E petet mwan mon pe mazine akoz dimoun laba deor, parey bann dimoun Proze Grand Rivière Anse Royale, zot pe espere. E laba i annan en kantite kot sa proze pe fer i mazorite bann vye dimoun ki reste dan sa landrwa.

Le 19 Out Mr Speaker, ou ansanm avek Prezidan e tim

LDS ti mont Anse Royale, zot ti al fer kanpanny. E Prezidan ti fer serten promes avek serten dimoun Dan Lafous kot in dir; Mrs Quilindo, nou pou donn ou, ou semen.

Mon pe mazine petet, mon pa konnen kek Bidze Siplemanter ti'n kapab mete, petet Mrs Quilindo ti ann kapab ganny dir. Mon ti ann dir li poudir be; i annan en pti larzan. Ou pou al gannyen ou semen. Be nou ava espere pour lannen prosen, nou ava regarde si Mrs Quilindo pou gannyen sa semen ki in ganny promet.

E i annan bokou promes aktyelman ki ganny fer letan nou pe pase - letan zot pe pase zot pe al kot bann dimoun. E sa la, i pa reflekte byen mon kapab dir, sirtou parfwa lo bann distrik – zot pe pas kot bann distrik kot *MNA US* in ganny elekte. I byen.

Be bann garanti ki zot in ale ki'n donn sa bann dimoun ki nou pou al ed ou, nou pou fer sa tel keksoz. E ler ou gete avek en Bidze ki'n koupe, ou zis *wonder*; eski i laverite ki sa bann dimoun ler in vin devan ou laport, in dir ou poudir i pou vin fer sa tel keksoz? I pou al rezourd sa tel problem deswit, imedya, o pli vit posibil?

Out in ale, Septanm - la nou'n ariv Oktob. Pe al 2 mwan.

19 Oktob i a ganny 2 mwan. Mon pou kontinyen *monitor* pour mwan regarde si tou – akoz mon annan mon lalis tou sa bann konplent ki bann dimoun in fer.

E mon pou regarde kote nou pou ganny Bidze la dan sa ki pe al aprouve pou donner - Kote ki nou pou gannyen pou nou kapab rezourd problem sa bann dimoun? *Old People's Home* Anse Royale, li osi i fer apepre 3an konsekitiv larzan anba *grant* ki'n ganny mete. E *still* nou war i kontinyelman koupe.

Mwan ki mon ti ava rekomannde Mr Speaker; in plis ki ler petet nou pa tro fye lo sa bann *grant* akoz parfwa wi ou ganny dir ou pou gannyen. Nou ti sanse Anse Royale nou ti ganny pour sa premye faz sa Semen Grand Rivière. Me apre ou pa zanmen konnen.

Alors, petet Gouvernman i osi i merit gete ki mannyer i osi i pou *chip in* dan sa bann proze, ki ler in konmanse in ariv en serten staz i pa ganny kit lanmenm anpandan. Akoz la i fer 3an ki proze in konmanse. E ki'n ganny kit lanmenm dan semen, e nou ankor war nou pe lite avek, pe lager avek.

So petet dan bann Bidze a lavenir ki pou vini, Gouvernman i bezwen rod en

fason pou li osi met en bout larzan ladan. Ki si i pa ganny sa *grant*, me *at least* li i a kapab fer serten bout sa travay, ki bann dimoun i a war i annan en serten lavansman lo la.

So, ler nou pe koz - Mr Speaker, nou'n koz en pti pe lo soufrans bann dimoun ki la deor letan nou pe koz lo Bidze an zeneral. So letan nou pe get en pti pe pei li menm an zeneral ozordi - lekonomi. Prezidan in monte in dir; lekonomi pe fer ekstrememan byen. *IMF* in vini in dir pou dir i satisfè. Lekonomi pe fer byen.

Be kestyon ki mon re demande e ki vir lo menm keksoz ki petet mon ti'n konmans koz lo la avan i se ki; tou dimoun pe santi sa? Eski sa i pe reflekte lo tou dimoun la deor?

So, alors sa ki nou pou bezwen fer i se ki; Gouvernman nou pou bezwen travay dan en fason kot kontinyelman pe rod fason pou zot amelyor kondisyon. Kondisyon dimoun. La nou pe koz kondisyon an term depi son saler. Kondisyon depi an term son...

Akoz i annan bokou dimoun la deor ki pa pe kapab pran en *loan*. Nou war Gouvernman Lokal pe sey antre. Zot in dir zot pe refer sa

Projet Vulnerable Houses pour bann dimoun dan distrik.

Be selman mannyer sa pe ganny fer, i pa kler. I pa kler mannyer sa *projet* li menm pe ganny fer. I en proze li menm ki'n dir pa *involve DA* ladan. Pa *involve DA* dan zot bann vizit. Zot bann vizit i konsern zis – pa *involve MNA* dan zot bann vizit. I konsern zis *DAs*.

So *MNA* nou nou'n ganny elekte dan sa distrik. E i annan mazorite ka mwan mon konnen nou ti annan pre 50 ekek ka ki nou ti soumet depi ek Gouvernman avan ki ti ganny *transfer* avek *MLUH*. E ki sa bann *file* i ti sipoze ankor la pou al kot Gouvernman Lokal. E ozordi ou war zis 4 ka dimoun ki vin devan. Ki mannyer zot swazir sa? Ki mannyer zot regarde sa?

E mwan mon krwar letan nou pe koz lo Bidze, nou pe koz lo tou sa bann keksoz. Sa bann ka ti merit vin devan *MNA*. *MNA* i merite *involved*. Mon, mon al rode. Mwan *definitely* mon pou *involved* ladan mwan. Akoz mwan mon distrik i konsern mwan. Mon'n ganny elekte dan mon distrik e mon pou al rode, *ok!*

(APPLAUSE)

HON SYLVANNE LEMIEL

Mon pa pou zis asize pou mwan esper dir pa konsern *MNA*. *MNA* pa sipoze *involved* ladan. *I will get involved in everything* ki pase dan mon distrik!

Finalman Mr Speaker, en Bidze Siplemanter ki Gouvernman pe vin avek la mon espere ki a lafen lannen sa ki in prozekte, sa ki in dir nou ki i pe al fer ek sa sonm larzan R275milyon.5, i kapab ale al fer tou sa ki i annan pou li fer avek.

E ki nou pa ganny konplent ankor demen pou vin dir ki – *or* ler i ariv Desanm, ou tande poudir nou pa'n kapab materyaliz sa, akoz larzan. Problenm larzan. So, la larzan zot pe pran *from* bann *savings* ki'n ganny fer dan lezot Minister ki swadizan pa'n servi.

Mon espere ki sa Gouvernman efikas ki zot, zot dir, zot a kapab fer sa bann keksoz ki zot krwar zot pe demande pou zot fer. E mon ti a byen kontan si ladan osi mon ti a kapab vwar semen Mrs Quilindo osi i konmans fer avan Desanm. Mersi.

(APPLAUSE)

MR SPEAKER

Mersi Onorab. Laparol pour Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre midi tou bann Manm e malgre tar mon pou osi swet tou bann *teachers* en *very*.

Malgre tar mon pou swet tou bann *teachers* en bon *teachers week activity* ki zot pe fer e mon pe fer sa atraver ou Mr Speaker.

Mr Speaker, mon pou met enn de pti parol mwan osi ki parey mon bann koleg in dir lo sa *review* ki pe ganny fer. E koman en Manm Lasanble mon pou siport sa Mosyon Bidze siplemanter pou 2023.

Dapre leksplikasyon ki nou ti gannyen sa i akoz dapre leksplikasyon byen detaye ki nou ti gannyen semenn pase avek bann teknisyen dan finans anba gidans Vis Prezidan Ahmed Afif. Sa Mosyon i pe demann Lasanble pou aprouv sa Bidze Siplemanter pou lafen sa restan mwan ki reste pou 2023.

Mr Speaker, parey mon bann koleg in dir. Gouvernman in fer *savings* anba diferan *MDAs* pou en sonm 345. 8 milyon e alors sa sonm ki Gouvernman pe demande pou re ganny re distribye baze lo son plan pou sa larestan mwan parey mon'n dir.

Wi Mr Speaker, petet bann dimoun ki pe ekoute pe

demande kote ki Gouvernman in fer sa *savings* pou li kapab akimil sa larzan.

Mr Speaker, sa *savings* in ganny fer akoz sa Gouvernman, sirtou ladministrasyon, i en Gouvernman ki serye. I en Gouvernman ki rann kont, i en Gouvernman transparan e osi i en Gouvernman ki pa kasyet naryen ou fer dimoun krwar sa ki pa egziste.

I annan 3 gran liny kot Gouvernman in fer *savings* parey mon bann koleg in dir e sa sete retar pou *recruit* nouvo travayer dan plizyer antite gouvènmantal. *Savings* osi in osi ganny fer par bann lazans ou departman ki nepli egziste e alors larzan in ganny transfer anba sa Minister pou pey travayer ki'n ganny transfer anba sa lot Minister.

Legzanp par egzanp mon kapab dir Mr Speaker, *National AIDS Council* pou *SIDA* ki nepli egziste e sa bann travayer in ganny transfer anba Minister Lasante. E alors otomatikman sa larzan in ganny transfer pou zot kapab pey sa bann travayer.

Dezyenmman i peyman trezyenm mwan saler kot menm si Gouvernman ti met 100poursan larzan pou trezyenm mwan saler pou 2022, baze lo sa nouvo sistenm *result based management*, tou

peyman trezyenm mwan saler ti fer anba en sistenm *performance based*.

E alors bann travayer Gouvernman ki pa'n fer osi byen pa'n ganny sa *full* lapey trezyenm mwan saler. E la mon pou lans lapel avek bann travayer, mon krwar petet zot in komans donn zot mye e petet *by* lafen lannen si zot performans i ase byen, e mon krwar zot pou bezwen kapab ganny zot 100 poursan trezyenm mwan saler.

Wi, Mr Speaker, trezyenm mwan saler kot Gouvernman in fer *savings* sete anba proze. Nou annan sa, lo kote trezyenm mwan saler e osi i annan anba proze kapital ki ti ganny mete dan Bidze.

Me serten Minister pa'n kapab komanse ouswa fini sa bann proze, baze lo sot defayans ki zot annan dan resours imen. Menm parey re alokasyon pou pey travayer i sipoze bouz anba nouvo lotorite Komisyon.

Mr Speaker, anba *Goods and Services* Gouvernman in osi fer en *savings* akoz bon gouvènmans dan Ladministrasyon *LDS*. I montre ki gaspiyaz in nepli, in redwir e nou konnen poudir sa i montre nou en kantite koripsyon ki'n ganny disparet e sa bann bal ki zot ti donner dan larzan piblik,

tanbour in defonse e lakord gitar in kase.

Mr Speaker, malgre sa bann restriksyon dan Bidze, nou'n trouve ki napa personni isi Sesle ki'n mor lafen. Tou zanfan in ganny zot *breakfast* depi Zanbye ziska la kot lekol. E sa i pou kontinyen ziska lafen 2023.

Tou klinik in kontinyen ganny servis. Pasyan in ganny admet lopital. Loperasyon in ganny fer. Tou manman ansent in ganny akse avek servis maternite. *Medicated assistant therapy*. Savedir *MAT*, kot nou'n trouve kot tou bann kliyan in kontinyen ganny zot *methadone*.

An plis ki sa, Mr Speaker, lopital avek *the art of medicine* in ganny fer pandan 2023. Nouvo lopital La Digue.

E osi nou'n vwar devlopman nouvo por La Digue, nou'n vwar devlopman Ero lo Praslin. E sa i bann devlopman ki lakonplisman Gouvernman *LDS*.

Nou sant lasante, *NIHSS* kot nou'n trouve in ganny refer konpletman e sa Mr Speaker, i pe ankouraz plis bann zenn pou zwenn en profesyon dan lasante pou siport sa sistenm.

Dir nou ki pei Mr Speaker, en nasyon i ganny 10 pousan ogmantasyon saler *post COVID*?

Napa! Ladministrasyon in fer, kot in fer tou travayer dan servis piblik ganny en ogmantasyon 2023. Si pa *LDS*, lekel?

Lazans Proteksyon Sosyal in kontinyen siport nou frer ek ser ki pli vilnerab. Bann resipyan *Home Care* in ganny asiste.

Laport in ouver ek lemonn. Plis touris pe vin Sesel. Nouvo *Airlines* pe apoz lo nou erport. E parey mon bann koleg in dir. Nou'n komans vwar sa pou sa *mid-term* kot nou ete.

Pri lavi in desann par lentrodiksyon *RRP*. Sesel i en pti pei e nou depan lo lenportasyon. Nou pa otosifizan malgre tou avek faktor kritik ki egziste konmela dan lemonn. Par egzant lager, i met en kantite presyon lo nou tou sirtou bann pti pei paret Sesel.

Mr Speaker, dan tou distrik rigol in ganny debouse. Zerb in ganny koupe. *Sewage* in ganny debloke. Menm avek nouvo sistenm *sewage* in ganny enstale, ki nou dir *STP*. En legzanp mon pou donner, par egzant Mirabelle ek France Joseph Estate Pointe Larue pe aktyelman ganny sa nou vo sistenm *STP*.

Lalimyer partou dan distrik. Semen in ganny nouvo sirfas koltar. Semen Adela par egzant in deza komanse Pointe Larue kot i pou benefisyen en gran fanmir dan Pointe Larue santral.

(APPLAUSE)

HON ROSIE BISTOQUET

Ozordi bann zabitan Pointe Larue i santi zot pli eze akoz *flooding* sak fwa lapli i tonbe in redwir en kantite, i preski pe disparet, i pe vin pa vin problem Pointe Larue.

Akoz tou sa *desilting*, tou sa rigol ki'n ganny fer, sa Gouvernman in fer sir ki nou tou nou servi sa semen sorti *highway* pou mont Takamaka, fer letour. Ki i pas dan sa semen, bomaten, aswar, sirtou ler lapli i tonbe, nou tou nou santi nou en pti pe pli eze.

En lot keksoz ki mon pa kapab mansyonnen Mr Speaker. Seselwa in kapab manz kanmaron "*produce in Seychelles.*" Gras a sa Gouvernman LDS apre bokou letan ki sa in ganny abandonnen, kot tou basen kanmaron ti'n bouse avek pye sed.

Apre zot a dir nou, ba bezwen dir kwa ki zot dir. La zot lo lot kote latib, nou, nou pa

mars an aryer parey kanmaron, o kontrer nou mars an avan. Nou, nou en group - LDS nou en group nou pa regrese, me nou progresse.

Mr Speaker, rapor IMF i levidans ki lekonomi Sesel i lo bon semen e ansanm Seselwa annou kontinyen sa bon semen kot plis nou lekonomi i a amelyore, nou pou ganny plis sa rekonpans. Sanmenm sa ki nou dir Sesel pour tou son zanfand.

Mr Speaker, avek sa de pti mo mon pou siport sa Mosyon. Mersi.

(APPLAUSE)

MR SPEAKER

Mersi Onorab. Laparol i pou Onorab Vidot.

HON AUDREY VIDOT

Mersi Mr Speaker, bonn apre midi Mr Speaker. Tou Manm Onorab, tou bann dimoun a lekout. En bonzour spesyal pou bann zabitan Roche Caiman.

Mr Speaker, mon'n ekout tou le de kote latib, bann Manm ki'n fer zot lentervansyon lo sa Mosyon ki devan nou. Mon'n osi tann Manm lo lot kote latib kot zot in koz avek bann travayer dan servis piblik pou dir zot travay e delivre.

Me sa ki mon ti espekte, se ki sa Manm osi ti kapab dir avek zot bann Minis, ler zot vin devan Lasanble pou travay e delivre zis parey lanfaz pe ganny mete avek bann lezot travayer servis piblik, lo promes pou fer pli byen.

Akoz ozordi Gouvernman LDS in met gro sonm larzan pou enplimant regilasyon ki zot menm zot, zot pa ankor parey pou enplimante.

Nou'n zis pran legzanp lo bann S.I. ki'n vin devan nou Lasanble, kot zot in retire trankilman apre ki nou Lopozisyon nou'n met bann konsern, nou'n alert zot, zot bann problem ki annan. Pourtan nou ti espekte bann ki pou fer pli byen i pli konn tou.

Mr Speaker, i kler ki sa bann rezon ki'n ganny souleve atraver rezon fer *savings* ki'n ganny dir pou re ganny distribye e montre, i montre klerman *failure* ladministrasyon LDS dan son fason fer pli byen e mon pou ilistre aköz.

Sa bann *savings* ki zot in dir ki zot pe fer avek bann lazans ki'n bouz anba bann diferan departman oubyen lezot antite, pa pe montre klerman sa bann servis ki pe ganny fonksyonnen pli byen parey

bokou lanfaz ti ganny dir e promete avek pep Seselwa.

E la mon pe mazin parol LDS ki zot kontan dir, depi dan sizyenm Lasanble. "Koud ou lenz dapre ou latwal."

Kestyon ki ou demande, eski zot pe koud zot lenz dapre zot latwal ? Omwen sa ki mon kapab dir atraver ou Mr Speaker, Onorab Monthy nobou kapab fran e onnet, mon a dir li mersi. Pou li kapab sed legzanp.

Akoz olye servi larzan pou zot anploy dimoun dan travay, servi larzan ki'n ganny bidzete, non. Zot plifere tay deryer bann gro, gro proze ki zot menm zot pa ni kapab ni menm fini e menm ranpli avek resours ki sa bann devlopman i bezwen pou li kapab fonksyonnen byen alaoter.

Mr Speaker, apre ekout serten Manm lo lot kote latab koze, mon santi ki i enportan mon fer sorti serten fe devan nou Lasanble, espesyalman pou nou bann *carer* ki pe swiv nou depi bomaten. Akoz mon'n ganny pa mal mesaz ki'n antre.

Olye annan en dyalog avek nou bann *carer* e nou bann dimoun ki bezwen sa servis, mon apresye ki Onorab Lemiel in donn bokou legzanp. Akoz dan mon distrik osi i annan dimoun ki'n rankontre bann defi. Olye annan en polisi

kler ki adres bann defi pandan sa 3an, non. Zot pa'n fer konsiltasyon.

Apré 11mwan; 11 mwan apré ki Lalwa avek Bidze in pase pou *Home Care Agency*, in pran ladministrasyon LDS 5 mwan pou kree sa lazans. Sa i parol ki nou'n gannyen avek panel bomaten.

E zot pa ankor ni menm pare avek en Polisi kler, parey pou zot kapab delivre e zot in menm atraver. Zot in dir atraver sa *supplementary* ki 3 milyon 900 mil *savings* ki zot in dir pou *13th month pay* avek *office rent*. Be si zot pa ti'n pare, akfer zot ti bidzet sitan larzan?

Akfer vin avek en Lalwa, akoz pa ti les li kontinyen fonksyonn kot i ti ete, ziska ler zot ti ava pare, zot ti a vin avek Polisi kler, en Lalwa kler ki 2024 i ti a fonksyonn byen.

Apré zot ava ankoler ler nou lo sa kote lata nou dir ek zot poudir zot Gouvernman i inefikas e wi zot pe mars an aryer parey kanmaron!

Mr Speaker, si en ladministrasyon ki'n ganny elekte pou fer pli byen i pran 3an pou li fer plan, pou li adres defi dan diferan area dan Gouvernman e i servi ledo ansyen Gouvernman pou li zistifye son enkonpetans, zot inefikasite pou li kapab delivre,

pou nou i klerman ki zot dekonekte e ki zot in perdi direksyon!

Prezan zot telman dezespere ki zot pri dan en fernwanr, ki zot rod tou sord kalite distraksyon pou sey fer krwar avek dimoun e montre zot inefikasite pou zot kapab delivre!

Mr Speaker, i regretab. I regretab ki serten bann antite ki kontinyelman demann larzan pou zot kapab avek lespri pou swadizan delivre, me nou pa pe vwar rezilta.

Kantite gro, gro sonm larzan ki zot kontinyelman demande me nou pa pe vwar sa rezilta.

E alors baze lo bann pwen ki mon bann koleg in fer resorti, bann landrwa kot zot sipoze kapab donn en pe latansyon pou zot kapab vwar ki bor sa bann swadizan *savings* ti byen pli kapab ganny zere.

Alors avek sa bann konsern ki nou'n ganny fer resorti, nou lo sa kote lata nou pou kontinyelman obzerv zot bann *failure*. E nou pou kontinyelman enform piblik e montre piblik ki sa bann rezilta sa fri lagrenn bat latet ki zot in donn avek pep Seselwa. Mersi.

MR SPEAKER

Mersi Onorab. Laparol i pou Onorab Waven William.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker, an premyerman mon ti a kontan remersi Bondye pou sa lafors ek kouraz ki i donn nou tou. Remersi li pou nou bann zanfan ki ankor pe lekol, pou lasante ki nou pe gannyen. Servis lasante, nou bann zanfan i kapab al etidye aletranze. E pou tou bann keksoz ki i permet nou koman en pti pei kapab fer dan sa lemondn tirbilan e en pti pei vilnerab avek pe resours anba bokou *challenge*.

Mr Speaker, mon anvi dir ki mon pou donn sipor sa Mosyon akoz tou lede latab in rekonnnet poudir i pa ekstra ordiner, ouswa i pa en keksoz ki merit ganny fer me i keksoz lezitim, legal ki en nenport Gouvernman parey in ganny rekonnnet par tou lede kote latab i kapab ganny fer, letan en Gouvernman i o pouvwar.

Mr Speaker, an menm tan ki nou pe koz lo sa Mosyon i enportan ki nou osi sitye nou dan konteks pa zis nasyonal, me lo sa gran portre, se onivo enternasyonal. Ki pe arive, ki son lenpak direk e endirek lo nou lekonomi.

Mr Speaker, nou tou nou konnen poudir i annan 2 gro pilye nou lekonomi. Mr Speaker, nou napa kontrol lo voyaz bann touris e lo lekonomi mondyal, Sesel napa kontrol e definitivman sa ki arive deor, si i negativ, i pou enpakte lo lekonomi Sesel e kwa ki kapab ganny fer.

Mr Speaker, mon konpran bann virman, bann koupaz e transfer ki bezwen ganny fer. Mon konpran ki dan sa sonm 600 ekek milyon ki reste pou depanse lo Bidze ki'n ganny propoze, me se 200 ekek milyon ki pe al ganny itilize.

Mr Speaker, i bon ki nou pep deor la i konpran kwa ki pe arive.

Mr Speaker, menm dimoun ki lopoziyon pe vizite, lo nou kote osi nou pe vizite. En kote koman Gouvernman ki o pouvwar, lot kote koman Lopoziyon. E lo kote Gouvernman definitivman nou pou sey tou mye pou toultan donn lespwar e met sa pozitivite dan lespri dimoun dan konteks realite devlopman ozordi.

E mon mazine dan lot kote koman en Lopoziyon nou pou toultan met dan lespri bann dimoun ki nou rankontre bann dezavantaz, bann negativite e pou fer dimoun annan dezespwar.

Mr Speaker, sa i normal akoz sakenn pe promot son azanda. Me Mr Speaker, pou en nenport fanmir deor la ki pe zer zot Bidze, baze lo kantite dimoun pe travay dan sa fanmir, ler dizon 5 dimoun ki travay, demen bomaten 2 pa travay, son Bidze lafanmir i ganny afekte e son plan anyel ouswa pou 6 mwan i pou ganny afekte.

E i pou bezwen fer serten lazisteman parey en nenport ki Gouvernman osi dan son plan anyel. Parey mon dir ki pa kontrol lekonomi mondyal, ki annan en lefe direkteman lo lekonomi nasyon, si i annan bann problem ki afekte lekonomi mondyal.

Mr Speaker, mon'n ekout avek bokou latansyon sa ki'n ganny dir. Mon pa pou al repet tou sa ki'n ganny dir lo kote Bidze Siplemanter, me i enportan ki nou kapab eklersi serten keksoz.

Par egzanp Onorab Wallace Cosgrow in dir i annan 2 pwen ki pe afekte lekonomi e in koz lo sa *tax* ki Gouvernman in redwir lo kote biznes. In dir gro biznes.

Me Mr Speaker, nou menm nou, nou rekonnet poudir se sekter prive ki moter lekonomi e nou espekte ki bann ki pli gro, letan ou soulaz zot,

an menm tan bann mwayen e bann ki ti pti, zot osi kree sa espas pou lezot epanouir. E pa dir mwan poudir Lopozisyon zot kont sa, Mr Speaker. Akoz dan sa moman aktyel nou bezwen soulaz sekter prive.

Alors mon pa vwar poudir sa largiman i *hold water*, akoz si ou pe redwir *tax* pou zot, efektifman ou pou donn zot sa lespas pou zot kapab epanouir. E mon konnen poudir se Lopozisyon menm ki ti apre deryer nou, pou dir be akoz nou pa donn serten soulazman?

Mr Speaker, be letan ou fer li prezan ou pe dir, poudir i pa byen. Be wi i pou afekte en pti pe ou *income*, me Gouvernman i son devwar pou al rod li en lot landrwa, e fer en fason pou li kapab gard son lekonomi soutenab.

Dezyenm pwen ki'n leve Mr Speaker, se lo kote touris. Mr Speaker, Sesel i en pti pei e *tourism industry* nou premye pilye nou lekonomi.

Mr Speaker, ozordi la konpare avek 2an pase, mazorite bann por ti'n fermen e ti napa sa nivo konpetisyon letan *COVID* ti *rampant* parey konmela. E ozordi mazorite bann destinasyon in ouver e bann destinasyon ki pe ek kanmarad, konpetisyon i feros.

Tou pe sey atrakte viziter pou vin kot li. E Sesel ler ou konsider son pozisyon zeografikman Mr Speaker, en *long haul destination*, konpare avek bann lezot ki pre, ki kapab ofer bann pri konpetitiv, ki ou espekte?

Obviously i pou annan serten bes dan *arrival*. E dapre lenformasyon ki nou ti gannyen sete in annan en bes apepre en 6 pousan dan *revenue* ki'n antre. Otomatikman i pou afekte en pti pe ou lekonomi.

Me Mr Speaker, Gouvernman pa pe abandonn tou keksoz, me i bezwen rod en fason pou li kapab fer sir parey mon'n dir, ki son lekonomi i reste soutenab.

Mr Speaker, be lot laprev se rapor *IMF* Mr Speaker. Mon pe pas ladan la, mon pe vwar poudir Sesel pe onor tou son bann lobligasyon enternasyonal.

Mr Speaker, mon pa en eksper, mon pa travay avek *IMF*, me sa bann gran eksper ki pe dir Mr Speaker, ler zot in vin isi, pandan zot vizit pou fer evalyasyon.

Mr Speaker, mon'n osi fer serten resers e mon'n vwar poudir i annan en lorganizasyon ki fer en letid ki nou apel *the Ligatum Prosperity*

Index Mr Speaker. E sa i *rate* bann pei.

Mr Speaker, dan 167 pei Sesel i sorti 51 tyenm Mr Speaker. 51 tyenm dan 167 pei ki pe fer byen.

Mr Speaker, zot annan en *graft* zot apel sa en *spider chart* kot letan ou regarde zot donn ou tou bann keksoz ki bann kriter ki evalye bann pei.

Mr Speaker, mon pe vwar poudir lo ledikasyon, lasante, *living conditions* avek lezot ankor ki Sesel in fer vreman byen. Me kestyon i touzour reste, se ki kestyon ki Lopoziyon pe demande se, be nou pep deor pa pe santi sa.

Mr Speaker, pa tou keksoz ki i pou tanzib dan ou lanmen parey sa 10 pousan logmantasyon saler ki ou'n gannyen. I annan serten keksoz; par egzantp letan ou pe fer en nouvo semen, endirekteman i benefisye ou akoz ou pe pas lo la. I en benefis.

Me letan *PUC* ouswa lot pe fer desann, pe fer rediksyon, ou pa pe ganny sa larzan me ou pe benefisye. Me endirekteman i vin larzan dan pos osi letan ou'n adisyonn li.

Me Mr Speaker, par lefe ki ou pa kontrol lekonomi lemonn, ou napa kontrol lo la. Ler bann la pe fer monte delwil laba,

otomatikman sa pti git ki ou'n donnen i kapab ganny arase dan en zour Mr Speaker. I vin parey nou ganny evalye koman en *high middle-income country* Mr Speaker.

Me si i pas en dezas, i aplati nou, nou pou ganny *relegated* Mr Speaker, koman en *poor income country*. So, i annan en bann analiz la i nou kapab fer pou defet bann serten largiman.

Mr Speaker, koman en pti pei i pa fasil. I pa fasil e ou pa kapab zanmen konpar 3an avek 43an Mr Speaker, i pa konparab. I pa konparab Mr Speaker e mwan mon vwar poudir Gouvernman pe seye menm.

E parey mon'n dir, menm dimoun ki zot pe vizite, nou pe vizite e nou, nou pe sey fer dimoun konpran poudir be regarde, parey bomaten Mr Speaker, mon'n mont anler, nou'n zwenn avek bann etidyan STA. E ti annan bann konplent e diskisyon lo kote bann *allowance*.

Me mon kontan ki mon'n kapab koz ek en zenn, ki letan mon'n koz ek li i ti ape konplent bokou. Me epi in realiz serten keksoz letan mon'n met serten bann fe devan li.

Mr Speaker, mon pa pou nonm son non, me *at least*

mon'n kapab fer li konpran, an menm tan in dir mwan be i pou envit mwan pou mwan vin donn en *talk* laba STA. Mon'n dir li napa problem.

Mr Speaker, nou bezwen met pozitivite e koman en pti pei avek pe resours Mr Speaker, nou pa dan en pozisyon e nou pa pou vini dan en pozisyon pou annan kontrol lo sa ki pase deor, ki annan en lefe direkteman lo nou pei.

So, Mr Speaker avek sa de mo, mon pou aport mon sipor pou sa Mosyon Mr Speaker akoz i pa en keksoz ki mal. I en legzersis ki bezwen ganny fer. Bezwen ganny fer pou pei kapab kontinyen bouz devan, ki nou pa perdi sa bann aki ki nou'n reisi kapab tenir eska konmela la.

E Mr Speaker, mon pou demann Seselwa an zeneral, akoz parfwa si ou pa fer resers, rod lenformasyon e konpran ki fason lekonomi en pei i fonksyonnen Mr Speaker, i fasil pou ganny dereye letan bann keksoz pe ganny tire an deor konteks ouswa ou pa pe ganny prezante avek vre realite. Mersi Mr Speaker.

(APPLAUSE)

MR SPEAKER

Mersi Onorab. Mon pou
adjourn deba la pou ozordi.
Nou pou re pran demen *matin*.
Mersi. *Adjourn*.

(ADJOURNMENT)